

香山县乡土志

佚名

文硕阁

wenshuoge.com

目录

关于我们	3
香山县乡土志一	5
香山县乡土志二	9
香山县乡土志三	20
香山县乡土志四	40
香山县乡土志五	71
香山县乡土志六	73
香山乡土志七	88
香山乡土志八	97
香山乡土志九	98
香山乡土志十	101
香山乡土志十一	109
香山乡土志十二	114
香山乡土志十三	119
香山乡土志十四	121
香山乡土志十五	134

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

香山县乡土志一

历史

香山未置县以前之隶属

附城池建置 香山既置县以后之隶属

附公署学宫建置

历史

香山初置县之年代

香山县，宋高宗绍兴二十二年，以东莞县香山镇置。据《舆地纪胜》宋史地理志作三十二年误。

香山未置县以前之隶属

香山县，汉番禺县地，晋以后为东官郡地，唐为东莞县地，宋始分置县治，属广州，割南海、番禺、新会三县滨海地益之。

宋王象之《舆地纪胜》云：香山县下本东莞县香山镇，元丰五年，运判徐九思请建为县。《国朝会要》云：绍兴二十二年，又升为县，不同。恐建请于元丰，创置于绍兴耳。不然，则元丰创建中间复废？《新图经》云：元丰徐九思请建为县，止置寨官一员。绍兴二十二年，东莞县姚孝资请州，闻于朝，创立县也。

祝志云：香山镇之设，当在元丰之后，绍兴之前。盖初以厄险设寨，后复以人烟繁盛建镇。镇曰监官，寨曰寨官。秩虽同从九品，而职掌各异。史志皆云以镇置县，不云以寨，则元丰之后，改寨为镇，可知也。旧志称唐至德二载设镇，非是。又云：唐之镇戍官，不属于县，县立镇寨官，宋制始有之。《舆地纪胜》云：元丰止设寨官一员。元丰九域志，各县下皆详其乡镇监场，而东莞下不云有镇，则设镇更在置寨之后。元丰时而无镇，何论至德，旧志妄误明矣。

又《梁杞传》云：杞，延福里人。熙宁初致仕。与运判徐九思议立香山县事，不果行。按：杞是时籍隶番禺。香山议立县事始此。

又《陈天觉传》云：时香山尚为镇，止设寨官一员，属于东莞，岁输粮莞城，常被海寇。绍兴二十二年，天觉请改寨为县，以便输纳。东莞县姚孝资，请州，闻于朝

，割南番东新四邑濒海地为县，诏从之。按：陈氏族谱称，天觉被黜为东莞文顺乡寨官，遂家焉，则请设县时，天觉殆方任寨官也。

又云：《宋史·地理志》，绍兴三十二年以东莞香山镇为县，考元丰《九域志》，东莞有香山崖银场。顾炎武《郡国利病书》称，恭常都鸡拍村银涌角宋初产银，旧志称金斗湾，在恭常都东南。据此则恭常都，实为莞、新二县之界。香山所割自新会者，由金斗湾沿海迤西，尽于古镇、黄梁，皆其极东滨海地。

又云：按旧志，文顺乡专属东莞。文顺乡为今之仁厚、良字、龙眼、得能、四大、恭常、谷字等都，其余则分属南、番、冈州云云。考《通典》，则冈州即新会耳。按：此香山地旧隶新会之可考者。

又：《陈天觉传》注云：《阮通志》以天觉附南海黄勋传后；又谓其所居乡曰库涌，旧隶番禺，今隶香山，故并见二邑志。考库涌旧隶东莞，不隶番禺。又按《陈氏族谱》，天觉先居文顺乡，盖即今县城，其长子彦旻，始分居库涌耳。按：此香山地旧隶东莞之可考者。

又云：乐史《太平寰宇记》，东莞县香山在县南，隔三百里，地多神仙花卉，故曰香山。以里数计之，疑即今县东南五桂山。考旧志称，五桂山多异花、神仙茶，与《寰宇记》所言正合。又称故镇，绍兴间改名香山场，核其地在凤凰山东南。元丰《九域志》东莞有香山崖银场，核其地盖今鸡拍村，在凤凰山东北。凤凰山，本五桂山之支。旧志称，五桂山周回二百余里，则并凤凰山举之。可知场、镇，皆在其山麓，则其山即《寰宇记》所称之香山决矣。盖县名所由锡也。按此香山得名之始。

香山既置县以后之隶属

元属广州路，明属广州府，本朝因之。

《祝志·宦绩·周行传》云：行，隆庆元年任，以寄庄逋逃，请升邑为州，顺德县争之，不果。

康熙间议升县为州，辖顺、新诸邑。按：此事祝志据申志食货志载入，无年月可证，亦不果行。

《祝志》又云：自绍兴以来，县皆属广州，靡所析并。然宋、元、明皆为下县。及国朝休养生息，户籍滋殷，乃与南、番、顺、东等同列大县。《乾隆府厅州县图志》称，为繁疲难，盖视明以前异矣。光绪三十二年，总督岑春煊拟割邑东边隅地，合并东莞县属虎门一带，设虎门厅辖之，不果。

附城池建置

香山故城在城南，宋陈天觉筑缭以土垣。是时，邑郑姓欲建城于雍陌乡，陈天觉难以口舌争，乃屑铁和泥置今城址，曰：“建城须贵地，地贵者土重。”秤土果重于雍陌，遂建焉，号铁城。元因之，周四百五十丈，门四，南曰阜民，东曰启秀，北曰拱辰，西曰登瀛。明洪武二十六年，守御千户陈豫广之，作砖城，高一丈七尺，上广一丈，下广一丈八尺，周围六百三十六丈，雉堞三千六百四十，门四、楼四、敌楼四、兵马司四今废、水关二、警铺十二今废。宏治间，知县刘信于砖城外，扩地二丈许，筑子城蚝垣，周三里有奇。崇祯十三年，知县顾其言增城四尺，原窝铺十四间，增造十一间，筑来青、郁金二台。按：《田志》藁载，邑城四向，屡修屡改，事皆溺于日者之说，兹不录。

水关，一明关，覆以楼，介西南。一暗关，介东南池，东南长五百四十七丈，旱塹一百四十六丈，凡濠塹周六百九十三丈，阔四丈五尺，深一丈三尺，其延袤视城有加，日久蚝垣倾圯，旱塹堙塞。乾隆十一年，知县张汝霖疏浚南河，其水复绕城濠，后又以民居侵占，屡浚屡淤。同治二年，邑绅捐资疏通，达于濠，由濠达于河。按：颁行例目，水道门有人力沟通者载之，惟县属仅此濠为水力沟通者，今载于此，下不重出。

前山寨城，北距县一百二十里，南至澳门十五里。明天启元年始立寨，国朝康熙五十六年建土城，周围四百七十五丈，高九尺，下厚三尺，上厚二尺。每城二十丈，增筑子城一丈，凡二十四丈。为门三，南曰前丰，东曰物阜，西曰晏清，北逼于山，故不门，起炮台、兵房于西、南二门上。嘉庆十四年，立前山营。

南顺罟草土城，在潭洲南村之南。《祝志》云；建城年代无考，疑在康熙七年。今圯，惟存正西砖城门，榜曰镇洋城。

黄梁都斗门墟土城，在县西南九十里。城方一里，乾隆二年建，周围二百尺，高七尺五寸，上厚四尺，下厚五尺。雉堞用砖，东、西城上各设台楼一座，炮九位。

附公署学宫建置

海防同知署，在前山寨城内，原副将署。乾隆九年改建。香山海防军民同知特为防澳而设，乾隆八年，以肇庆府同知移驻此。

知县署在仁山下。邑人刘必从故宅。宋绍兴二十二年建，宋末徙莲峰山。元至元二十一年修复旧治，元末宣差托啰克台移县治守旧寨山。明洪武三年，县丞冲敬仍旧址重建。今仍之。

副将署在西门内永宁街，康熙七年建。

学宫在县治东一里，莲峰之阳。宋绍兴二十六年建。淳祐四年，主簿宋之望，徙建于城内西南隅。元泰定三年，知县左祥徙复莲峰旧址，元末毁于兵燹，明洪武三年，县丞冲敬修复。正德十六年，教谕颜阶请别置讲堂于城东北隅。嘉靖七年，知县林士元拓讲堂，析丰盈仓地迁建。万历三十三年，知县王好善迁复莲峰旧址，今仍之。

香山县乡土志二

政绩

宋元明国朝

宋

姚孝资，绍兴十九年，以右从政郎知东莞县事。治才精敏。下令阖境筑堤护田，水利大兴，民蒙其惠。时香山镇惟设寨官一员，役属东莞，输役往来不便。库涌人士陈天觉，请建寨为县，孝资如其言，请州闻于朝，创立县。于是敦武校尉邕州副将刘必从，捐其祖地以为县治，至今赖之。祀名宦。

梁益谦，荆南人。以吏最闻。乾道七年来为令。自绍兴壬申创邑，于是十九年矣。前此吏兹土者，简陋自恕；至范文林崇建寺观，民益苦之；益谦修举百度，气象一新。首重学校，课督士子，增学田二顷二十有六亩；疏南濠水以灌陂田，捐俸置赈济仓，士民德之。淳熙元年代去，人思之，为立德政碑。祀名宦。

洪天骥，字逸仲，晋江人。少有异质，贯通经史百家。淳祐七年登进士，宝祐四年校艺南宫，得文天祥卷，置之上第，人服其明。景定三年，授宣教郎，知香山县。至之日，以教养人材为首务。修复大成殿，明伦有堂，主敬美身，宾贤登俊有斋，皆捐俸为之，敛不及民。其为政，一裁于义，俗哗健，戢其尤桀黠者，曰：“此囚牙讼师去，则吾民安矣。”邑以大治。经略使洪勋、赵汝暨雷宜中，及仓宪交，以邑最上。终知潮州，与兄文毅公天锡，文学齐名，时谓二洪。卒，文天祥状其实行。所著有《东岩集》。祀名宦。以上知县。

元

札忽进义，大德八年任县达鲁花赤。恤民劝农，察其贫者给以牛种，且减其租。刻小学《孝经》，教民子弟，民爱之。以上达鲁花赤。

王天祥，大名滑州黄县人。至元二十一年为县尹。视篆之初，以崇儒为先务，修葺学校，重建讲堂，劝农省役，百废毕举。戍卒厮役之违法者，严惩之，翕然称治。县宇废自宋末，携父老访求故址。得诸草莱中，乃捐资修复，至今沿之。在任七年，輿情爱戴如一日云。祀名宦。

程庆祖，至大二年任县尹。正直廉能，他邑难平之讼，司府每咨判折。又重建鼓楼。四年卒于官，士民思之。祀名宦。

左祥，盱江人。初任翰林从事，受知于学士吴澄。泰定乙丑授承直郎，来为县尹。留心政教，尝作《劝学篇》以训士，刻《谕俗编》以警民。寻迁儒学，修义斋，时与士子讲濂、洛、关、闽之学，俾有所依归。吴澄称其政有三善。后改知增城，其政如香山。擢知万州，卒。祀名宦。《劝学篇》详田志藁。

张执乐温以三字为名，字敬之，冀州南宫人。以掾为辰溪簿，有能声。至正四年擢香山县尹，廉谨自励，卓有猷为。首饬学校，次修县治，求访民瘼，政以不扰为本。丙戌秋，季童入寇海上，奉檄平之，民赖以安。凡百丛务，犁然悉举，靡宇桥梁，一焕前观，而民不知役。满任去，民为立德政碑。祀名宦。以上知县。

明

周颐，莱阳人。洪武二十九年，以监生知县事。勤于政理，善于抚字。时霖雨害稼，民方告灾，而朝命秋粮兑拨，官军郡符催逼甚严，颐即捐俸代贫民输纳。决断滞狱，囹圄为空。招徕逃民，田野尽辟。秋夏二税，不待督责。及瓜而代，老幼攀辕留之不得。改知藤县，升工部主事。祀名宦。

蔡惟溥，泉州晋江人。永乐甲申进士。三年知香山县。性纯笃，喜怒不形。劝勉学校，抚集逃民。时邑有三虎为患，惟溥率民捕之，虎患悉除，闾里以安。任满，民保留不果。后升知钦州，为政如香山。切切于抚字，州治称平。祀名宦。

冯诚，浮梁人，永乐辛丑进士。宣德元年知香山县。威而不猛，宽而有制；廉而不别，得牧民之道。时海滨沙田日增，豪右占据，兴讼连年，诚为断之，其讼始息。儒学自元左祥迁复后，虽时有修葺，率皆因陋就简；诚倡诸同僚及邑人士，大为修治，焕然一新。旋以外艰去，民尾舟送至庾岭而还。后擢监察御史，累官至湖广按察使。祀名宦。

朱显，延平人。成化十四年，由举人知县事。性敏捷，扶弱抑强，积年健讼十余辈，终其任不敢出。在任寡交接，乡绅中惟长乐令黄瑜、乐会令柳齐至，即延款竟日，以二公未尝干以私，可为矜式也。靡宇桥梁，经其营造，皆可久远。凡所设施，吏民不欺。军士之悍戾，寄庄之豪狡者，咸不敢犯。祀名宦。

按：明代本邑寄庄之弊，官民交病。盖邑多涨卤，积而成田，可稻、可菱、可盐、可渔，其利颇溥；故南海、番禺、新会、顺德、东莞五县豪民，皆托产焉，随田寄籍，散隶各都，不输粮役，官司责里甲代输，累至倾家。嘉靖元年，知县袁镛申请上宪，削其图籍，各以其县名都，添设番禺都图一、新会都图二、顺德都图五，人户自为里甲，并令寄庄钱粮，各县径自征解。十四年，巡按戴璟，禁各县人民置买香山田土寄庄，违者入官，仍问罪；而旧有寄庄，仍逋负累累，里长恃顽不著役。二十四年，巡按陈储秀檄里长如令。又案：验寄庄杂供，尽数起运拨解，不足，始

以香山额粮、丁粮凑抵，而豪民与里胥为奸，故毁贮县黄册，失额粮多至一百余石。县民又飞诡姓名，冒入寄庄匿征，各县输项，亦不批解。二十六年，知县邓迁依旧例，挨图派役，分管诸项，各县人役，仍编令收解；各仓粮米，上司柴薪，悉如前款。其料价则以各都所缺无碍银追纳抵解，陆续补还。其飞诡诸弊，则以本府黄册核正；其各县见贮各庄钱粮，则关取回县，如例支解给发及存留，弊为之一清。事详祝志，兹撮其大略附显事后，以备参考。

黄正色，字士尚，号斗南。其先光右人，本姓廖，因乱迁江阴，易姓黄。嘉靖戊子中乡试，明年第进士，尹仁和，未岁丁忧，起复献征录诣铨部。座主霍韬，时为侍郎，心知其廉能，欲用为南海令；而廖轻在任，乃言于尚书汪鋐曰：“吾欲正色暂令近县可乎？香山虽僻，而粮逾二万，亦进士所宜，可令也。”鋐从之暴志。初令香山，剖断如流，政声藉藉张府志。发奸摘伏，出人意表，人自不能欺之。邑之墾田，多为番、南、顺、新士夫豪民所夺，占及寄庄户，各就近仓输纳解运，邑民翕然称便。视事方一月，会廖轻擢判肇庆，改调南海，去后以韬荐为监察御史。祀名宦。

邓迁，字于乔，闽人。嘉靖丙午，以举人知县事。政教兼举。县治后有仁山，为豪猾所占，捐俸赎之。修建书院，集士子讲学其中。邑多邻县寄庄，前令黄正色固能吏，犹移丈取征，至是不召自来。迁令各推一人为领袖，赋役皆完。寄庄积弊、及迁青厘，事详前。洪武初，既虚三灶地，其田永不许耕。正德中，南海势家以新会虚税影占，亡命之徒附之，招立畚蛮，立为十里，聚众盗耕。嘉靖十五年，该都里排赎为己业，有钱备者，素称蕃舶，恃强冒夺之。迁申明上司，丈量余田一十五顷有奇，归预备仓，以备赈济，督府奖其贤能。移文十郡以为守令法。升嘉兴府判。濒行，吏以例得柴薪银归之，迁益以俸金，令吏胥市牛酒劝农，及周老而贫者深山穷谷，莫不感动，为立德政碑于石岐头。撰文者，都御史李义壮也。祀名宦。

陈揖一，字竹涧，新城人。岁贡。先是邑令邓迁置营浮虚山，式遏寇虐。揖继至，方春遇荒，即豫请郡库赢余以赈。体揖意者，皆乐为劝，阖邑以济。首除戎器，以戒不虞。夏，海贼过之，营卒建旗鸣鼓，贼相顾失色而遁。比及秋杪，蕃寇大举，邻邑被侵。聚百十艘，将攻邑城。揖乃运筹坚守，贼窥伺旬余，皆引去，城赖以存，揖之功也详兵事录。揖为人慈祥恺悌，博通群籍，尤深于易。

周行，字鹿野，龙溪举人。隆庆元年任。廉而惠，以寄庄逋逃，请升邑为州，顺德县争之，不果。时夷商丽处澳门，蕃舶至盆，验有例金，峻拒不纳。惟禁水陆私贩及诱卖子女等弊而已。祀名宦。

冯生虞，字德卿，大足人。万历丁丑进士。九年来知县事，有清操，遇事明敏，庭无留牍，狱无冤民，巨奸皆闻风匿迹。时奉檄清丈，单骑赍具，不费民间一钱。造鱼鳞，归号册，不爽尺寸，国计民生，皆利赖之。以最擢台谏，有骨鲠风。

张大猷，字式程。黄陂人。万历乙未进士。以才调香山，会税瑯李凤谋驻节县内，大猷言，地近海瘴，非税使所宜居，且蕃情叵测，万一犯及税使，如朝廷威德何？瑯沮而止。未几，奸人附瑯者，罗织邑民四十余人，瑯命私人逮之，大猷不可。俄复有人诱瑯，采鸡拍诸山矿，瑯集亡命千人，分踞诸山，淫掠横行，大猷密白大府，立擒首恶，置之法。居常廉洁自励，以教化为己任。乡邑分立文社，捐俸建育英馆，为课业所。其后捷南宫，居鼎辅者，皆其品藻士也。在邑六年，以治行第一。征就道，邑民追送数百里，呼号挽舟不能行者，累日。

蔡善继，字伯达，乌程人。万历辛丑进士。三十六年知香山县，常端坐堂皇，若不营一事，而上下肃然，发摘若神，好讼者相戒匿影。条上制澳十议，未几，澳弁以法绳蕃头，蕃叫嚣叵测，善继单骑驰赴，数言解散，缚悖夷至堂下笞之。故事蕃人无受笞者，独善继廉介，素为蕃人所服，故帖然受笞。累官岭西道，适两粤总制何士晋下令堕澳城台，一切机宜悉筹于善继。香山之民，始终受其庇云。

但启元，字五庠，星子人。万历二十五年，由举人知县事，有惠政。县东南一带枕大海，民煮海为盐。明初设立盐场，灶排二十户，灶甲数十户，分上、下二栅，令筑漏煮盐，以供课。后盐场日削，斥卤尽变禾田，灶丁逃亡者多，丁额犹循旧版，至有一人而兼数丁者，即徙之他业，仍责其课。启元为之清审，力请得除九十七丁，岁免代输银四十五两有奇。灶民为庆更生，立德政碑，建祠翠微乡西祀之。碑今在翠微乡三山庙侧。

王如春，湖广人。万历四十六年，以进士知县事，有兼人才。甫下车，即召诸吏试以律算，小有纰缪，必立摘之。已而，试诸医及堪舆家，术不精者，悉驱出境，曰：“无令此曹，误吾民也。”捕险健讼民，置之法。下令曰：“凡讼必以情，涉伪者先治其诬，然后视事曲直。”由是无敢欺者，一时称为能吏。其试士也，必自为文，以为多士式。宴邑之缙绅，必吟咏终日，举觞引满。盖其意气自命，多如此。

顾其言，字公纶，上海人。崇祯庚辰进士，是年任。时御史柳寅东按郡，丰采峻肃，下吏惮之。其言直陈地方豪猾，民隐艰难，立谈移日。猾吏治既肃，乃敷文教士，一经拔识，如登龙门焉。县城故庠簿，其言捐俸增筑瓮城，城外建台，自额曰郁金，曰来青。严保田，盛守御备，邻境亦赖以安。岁饥，出积储，劝赈恤，荒不为厉。事闻，诏进给事中。去之日，士民遮留塞道，如失慈母。以上知县。

冲敬，洪武元年来为丞。当草创之初，才干有为。县治旧在城内，元末徙于莲峰，经兵燹而废。敬访在城故址，经营廨宇，县治既成，百务悉办。劝农桑，抚流移，民皆便焉。狂寇倏至，众情徬徨，敬率民捍御，寇乃遁去，民赖以安，竟以勤死。参政周桢为文祭之，闻者感动。祀名宦。

彭豫，字与志。泰和人。举明经，为万安训导。以言事擢县丞。香山在海岛间，地

远俗器，前为县者悉尚猛。豫至，即宽其教条，流亡来归。濒海诸屯帅，暴横为民害者，往往择民膏腴田，诬以荒废，据占自利，郡县不能制。豫曰：“帅欲病吾民乎？豫在不可得也。”乃悉追还民。县有大猾，恒持长吏短长，摇撼以骋，豫悉捕置诸法，奸宄敛迹。倭寇常掠民妇女，货货出入，倏忽不可踪迹，民苦之。豫设方略，教民掩捕。迄豫去，寇无入境者。濒海岁旱，众祷不应，豫自外来曰：“岂有为文具，而可以格天者乎？”即自齐沐致祷，越二日，大雨沾足。明年复旱，祷亦如之。县民舍火延及宫廨，豫叩头响之，风返火灭。俗蓄虫毒，中者辄死，豫廉得之，诛徙其家，俗遂革。暇即诣学，训迪诸生，遂有登科者。时外夷贡方物，自香山入京，典事者失封緘，朝廷遣御史按问，事连豫，其子启和，愿以身代。邑民皇皇，恐豫得重罚。会赦获免，民大喜，迎以归，坐是不得迁。在邑六年，考绩，卒于京邸，民悼惜之。祀名宦。以上县丞。

颜阶，字德升，龙溪人。正德十六年，以举人来为教谕。庄重醇雅，克副师范。首建迁学之议，继毁淫祠，以立社学，禁师巫以崇正教。提学副使魏校，开席讲学，委阶督诸生听讲；阶坐无惰容，言必中节，校特加礼遇。巡按御史涂敬，以异材旌焉。尝摄县事廉干，绰有余裕。在任七年，擢贵州印江知县。祀名宦。以上教谕。

国朝

印光任，江南宝山人。举孝廉方正。乾隆八年六月，英吉利人仇劫吕宋船，复掳其人，风急飘至狮子洋。光任时知东莞县，上官檄往诘之。光任知其篷碎粮竭，将有乞粮之请，而修船必需内地工匠，略捉搦之，可制其死命。乃归告上官，请先遏余以饥之，再匿船匠以难之。英酋果不得已，命其头目，叩关求见。公直晓之曰：“天朝柔远，一视同仁，恶人争斗。汝能献所俘吕宋人，听中国处分，则米禁立开。当唤造船者，替修篷桅，送汝归国。”英酋无可奈何，伏地唯唯，还所掳二百九十九人。上官廉其才，题授肇庆府同知；寻改澳门同知，驻前山寨。居无何，法郎西入澳贸易，英吉利贪其利，先后发六艘，诡言来市，阴谋篡取。光任察其奸，驾战舰，督水师营兵出海，召英酋，厉声叱之曰：“若来何为，利人货物，将作贼耶？我奉制府令，若伤法郎人，即将尔国人之在黄浦者抵偿。若夺其货，即将汝货之在牙行者抵。”言讫，挥健儿千余，披甲张炮，环其舶而守之。英酋禁声，登时六船摇橹去，而法郎船早已安渡虎头门矣。光任任海疆久，于诸夷种类支派，某强、某弱、某狡、某愚，其地之山川形势，靡不部居别白于胸中，以故先事豫谋，当机立断，终其任，海面肃然。以上同知。

张令宪，字胥游，无锡人。贡生，顺治八年任。时郡邑初定，粟米藟苳之供倍昔。令宪属父老曰：“征输急矣，顾兹残黎，吾不忍迫也。”盍完而课，罔罹于法。壬辰岁饥，贼梁子直等，率饥民直抵城下，蚁缘而入。城破，令宪骂曰：“吾与城存，亡身死。”分顾其子曰：“死亲孝也。”遂父子遇害。赠太仆寺卿。祀名宦。

沈兰，字丹颖，德清人。贡生。顺治十一年，由教职迁知香山县，中道被劫行李，萧然，里胥密以金馈，弗受。至之日，斋宿告城隍，著誓章以见志，手书而口诵之。时兵荒后，贫富交困，兰加意抚循，严汰供应差费，禁戢悍兵市易，流棍土豪一时敛迹，士民始有生意。每朔望后一日，延绅士于堂，课文讲学。莅任三年，颂声日起。以强项去职，邑民思之。

姚启圣，字熙止，会稽人。奉天籍。圣祖登极，启圣以布衣上疏，请八旗开科。康熙二年癸卯，启圣即举第一，三年来知县事。性沈毅，有文武才。岁比不登，前令坐负课，系狱者七人，公叹曰：“明年增吾为八矣。”乃张乐置酒，出七人于狱，痛饮之。为置装遣归。而通牒大府曰：“七令名下应追金十七万，已于某月日收库讫。”大吏疑公巨富，代偿帑行善，不知公故寒士，实未办作何偿也。下车日，即以兴利除害为己任。时南方洊饥，盗贼窃发，香山地濒海，盗出没不常。启圣闻警，不介马而驰，士卒奋勇争先，贼皆挫衄去。值再迁西北诸乡界，乡民挈妻孥，号于路，督迁之营弁犹恣掠。启圣挟白刃前曰：“是皆吾赤子也，颠连至此，尚忍然耶？”弁感之，悉还所掠。暇则循行阡陌，劝课农桑。虽时值倥偬，而能留心学校，培植人材，都人士弦诵之声，未尝或辍。初，澳门贼霍侣成弄兵，大吏不能制，启圣以计擒之；复叛，又出奇兵缚以归，海始靖。而督抚忌其才，顾以通海诬劾，将置之死。启圣夜见平南王，以危言动之。王上疏白其枉，督抚皆自杀，而启圣罢官。去官日，士民涕泣，奔送逾境。会康亲王讨耿精忠，素稔启圣才，具币招之。启圣遂招邑人毛天狮、勇士钟宝等往，相辅立功。台湾平，官至闽浙总督，加少保。祀名宦。

申良翰，泾阳人。康熙十年，以举人知县事。甫下车，即与教官欧阳羽文倡修文庙。复九曲水，继修邑志。时值兵燹之后，良翰核地方大势，作形胜一篇，于犄角策应，得其要领。今言邑海防者，犹师其意焉。十五年，抚贼陈器瑜，纠合海寇攻邑城，乃与副将白色先勒兵守御，待援兵之至。邑故多虎患，作文牒城隍驱之，虎遂去。

余庆锡，长垣人。康熙己丑进士。六十一年，知县事。慈惠廉明，杜苞苴，除陋规，听讼开诚劝谕，折两造以片言，惟以移风易俗为务。有为贼所污者，力白其事于上官，获湔雪焉。雍正二年，奉旨增广学额，邑属大学例得增广，而蠹吏沮格不行，邑士何仞桎已吁于上官。庆锡复力详请，事始济。旋以催科不中额，计缺二千余金，邑人恐失庆锡，相率劝输，越月而赋集。寻复论，既去官，饔飧不给，士民馈饷不绝。登舟时，钱送者数千百人，即邻邑之鬻蔬果者，亦各以其所有献云。

鲁遐龄，会稽人，雍正癸卯进士，十年知县事。明敏有才，理繁剧裕如也。邑故好讼，遐龄至，发奸摘伏，断决如流，民多畏服。邑东竹洲山，素为萑符藪，遐龄侦知情形，亲履其地，人皆危之，乃不旬日，弋获殆尽，声振一时。重学校，捐俸修棖星门，建尊经阁，葺书院，置经史其中，延名宿课之。凡所拔识者，先后多获隼

焉。去之日，民遮道不忍舍。

王之正，顺天，通州人，举人。性廉介，伉直有威。尝令他邑，其邑人德其治，以纱笼灯寿之，之正念不可距，受而归于神祠，其廉介率类此。乾隆九年，署县事。到任澳蕃毆毙汉人，匿凶不献，檄飭之不应，之正单骑驰谕，执法愈坚，诸蕃慑其威且廉也，卒献正凶抵法。尤加意造士，榄山书院新改建于蓝田坊，经制未备，之正首议增饰。厥后张、暴、彭各令继而愈盛，故书院皆祀之。

张汝霖，宣城人。乾隆十一年，以拔贡知县事。廉介公慎，有经世才。邑民阮阿珠，被采胆者诱至湖洲山割其腹，气未绝，有告其母者，母趋视之，询凶贼姓名？阿珠以龙眼都高姓告。母闻之官，时方大索采生奸徒，上官严檄，责捕高姓。汝霖曰：“安有杀人而肯告以姓耶？”密访五日，得其主名，一讯而伏，仍刘而嫁祸于高者，人称神明。县南罗婆陂，久为豪强改筑，遏水自利，为勘实，修复故道，藉灌溉者数百顷。其他善政，不可枚举。擢澳门军民同知。蕃僧以天主教立庙诱众，汝霖密请大吏入告，毁其庙，私入教者罪如律。方毁庙令下，夷人然不服，有兵头者，尤桀骜，欲以武抗，汝霖捧檄单骑赴谕之，夷人感悟，其胆识济变类如此。寻镌级去，犹条陈善后十事，宪府嘉其议，勒诸石，民讴思不忘。

暴煜，屯留人。乾隆六年，举顺天乡试。令保昌暨连山，皆有声。十三年，调香山。廉明公正，阖境肃然。有弟讼兄者，薄惩之，复反覆开导，皆感泣去。俗尚祈禳，妇人入庙礼神，积习成风。煜示禁谕，旧俗为之一变。尤乐育人材，于丰山、榄山二书院，增修讲堂、斋舍，复置田数顷，为脩脯膏火之资。科岁所补弟子员出书院造就者，十八九。乡试同榜获隽者六人。复著学规数款、书院条约十则，以垂后学。旋调南海。去，士民逾境奔送。

彭科，镇远人。拔贡生。乾隆十六年知县事。善俗宜民，尤以育才为务。先是阖邑九书院，虽经各前令递置公产，而犹未充裕，科分拨沙田归之，以为永久计。又询知大黄圃未建乡塾，即亲诣其处，偕绅士登山择地，卜筑于鳌峰之麓，颜曰鳌山书院；亦拨田一顷有奇，岁以所入资学徒费。诸人士无不感颂，特建遗爱祠于书院左偏，祀之。

孟永棻，睢州人。乾隆辛巳进士。三十九年知县事。加意民瘼，镇静廉明。时新村刘姓，有与庠生张时化争坟地者，理不直，阴戕其病父，移尸坟所，诬时化毆毙。狱几成，永棻察伤痕可疑，侦访得实，申上官白其冤，案乃定。其无枉纵类如此。

彭翥，字竹林，云南蒙化厅人。举人。乾隆五十一年，由知封川县调香山。捕盗有能名，尤善制澳蕃。蕃性桀骜，多藐法，或以利啖有司，翥驭以严。会澳蕃杀人，蕃目坚匿凶犯，翥亲临檄拘，蕃目谢病不见，又欲屈翥，会于蕃庙。翥曰：“吾天朝命吏也，庙岂办公地？”乃张幕设案于通衢，盛仪卫，召通事及蕃日至，蕃目戢

觥，遂刻期奉约束，以罪人对簿。乾隆五十三年，海贼号平波大王者，率众为寇，制府福康安调水师擒捕，飭翥办军需，将弁懦不获盗，诬翥供械朽钝，制府怒召，翥出诸弁，密揭示之。翥请给精兵二百，躬率往讨，许之。乃戎服出哨，诸武弁会剿，相遇海岛中，欲缓行，翥不听，行百余里，遇盗船二，发炮击杀十数人，贼惊遁去。翥知贼必聚众来，乃入岛，约武弁齐出洋。翼日，贼船八九从上游直犯，发炮击之闭。翥知贼以秽物压胜，亟取黑犬血衅炮，炮果发。适大军亦至击破贼船，俘获七百余人。制府大悦，飞章入奏，以功赐花翎，升琼州府同知。翥工诗，著有《海天吟》，中多出海捕盗时作。澳民咸尸祝之。

许乃来，字菊传，浙江仁和人。举人。嘉庆四年，由海丰县调知邑事。邑山海交错，为萑苻藪，乃来治之，有循声。七年七月，大府闻有拜天地会于沙尾嘴者，不知其处所，而恭常都有村曰沙尾，乃檄左翼镇总兵黄标率舟师千人夷其村，又委员督之，且令乃来曰：“沙尾村民作慝，尔偕往草薶禽猕，不尽根株，不得止。”于是村民汹汹，流匪张茂刚等乘机怵之，辄欲集兵械以拒捕求生为名。乃来故廉明，与黄标雅相重，谓标曰：“沙尾村民何敢然？乃来窃疑之。公舟至南环俟乃来，无遽往。南环者，澳门之南，距沙尾村海道数里。”标曰：“善。”乃来则驰书密谕沙尾村民。时日已昃，请于委员戒輿人，期曰质明具肩舆，食而行，限二日至沙尾村。村距县治百二十里，常以一日至。乃来限二日者，欲侦访情实，且容赍谕人往复也。谕至，耆士拥而观曰：“许父使来者乎？”读其谕曰：“大府虑匪人为村毒，故欲捕治之，无匪何害？若有匪，除之福也。今愚无知敢拒狱，师且至，本县念而等胁于匪人，遽罹大咎，心甚悯焉。即执恶魁以献，本县为而等请命。不然，尽为戮矣。”则皆感泣，以计擒恶魁张茂刚等。越二日，乃来与委员至，村民老稚数千百人跪迎于路，献其恶魁累累。温谕之，皆欢呼，其声殷天。黄名灿者，黄梁都巨匪，尝拜会于洲门，乃来前已访闻大府者也。洲门邻近曰沙尾嘴，滨海旷阔，无人迹，名灿常与其党啸伏其中。乃来在道时侦得之，报大府曰：“沙尾嘴非恭常之村，实黄梁滨海地也。”即密移新会守备曹某，又飞咨黄标，移所率舟师围之。乃来由沙尾村突往，出名灿等不意，遂擒六十五人，于是沙尾村之事得白，改其村名南屏。乃来治盗最严，然不喜株累。常曰：“除盗所以安民，多杀何为？”初，名灿等之横于黄梁也，以睥睨杀人；村有富家子，必胁以会，不从则焚其屋，戕其子弟；当是时，市不安肆，昼无行人。乃来业知之而未悉其巢穴，故不轻发，至是围之，并得拜会名籍，著录几千人。曹守备欲尽戮以为功，执千余人犹搜捕不已。黄梁居民皆震，妇孺哭失声，有欲溺子而自缢者。乃来力争之，立释数百人，系数百人以归。乃来又力辨其胁从，尽释之，请大府焚名籍，民心乃安。是举也，不出旬日，大盗尽平，恭常、黄梁两乡之民如获更生。未几，惠州有陈烂屐之乱，经年事乃定，博罗县几为墟，人由是益颂乃来慎密弭乱之功。黄标尝语人曰：“菊传真一县生佛”云。八年以回避调广西临桂县，倾城送之，邑人请祀名宦。

彭昭麟，字井南。四川双流人。由拔贡任南江教谕，以军功升知阳春县。嘉庆九年，调香山。昭麟有办贼才，初任香山，海氛渐炽，即令绅民于近城要地建台栅以为

守御。十二年夏，贼攻围磨刀炮台急，守弁几不支。报至，时已甲夜，磨刀距县城五六十里，昭麟檄守备李海熊领舟师守芙蓉沙，防贼北入之路。自与都司余时高引兵由陆路驰救，鼓五下，贼不意昭麟猝至，惧。昭麟发炮击之，碎其船二，围遂解。许廷桂者，海上驍将也，率舟师数千人，皆精锐，已而覆歿于芙蓉沙。贼益炽，乘势欲逼窥县城，副将某怯甚，议闭城坚匿，昭麟不可，独出遇贼，及反城已闭，久之而后得入。初，昭麟将出，召绅士慷慨语之曰：“守土官以死，徇分也，寇深矣，昭麟以一身捍之，何敢辞。万一不济，父母之邦，公等幸竭力为一城保。”诸衙吏亦恺切诚勉而后行。行则仅督民丁及渔户而已，未尝得一兵随。台卡即有兵，亦疲不受驱策。而昭麟无惧色，视贼所在，必往击之，贼故畏昭麟能，亦少却。时十四年秋也。冬贼数百艘避风于新安之赤沥角，昭麟侦其实，即请兵于提督孙全谋，并檄缁船、夷船分扼隘口，孙全谋军其西，昭麟军其东，为一举灭贼计。贼乘风张帆西出，孙全谋麾师船避之，昭麟觉，率缁船、夷船追之不及，归则欷歔语绅士曰：“虎狼既纵，不复得矣。摩厉以须，公等慎无怠。”明年，贼受抚，海患纾，昭麟前后筹办者五六年。尝捕贼自澳门归，遇贼于芙蓉沙南，贼以钩竹钩船，几为所得，时新会在籍侍卫陈大英同在舟中，射贼船篷落乃免。今邑人谈往事，犹曰：“非彭父母不畏艰险，则城外咫尺地，即不保也。”后以荐升登州同知，援例以知府用，督抚奏留广东，历署盐运司运同、嘉应州知州。著有《从征》、《过岭南》、《岭南》等诗草。

马德滋，字蔗泉，广西全州人。进士。嘉庆十九年来知县事，有才猷，性尤好士，凡可以嘉惠士林者，若横舍书院，虽形家言，犹冀其万一验，无不竭心力为之。有洪顺章职员，郑龄世仆也，龄死，图反其主，讼龄子职监廷枫于官，不直，则乞当路者为言于巡抚，右之，委候补府某来质其事，且檄校官以廷枫戒饬，德滋不可，刻日同委员集讯县庭，绅民聚观如堵墙。廷枫呈其券信，委员词塞，事得平反，公愤以伸。

冯晋恩，晋南沾益州人。道光二年署县事。清慎明决，坐堂皇听断，民环视者皆帖然服。时提督吴某巡海，有罾船二遁，以为贼击之，炮毙一人，余数十人泅水逃，悉获之。械至省，总督檄县治余党。晋恩遣役迹之，得其情，谒总督白冤状，总督怒谓：“囚乃提军亲俘，令轻信役言，并逮役。”晋恩以去就争，不允；丐南、番两县代诉，亦不允；丐知府言之，总督乃下府及两县鞫，始知泊澳罾船捕鱼有界，越界则巡兵取鱼，甚者倾网攘夺，苛虐之。时适越界，故见兵船走，提军疑其盗也，执之。一府两县据实覆，一如晋恩言，数十人得免骈戮。晋恩治簿书反覆详审，吏有受赇舞文者皆驳斥。奸吏悚伏，谓前尹马德滋好聪察，然犹寄耳目于人。晋恩乃先觉在己，其明睿尤出马上。未几，以忧去。士民讴曰：“金侯冯侯，不得久留，盖惜之也。金名锡鬯，浙之桐乡人。先晋恩为令，有善政，亦不久于任。”

邱才颖，字翼庐。福建光泽县人。道光戊子举人，挑发广东。十七年到粤，历署诸任。咸丰四年二月调香山。甫五月，红贼起，才颖召绅士设公局，修守备。小榄陷

，集富户筹军费，延董事者食于公；遇有警，自蚤至暮坐局区处；董事有晏起者，至家趣之；乡民告警者，皆亲见拊循之。武举某素凶狡，众疑与贼通。才颖仍使之从事羁縻而伺察之。港口之败，北门人咎董事者哄于局，张溪人亦咎督战者哄于乡。几内变，才颖悉为之解释。上闻之役，每战胜，乡勇争功，才颖皆许以功，首胜必厚赏，语诸绅曰：‘某生平自奉皆俭嗇，惟此事弗敢吝。人不获重赏，谁肯尽死力者？城破锱铢皆贼有，与其资敌，曷若与战士乎？且战士攫锋鏑，蹈死亡，赏不及，曷以劝？’闻者皆感奋，故所向辄克。贼以红帕裹头，民之资生于海，或伪藏红布，示贼为信，否则死；故搜获红布解官者，审非真盗，有父老为请命，立释之。士民捐貲，听自出纳，才颖惟综其成，军需或匱，辄倾所有济之，弗偿弗计也。五年冬，省局征输；六年冬，夷人骚扰；皆筹供亿，策战守，使者晨相望，羽书夜催，在任七年，刻无暇晷。惟六年孟春生辰，百姓演剧称祝，乃欢宴三日焉。咸丰六年，总督叶名琛、巡抚柏贵上其绩，奏升府同，知直隶州知州，赏戴花翎，再以捐输加知府銜。十年秋九月去官，祖饯之日，士民遮道。同治三年卒于粤。才颖躯干修伟丰下，声音浏亮，英酋吧夏礼来见，谓游粤见诸地方官，仪表无若香山县尹者，宜其福及一邑云。以上知县。

丁观国，宛平人。副贡生。乾隆五十九年署丞事。先是有闽匪屯聚望夏村为居民害，又时掳行人勒赎，莫敢谁何。观国廉其实，请诸县捕之，匪皆能斗且众，捕役不敢前。观国手铁筒先进，村民助之，执其首恶若干人，置诸法；余俱逐回闽，民赖以安。既去官，民尸祝之。以上县丞。

葛高翀，字子中，安徽怀宁县人。附监生。道光三十年任县典史，咸丰四年代理县丞。居官清正，于地方利弊兴除尤力。时红匪扰乱，高翀亲履诸乡，劝义民捐饷十余万，人心始固。富室某欲免捐，夜奉百金为寿，高翀谕以急公赴义却之。豪绅某于当道领鱼虾行秤一柄，欲藉以抽收，合行鼓噪，罢市三日。时邑令以事赴省，高翀恳绅士谕止之，为达上官缴秤，众始帖然。邑中棺木店因关税，久繫木船，棺价腾涌，贫民有藁葬者。高翀为请于大府，得免税。其留心民瘼类如此。同治二年，邑令陆钟江病歿，高翀权理县事，羈押盗犯有以三百金求乘间释者，高翀拒不纳，稽察愈严。钱粮税羡项内，可得千金，高翀悉归陆家属，分毫无所染。巡抚郭嵩焘廉其贤，大加奖励。三年调署南海五斗口司巡检，旋复县典史任，大府举卓异。七年卒于官。其子护柩回里，居民焚香跪送，不绝于道。以上典史。

石娥啸，字铁霁，兴宁人。康熙四十六年，以举人任教谕。闻邑明经、萧立有卫伯玉风，造其庐；又谒黄泰泉祠，购其文以志景仰。为文奇宕古峭，课士之暇，集博雅者校讎古籍，讲明而切究之。戊子应粤西聘，分校乡闈，所拔皆知名士。首议兴修莲峰学宫，卒底于成。凡有关风化者，亟撰文以表彰之。在任十年，致仕。以上教谕。

沈大耀，顺天大兴人。乾隆五十九年任淇澳司巡检。廉而慈，时有叔与侄争水而殴

伤其侄者，其侄讼之，大耀谕之曰：“此微伤也，且以叔毆侄当忍受，何必讼？”其侄感悟而去。故，事官市肉率半价，大耀必依民价给之。后卒于任，篋空如洗，民争赙赠，丧乃得归。

刘省三，字榕庵，河南祥符县人。咸丰四年夏四月，任淇澳司巡检。性质直，寡嗜欲，娴技勇。贼起，团练自以其技教乡兵；闻寇警辄率士卒赴敌，不避艰险。邱才颖资之以守城，事平，奖叙六品顶戴、蓝翎。七年去官。九年复任。同治三年去，旋卒于粤。以上巡检。

白色先，镶白旗人。康熙十四年，任香山协镇。勤于训练。次年五月朔，抚贼陈器瑜纠集海寇钟吉生辈，聚众数百围邑城。色先偕县尹申良翰，竭力经营，诸守具纤悉毕周。已而，贼毁东南关厢，破张 澳寨，飞炮越城，人无固志。色先以大义励兵民，为死守计。日则巡逻，夜悬松光，遍照濠外，号令严明，士卒振奋，贼不能破。复遣人由间道赴省垣请援。十一日，师集，寇遁去，城赖以完。祀名宦。

洪名香，南澳人。道光二十四年，以香山协镇、右营都司护理本镇副将事。冬，三合会匪猖獗，知县陆孙鼎听王炳元、汪政言不为备，贼肆扰。名香飭营属捕之，四城始稍靖。贼目刘照辉等寇濠头、张家边诸乡，乡人败之，获贼陈乾生、雷勤等，沉之海。贼使妇女以械斗毙命诬控，窜富家于牒内，赖名香亲督营兵擒之，力白其诬于县，富家乃免。遇警报，商机密，虽大风雪夜，亦至郑廷棣家，延诸绅士议。事平迁海门营参将，再署香山协副将，仕至广东水师提督。咸丰四年，红匪之乱，绅士赴虎门请援，名香发大炮资捍御焉。五年卒于官。

曾长龄，新安人。世袭云骑尉。同治五年，署香山协镇左营守备。故，事藩库支饷，皆以纹银，既领之后，换洋银给诸兵，纹价高换洋银，恒溢其数，向为领饷者所得。长龄曰：“军兴以来，藩库耗竭，不时给，兵饷常不继，且从征治装多摊垫，兵艰苦极矣。武官虽贫，亦不争此百十数。”盍以其盈余还诸兵。告同官，皆感其义，从之。六年减民间粮米银价，众因欲减兵米，长龄不可，与同官白粮道檄止之。七年去官，兵士奔走沿途拜送，制伞盖赠行，书三营兵姓名于其上，志弗谖焉。以上协镇。

香山县乡土志三

兵事录

宋末二王之播迁元代诸寇郑荣叟附明附明代诸寇

国朝诸寇张保之乱三合会匪之乱红巾贼之乱

英人入犯澳门交涉附国初移界事附

宋末二王之播迁

宋端宗景炎二年十月元世祖至元十四年，帝自潮州之浅湾航海过邑境，邑人马南宝献粟千石饷军。赵若举召募潮居里今黄梁都民数百勤王。十一月，丞相陈宜中、少傅兼枢密副使张世杰、殿前指挥使苏刘义奉帝幸沙涌，暂宫于马南宝家。居数日，元兵陷广州。元军至次仙澳即井澳，战得利，寻望南去，止碇洲今新安县，属大奚山。元哈喇歹及宣抚梁雄飞、招讨王天禄等败世杰于香山岛，夺去战舰符印，俘官吏卢茂等。丞相陈宜中众尚数千人，舟八百艘，走至虎头山，大风坏舟，众多溺死，宜中仅以身免。十二月丙子，帝至井澳，飓风坏舟，溺水几死，遂得惊疾。旬余，诸兵士稍集，死者过半。刘深袭井澳，张世杰战却之。帝迁于谢女峡。丁丑，刘深追帝至七洲洋《崖山志》作七星洋，大战洋中，夺船二百艘，帝舅、提举官余廷洼被执，以为帝也，遂去，帝舟得脱。邑人陈勇于降于元。初，有陈媪者，据南蕉山，率众为乱，因名其子曰勇士，降后以为县尹。

三年正月，帝在谢女峡。二月，帝舟还广州，寻次于碇洲。四月，殂于碇洲。庚午，卫王昺，即位于碇洲。五月朔，改元祥兴。六月，帝走崖山，以观文殿大学士曾渊子充山陵使，奉梓宫还，殡马南宝家。南宝欲赴崖山，以病阻，潮居里民多应募从军者。是月，文天祥至船澳即仙澳，请入觐，不许。十一月，天祥往屯潮阳，闰十一月，张宏范袭执之。

祥兴二年正月十二日，张宏范携文天祥过零丁洋。沙冈今黄梁都义民殷达辅饷军三日。未几，元军自潮阳港趋广海，十三日由邑之水风石海在虎山村前，袭崖门。二月六日，帝赴海崩。帖木儿不花加都元帅，追张世杰于香山岛，世杰死，降其众数千人。

元至元二十二年四月，诏追捕帝昺及陈宜中。初，昺尸不获，诸起兵皆谓祥兴帝实在占城，陈丞相护之。马南宝起兵井澳，与招讨使黎德、梁起莘往迎车驾，起莘降，江西行省也的迷失会兵邀击，败德于海上，斩之。南宝被执，不屈死。

元代诸寇郑荣叟附明附

至元二十年三月，盐户陈良臣等兵起，都转盐运使合刺普华讨平之。初，江南宣慰使合刺普华未至官，改广东都转盐运使兼领诸蕃市舶。时盗梗盐法，陈良臣煽东莞、香山负贩徒为乱，江西行省令与招讨使答失蛮计捕斩之，招诱余党复业。

泰定元年，海寇黎静海作乱，宣慰使印云谷令邑人杨仲玉以五百人破之。详杨绍孙传。

至正六年秋，季童入寇海上，知县张执乐温奉檄平之。

二十一年，县人李祖二聚众攻掠县治，宣差托啰克台不能御，邑莲塘人郑荣叟等徙治于邑之古寨山即莲峰，筑垒凿堑，奉托啰克台同守。未几，托啰克台死于寨。继而南海龙潭寇卢实善率众至，攻寨弗克。详耆旧录郑荣叟传。

明洪武元年，征南将军廖永忠帅师入广州，郑荣叟奉籍归附。

明代诸寇

洪武十九年，东莞、香山等县民作乱，广州左卫花茂讨平之。二十二年，花茂击南海、香山、黄连等寨。

二十四年五月，茂剿平香山等县徭贼、蛮贼、及倭贼，升都指挥同知。因上言：东莞、香山等县逋逃蛮户，附居海岛，殊难管辖，请徙其人为兵。又奏：添设沿海依山碣石、神电等二十四卫所城池，收集海民，置军守御，仍于要害山口、海口，拨军屯守。诏皆从之。

二十六年，茂平三灶贼，三灶山抵海洋蕃国，有田三百余顷，极膏腴，在宋为黄字上、下二围，元时海寇刘进据之。洪武初，属黄梁，籍居民吴进添通蕃为乱，茂奏讨平之，悉迁其余党，诏虚其地，除豁田税，永不许耕，岁令官军千人防守。二十九年，又徙其民为兵。

二十八年，大横琴山寇平。初，元末海寇王一据之，至是平，诏虚其地。

正统十四年，南海贼黄萧养作乱，黄梁都贼林帝佑附之，大榄都、龙眼都民多被诱胁。旋攻城邑，乱民附之，四境奔溃，指挥林兴妻苏氏，邑人，率军妇被甲缘城拒守，城赖安。次年，都督同知董兴讨萧养，诛之，余党平。大榄盗李某，巢党也，伪封千户，来攻城邑，城门闭者三月。民有菜色，邑人黄泗为粥以饲之。子女有流离者，出金赎之。

天顺二年三月，海贼四百余犯香山千户所，烧毁备边大船。备倭都指挥张通坐失机，上令杀贼赎罪。七月，海贼严启盛来犯。先是启盛坐死，囚漳州府，越狱聚徒，下海为盗，敌杀官军。至广东，招引蕃舶，驾至邑沙尾外洋。巡抚右佥都御史叶盛廉其害，会同镇守左少监阮能、巡按御史吕益，命官军驾大船冲之，生擒启盛，余党悉平。十二月，以获海贼故，升张通一级。

正德十二年，寇掠乌石，孝子容师偃代父死。详明史孝义传。顺德香山诸村昼夜盗，僉事王大用令自别所业，长正互觉，游手横暴者，即绳之。搜获真盗，三千有奇。

嘉靖元年，新会盗起，引倭寇，黄梁都沿海民多遭杀掠。十年始平之。

三十三年，古镇土贼，囚其百户尚琼。署新会县汪应奎，阴令百户以计斩首恶二十八人，从乱者稍息。时新会贼陈文伯，煽饥民为乱，拥众海上也。

嘉靖末，黄梁都土寇结倭寇为乱，祸甚惨。万历间乃定。

嘉靖末，蕃寇疑即倭寇大举，聚百十艘，将攻邑城，知县陈揖运筹坚守，雉堞皆置兵，鸣桴往来不绝，贼莫测多少，薄暮，揖率文学龙纳言数人，躬自巡督，每堞必悬三灯，时复出奇发炮，晔晔若震电，贼皆喙息，窥伺旬余，遂引去。

隆庆六年，流寇许进美劫掠古镇。

万历八年，老安山贼肆劫海防，同知周希尹遣兵平之。先是嘉靖己巳，贼据老安山，为害海道，林懋举令备倭指挥孙敖征之，遁去后复聚，劫掠船只。至是希尹遣兵破其穴而还。

崇祯七年六月，闽寇刘香掠广东。十五日，从虎跳门入掠新会、江门。二十日，出崖门掠黄梁都。

十五年正月，小榄寇起，乡兵解贼赴县，要而戮诸海。于是血饮入市，捧刀列戟而前，呼火传兵相属，愚民多应之。何吾驺告急，知县顾其言集兵迅下，平之。

国朝诸寇张保、三合会、红巾贼诸乱，以事多另纪。

顺治二年十一月十四日，白旗贼黄信、林能船数十艘，劫海洲。

三年，社贼起。以奴胁主，结社倡乱，谓之社贼，亦谓之仆贼。始自顺德冲鹤堡，延及诸县邑诸村，所在多有。古镇以冯春隆、冯大伦为首，海洲以刘綦廉为首。是

年，攻海洲。明年驾船寇外洋。五月，贼船三百余艘掠石岐。六月复掠西门外。按：《新会县志》称社贼之起皆杀逐其主，据其田庐，甚者掳妻子，掘坟墓，连兵不解几二十年云。

四年正月，蕉园外海四姓贼船千余艘，谋劫县。知县刘起凤督兵却之。掠西门外及圆山仔、长洲而去。

九年二月，官兵讨冯春隆、冯大伦，余党复寇海洲，乡人力战御之。十一月，饥贼梁子直为乱，以催科迫故也。城陷，知县张令宪死焉。平南王蕃下总兵吴进功，偕副将曹得仁往讨之。十二日师抵石岐，监军道刘尹宽请急攻，进功曰：“子直亡赖徒耳，民非甘心从逆，为其胁逼而已，招之即来降也。”得仁请往谕之，子直闭城不纳，得仁怒，将攻之。进功曰：“彼拒我者，怯我也。”密令典史陈忠潜从水关入，开导耆民。十五日，士民缚子直及其党百七十人以献，斩于市。按：子直乱事，邑志未详载，兹从近人樊封续南海《百咏注》补辑：邑志作十一月事，此作十月事耳。

十二年七月，海洲贼刘綦廉复申社盟。时乡人袁文焕官雷协水师右营，分防新会北街，领哨船回诘，香山司巡检施其信亦来责问。里甲以贼势悍，姑听盟而揭于县。未几，诛綦廉，党亦散。

康熙五年，海贼袭翠微，乡人韦元懿御之。元懿事详耆旧录。

七年，迁民结党为乱。详后迁界事。秋，海贼从前山寨右登岸，攻劫果福园村。先是康熙三年前山寨设副将衙门，增置左右营，员官兵二千名。至是副将以海贼充斥，请移驻县城，留左营都司及千总守寨，建土城，分把总哨戍关闸，坐令扼寨之地，武备损威云。

十五年五月朔，抚贼陈器瑜率海寇攻邑城。知县申良翰、副将白色先御之。十二日，援兵至，贼始遁。

十六年七月，海寇钟吉生夜劫翠微村，把总郑九琨死之。九琨事详耆旧录。

十八年十月，海寇突至石岐，焚劫汛哨。

十九年三月，贼谢昌寇海洲。初，十五年吴三桂令伪将马雄等攻新会，平蕃遣标员谢厥扶等以舟师御之。厥扶阴自纳款，平蕃子尚之信以被废不得志，矫父命与贼连和，逾年之信归正，厥扶抗兵不从，高州叛总兵祖泽清杀之以赎罪，其子昌，与其下李积凤，挟残党走海陵，流劫沿海村落。至是来寇海洲，掳男妇百余人，官兵追剿至海陵，获所掳归之。八月，又寇海洲，乡人乃塹而守焉。

雍正间，外贼王扁啸聚黄杨山。乾隆初，捕诛之。

乾隆五十三年，海贼平波大王率众为寇，知县彭翥请于制府福康安，给精兵二百讨平之。

嘉庆五年，海寇至浪白，入桅甲门，总兵黄标督舟师追获甚众，外洋稍靖。

七年，惠州会匪乱，延及广州。邑四大两都、隆都、古镇，所在皆有，而黄梁都尤甚。巡抚瑚图礼欲夷之，知县许乃来设法擒其魁党，遂散。是役也，新会兵乘机肆掠，指民为盗，守备曹某虐尤甚，许乃来鞠得实，尽释之。详政绩录。

八年春，会匪余孽遁外洋，游掠大小虎、浪白诸处。会清明醉失曙，复大雾不见人，署提督魏大斌帅师骤至，击杀殆尽，余党凫水走文楼山，虎山人素受其害，闻炮声，截搜五十余人。九年秋，海寇劫白蕉，村人力拒之。

二十年七月，盗潜夺副将罗凤山巡海船。时罗凤山巡哨回船泊港口外，暂归署，令把总黄登守之，夜有盗袭之遁，假名号掠海上，徐闻官军获之。

二十五年，署县宋如楠捕打单贼。时港口、象角、小榄等处所在皆有，大府檄严办，遂大捕之，狱满不能容。编栅于仪门外为监房，凶焰稍息。

道光七年，土匪黄秉云、蔡二、方四等扰西乡，劫龙聚环刘朝傅家。朝傅募勇却之，复与刘展鹦黄凤起等白之官，亩捐设局，屯勇堵御。已而，外寇结连土匪大扰，武举胡雄泰率乡勇追至鹤山、新会，攻其巢穴，擒其魁，党遂散。

咸丰三年，南村贼伍时洛啸聚抗官兵，杨大登、刘升庸领屯勇助官捕之，贼轰炮击勇。升庸率勇冒锋鏖进，贼乃溃。复以大义激之，并力擒时洛。

五年五月初五日，艇匪李亚快等在澳门等处肆掠，提督吴元猷于十八日统带舟师出洋，跟踪追剿，迭次兜围，轰毙无算。

七年十月初十夜，海寇袭藜村，潜以小艇火其哨船，战不利，勇目欧阳可均、哨勇欧阳可梅、王容简被戕。

八年，三月初七日，海寇复袭藜村，哨船哨勇冼协明、许彩辉战歿。

十年八月初四夜，新安土匪扰下伽、灰炉两涌，沿海蛋民被掠者五十余家。九月初三夜，由下伽涌欲窥内地，为巡防船所阻，乃肆劫诸船，燃枪炮轰击船勇。阮根祥、勇目彭仲伦等被戕。同治元年，乡人稟官立义勇祠下伽台下，祀之。

九年七月，知县徐宝符、副将罗福安、参将郑耀祥，奉督抚礼，会同新会新安营县兵剿大淋贼。十六日，都司何飞熊击贼于妈阁海外，轰沉贼船二，获贼一；追至大淋、平塘等处，获贼二，夺贼船炮械无算。二十一日，郑耀祥、何飞熊回攻大淋，督兵分东、西两路登岸，贼众迎拒，兵勇奋击，获贼数十，余泅水逃。二十一日，督勇登大淋岛，焚其草舍。八月，三灶海外获贼邓安山等十余人。

十一年，九月三十日，三灶海贼聚深井后山高岩，都司何飞熊会同新会营兵、守备黄祥，率营兵捕之，获麾旗贼首一。贼败走，追至望天台山，贼伏炮丛树间，毙外委马龙安，及兵曾亮升数人，后队兵进夹击，破其巢，出被掳男妇十余人，幼孩二人，余贼多遁。

张保之乱

嘉庆十年，海寇始拦入内地。初，海寇张保、郑石氏、郭婆带、乌石二、东海八等，皆啸聚外洋，商船往来，皆有号税，未敢直窥村落也。至是，党类渐盛，邑东则龙穴、蕉门、大沙尾，西则叠石海，南则三门、竹洲、平山、磨刀等处，皆其停泊之所。内地奸民，接济既便，地方官欲筹剿办，又以动多阻碍为辞，是以势愈臬张。六月丙寅夜，焚劫港口。八月壬寅夜，郭婆带率船三百余，由独子洋入攻大黄圃，乡人力战御之。明日，弃大船三遁，复掠港口。知县彭昭麟令绅士立炮台水栅。

十一年十一月，海寇复至港口，官兵及缙船击退之。缙船事详下。

十二年夏，海寇攻虎山沥涌等乡，乡人御之，互杀伤，不遭掠。四月，知县彭昭麟令邑城绅士募缙船防御，禁谷米出口接济。六月丁丑夜，贼船百余围磨刀炮台，守台把总遣兵告急。时右营守备李海熊，领左翼镇师船十六艘到县，彭昭麟令守芙蓉沙口，即乘夜与署都司余时高领兵由小道驰往，五更抵磨刀，发炮击之。神湾闻号令，亦对岸夹击，碎船二，稍却。李海熊复自芙蓉沙上流直逼，贼遂窜，多落水死者。

十三年，知县彭昭麟奉檄督舟师，在老安山一带堵截闽逆蔡牵。初，蔡牵遁越南，至是潜回。七月庚午，海寇二十余艘复至港口，官兵缙船击退。八月丁未，海寇攻小隐港，乡人御之，殪其二贼，乃退。

十四年，二月乙卯，海寇复围磨刀炮台。都司余时高拔兵防下闸炮台，恐震县城也。庚申，贼伪为渔船，潜入内地，嗣后贼氛日甚。总督百龄初莅任，即驰檄封海港，禁商舶往来，贼无所得食，冒死冲突，常三四百艘，分掠村庄。横档村御贼死者谭霭珍、邓焕章等六十六人。时官兵未集，防御尚疏，贼遂敢深入矣。六月辛卯夜，左翼镇总兵许廷桂遇贼于桅夹门，时舟师六十艘，皆最精锐者，与战，风不利贼，乘势轰击，追抵芙蓉沙，河小舟大，拥不进，且多倚岸，兵无斗志，弃船走，许

廷桂被杀，逃兵至石岐夺食。是日，贼连劫第一角、寮后等村，村人击退之，仍屯大涌村前，声言劫石岐。十二夜，乘潮至濠涌，乡人御之，炮毙贼十余人，稍退，屯茶园山下。乡人复移炮毙数人而乡人无一伤者。翼日，知县彭昭麟檄官兵及罢船与乡人水陆夹攻，自辰至申，贼披靡去。越三日，有谍贼试水于濠涌甲洲，获之，询其情，云欲再举窥县城也。由是益戒严，筑永固炮台，树水栅于濠涌，贼亦不复至。甲寅夜，郭婆带率船百余艘围小榄，泊第九嘴；戊午，乡人战却之，乡民萧世泰等七人遇害，贼亦多死者。七月壬申，海寇劫蕉门，蕉门濒大海，地僻民少。初，横植笏竹以杂石缭短垣，贼弗敢入，后渐伐竹毁垣，至是贼乘虚捣之。黄角人分二路驰救，贼遁。越二日，获一艘于东涌，则接济者，其人凫水逃，歼诸海。知县彭昭麟旋请建炮台于蕉门，号曰得胜门。九月乙亥，张保率船三百余艘攻大黄圃东南，知县彭昭麟拔缙船十四护西北。癸未，贼以红旗由鹅头山逾尖峰岭而下，以黑旗由西北河田进，乡人击之，贼多死伤，忽风转潮上，缙船不能抵，贼夺船破栅，时淇澳司张永津奉檄守御，仅以身免。乡人既首尾受敌，退隘坚守，沿海墟场，焚劫殆尽，武举何定鳌等四十八人遇害。十一月，贼张保避风于大屿山赤沥角，赤沥角惟东西通海，可截而歼也。知县彭昭麟侦知之，令渔户陈敬裕等以缙船截其东口，檄蕃舶三助之，时贼别队方攻劫他处，闻急回救，彭昭麟复驰请提督孙全谋，移师截其西口，贼数百艘尽困港中。未几，东南风作，彭昭麟请沉二巨舰阻贼西遁之路，孙全谋坚不从；又请以火攻，从之。彭昭麟贻书邑绅士，犹以为节制既定，贼可一举尽也，邑人皆额手相庆。然火船小而少，贼拒以木，不得近。彭昭麟以事多掣肘，虑其终变，驰请总督百龄视师。是夜，贼冒死乘风西出，孙全谋麾师船长列一字避之，贼遁去，蕃舶缙船追之不及，翼朝百龄至，则无济矣。闻者谓孙全谋前纵寇于广州湾，而倾黄标，后失机于赤沥角，而违彭昭麟，粤东之祸，孙全谋酿之。旋下于狱，黜其官，自是始有招抚之议。邑人职员林应元、黄萃业、新会监生陈文，与渔户陈敬裕、周朝尚、卢高发、黄意恒、陈遇珍、郑高秀等，请总督百龄给大船三十，领壮勇三千为前锋，百龄许之。初，陈敬裕等以缙船七十分三队捕盗外洋，林应元等画方略，筹资斧，知县彭昭麟奖之。自嘉庆十五年以来，所向有功，阵亡者惟十九人，而杀获无算，较舟师尤得力。十三年，大府给陈敬裕、卢高发二人顶戴。是年，许廷桂失利，寇益横肆，知县彭昭麟给口粮，令分赴险隘堵御。及赤沥角无功，益愤激愿效命，故有是请。百龄给周朝尚、黄意恒、陈遇珍四人顶戴。张保寇潭洲，乡人梁源开与南村杨琼昭、上村孔槐炽率众同心击贼，乡免于难。潭洲千总潘鸿昭上其事，总督那彦成榜源开门曰：义洽粉榆。十二月，贼郭学显归正，授把总銜。

十五年，二月辛卯，海寇攻长沙埔，村人奋击之，杀贼十余人，贼知不能入，焚沿海民居六十二户而去。郑宏德等九人遇害。四月，贼张保、郑石氏、萧鸡烂等归正。总督百龄亲莅香山抚之。是时，张保等久居洋面，人众艰食，卤潮蚀船，不能修葺，因有归顺志。地方大吏，以兵力不能制，亦遣官谕之，而未信也。湖南人周飞熊者，流寓澳门，与保有旧，请于制府，奉檄往说，保等意决，约会舟邑城南大涌村前面，制府为信，许之。百龄至香山，驻节丰山书院，司道官及委员至大涌，勒

兵其北，贼数百艘泊其南，张保及郑石氏乘轻舟竖招安旗抵石岐，入见百龄。是夕，百龄传令官军戒严。越日抚议定，众头目冠带见司道官于舟中。百龄令籍其船及炮没官。贼党给凭费归里，或安插耕作，所掠妇女，戚属领回。张保授千总衔。郑石氏、故郑一妻，保其义子也，令室之。余多授官者。即檄张保领兵捕余寇。保诱擒麦有金于儋州，以功擢守备。百龄令知县彭昭麟筑台大涌海旁，额以大德曰生，记其事于上。未几，张保擢顺德营都司，百姓怨之，保不自安，百龄乃改调别营，后官至澎湖协。

樊封《南海百咏诗》注云：嘉庆乙丑，粤东大祲，盗船屡出为患，内犯省河。时百龄督粤，思有以解散之，十四年十月，有白旗帮盗首郭学显来归，厚抚之；而红旗帮张保、黑旗帮麦有金纵横海面如故。龄募有力略者往规贼，有蜀人周飞熊，花东苑者应募。二人往来海上几半载，始得见张保，陈说万端，而郑一嫂始决计降，约总督于芙蓉沙会面。十五年三月九日，龄单舸出海，保列战艘三百帆于海口以示威。龄谈笑自若，与臬使温承志、粮道苏尔赓，竟登贼舟。保与一嫂泥首丐命，龄掖之起，亲解端罩以衣之，出翠加其指。保大悦过望，择四月三日来降。龄预结行帐于大涌，贼船大小四百七十余号，泊于天王桥东，绵亘十余里，保献太平饷四十万、械三万余器、战船全数、难民千六百名。翌日，龄率保等还省，腾章代之请罪，奉旨难民张保姑免罪，赏加守备衔，董率舟师，速赴高州，收捕黑旗帮盗首麦有金等赎罪。是年十一月，提督童镇升等率保众大破黑旗于泮州，生擒巨憨而戮之，广东诸盗悉平。按此与邑志详略互异，今并录之以备编书者查考。

三合会匪之乱

道光十二年，四大都三合会萌蘖，煽诱左步头村二百余人，岁贡阮森荣议禁之，群匪反喧呶。森荣乃密谋诸父老，联合保甲，西江尾、龙穴头村匪附从行劫，森荣率众擒其魁十二人，白官通详大府，檄行严捕稍戢。按《祝志》载：嘉庆十二年，邑横门、蕉门、大黄圃、潭洲、黄角有三合会匪，勒各鸭埠基围挂号银，以李乃文等为首，大府檄捕之，会匪猖獗始此。

二十二年，三合会再起，始事者石门甘秀，踞老巢啸聚，至于劫掠拒捕者，则隆都高明远、周配据也。初起时撰妖书造隐语，传教者曰亚妈，引入会者曰舅父，又曰先生，曰升上，主文字者曰白纸扇，奔走者曰草鞋，各头目曰红棍，拜会曰登坛，演戏入会者曰出世。每拜会，亚妈裹红帻，服白衣。设五色旗，上书彪寿、合和、同字，分布五方，从某方来者，隶某旗。设三重门，每门二人，持刀作八字形，拜会者匍匐入，自称曰仔。赤身披发，跪伏拜斗，念三十六咒，割指血盟，受隐语、三角符，符内写“参天宏化”四字。发辫系两线，辫结一圈。头目曰天牌圈，正额；司事曰地牌，圈脑后；先入会者曰人牌，圈左耳；后入会者曰和牌，圈右耳。俱身披短袄彩带，蓝锐屣露刃。彼此相遇，问姓各以洪对，或称三八二十一，便知是会中人。每入会，科洋银一，铜钱三百六十，曰祝寿钱。不识其隐语暗号者，即被

掠。二十三年正月，甘秀之党，崖口谭仁阶，泮沙许蔼佐，南萌程建，新会梁雄、谭红等，于山门葫芦地、上栅太保庙、官塘北山、澳门潭仔、湾仔等处，先后拜会，劫黄泥塘、大迳山。秋七月，汪洪戴香来自新会，主于高明远家。明远故盗魁，周配据尤险狠，颇通文墨，设伪文武都督、将军、元帅、军师名号，在卓旗山举事，蔓延于三角塘、中心村、库涌、鳌溪朗、九曲林一带，附城之愚顽者，靡然从之，泥墩、沙冈尤甚，兵役亦多入其会。

二十四年冬，会匪攻濠头、张家边，乡人格杀之。邑城戒严，讹言四起，典史王炳元、吏目汪政语知县陆孙鼎，以为岁暮常事，获会匪黄孔怀等，悉宽贷，且张示抚尉。群匪郑松等，连劫城南徐、李、刘等家，右营捕获之，汪政仅以荷校，徇舆论沸腾，始系之狱。匪恃官之蒙蔽也，使妇女以斗杀为词，窜富家者名于牒中，署副将洪名香，督兵捕之，稍敛戢。而余太平刘斗之徒，又起蔓延榄都、西海十八沙，贼船如织，绅士控于大府，总督耆英、巡抚程裔采檄知县丁沅樟、知府倪澧先后至。十二月二十夜，贼扰东门外，城中哗达旦。丁、倪归，犹讳其事，督抚严责，陆孙鼎始惧。小榄司巡检返自城，中途被掳，驻防小榄千总潘庆救出之。捕贼首欧阳从宽等八十余人。

二十七年，夏四月，榄匪张斗聚万余人，设伪官职，屯营于下基、安塘等处，潘庆佯与张斗善，觊知其情，约五月初八日举事，驰告县协帅，师至会兵，获张斗等诛之，榄属平。周配据时已就擒。龙眼里人刘光瑤以御夷功，受六品顶翎，素剽悍、与高明远埒不相中，欲擒之以邀赏。明远为族人斫伤足，出入皆八人舁之行，光瑤乃潜伏死士于明远所住豪兔村中，夜举火，揭官军旗号，明远骇愕，伏者陡出，舁之奔，遂献于县。陆孙鼎以明远解省，置之法。续获其子高世隆、孙高解戮之，乱乃定。说者谓陆孙鼎养痍貽患，卒能急捕严办，荡除寇氛，其功正不可没云。

红巾贼之乱

咸丰四年，夏五月辛亥，会匪何六纠集石龙市佣，起事于东莞，邻邑土匪应之，乡堡以次沦陷，从逆者裹红巾，服戏班衣冠，竖红旗，造洪顺堂、洪义堂印，点画多用三字，隐藏三合会。默记名曰：转旗。设将军、元帅、军师、先锋伪号，名其党曰洪兵，官兵麾帜用白，贼遂名曰白兵。知县邱才颖于贼之初起也，谕修港口、上闸、濠涌、叠石炮台。嗣以寇氛日逼，设公局于崇义祠，举绅士何赞清、李鸾宜、刘元贞、黄栋梁等，捐军需，募水陆壮勇，购器械，并谕城乡各设练局，分防水陆。戢船头目周秉宽、拖船头目洗琼开，各以其帮船伍曰帮应募至，共五十六号，分派于港口、东濠、象角、濠涌四要隘，以营弁绅士分领之。城乡皆有备。六月，邱才颖遣署守备欧炳钊率缁船十艘，兵千人守小榄，人以守卡有备，归其船，未几而乱作。七月初十日，九江会匪李洪英攻小榄，土匪卢灵飞、黄庚二、朱鬼晚、李大蚤社等，潜约为变，遂踞小榄，胁乡民裹红巾，列营树赤帜。是时龙山、龙江贼踞顺德城，号东义，而榄匪与黄圃会匪黄福等号西义，西北滨海之乡，如潭洲、黄

圃、黄角、曹步、古镇、海洲、以次沦陷于贼。闰七月初六日，东西义贼合攻太平沙，乡勇拒敌，杀贼数十而众寡不敌，烧毁民房数百家，戕数勇，男女越海逃，淹没无数。初九日，攻第六沙，居民奋力战，杀数贼。十二日，贼攻象角，土台燃炮拒敌，炮毁伤数勇，贼夺土台，树红旗于台后之狮山。绅士林德泉、彭时清等闻变，率练勇驰至，杀贼数十，生擒数贼，拔其红旗，贼退屯观音沙，檣如栉比。周秉宽虽应募，而皋澜贼杜旺其假子也，阴与通，怀两端，相持三昼夜，十五日邱才颖与绅士往督战，中途见港口火起，邱才颖先归，手书谕象角领队胡元阶督守船出长海救之。长海湾窄水浅，且贼众我寡，逡巡不敢进港口。蛋匪梁湛联等皆已应贼，港口环海，港四通，贼自羊蹄渚登北岸围基，炮声殷天。又自草塘牛髀渚入分流口，登西台后路，纵火焚台，歼守勇。又自灰炉渚渡太平渚，登东台后路，杀陈星汉，勇溃，即以炮反击，拖戙争道奔，欧炳钊被戕。洗琼开以前后船壅塞，不能施炮，亦败归。邑人震恐，惟才颖与赞清等坐局筹画，拒守不为动。是夜东乡绅士林谦、郑藻如等督援勇驰至，连营于东门外，杨大观等议牵龙凤船横南六海。是夜，胡元阶督率，戙船郭碧城等载沙泥沉之，堵贼进攻之路，并加栅于龙凤船外。时贼踞港口，括场圃钱谷，顿兵大飧，待张溪举火内应乃入。两乡人获奸细萧不知、黄碧、杜杏等，萧实东奔，贼知事泄，不进。十六日，邱才颖誓师上闸墩台，谕以大义，晓以祸福，示以重赏，领队胡元阶、戙勇郭碧城、拖目洗琼开等皆听命。两乡绅士曾就颜等，召员峰、张溪之民鼓励之，黄安邦亦以长洲乡勇至。十七日甲申，朝食师兴。时东南风起，因风纵火，焚南港庐舍，烟焰迷漫，贼炮不能施，洗琼开奋前轰击，诸勇继之，遂大克之。贼遁获大船九，生擒梁林仔等，炮毙水溺者无算。东西两岸，扫荡一空，我军以港口残毁，贼必不再据，亦鉴于前失，不复守。师还驻上闸。十七日夜，贼船百余只潜泊涌口门，窥伺劫掠，适榄边、南荫、下栅墟渡船停海口，炮击之，沉其船九，毙贼三。东乡闻警赴援，贼乃窜。是时黄福黑皮广等夺潭洲港拖船，据大澳沙；杜右据横档，扰东海；陈五据鸡笼、芙蓉等沙，扰西海；林谭保据磨刀、挂碇，扰南海；高老胜亦起于南，邝鳌峰等又起于黄梁都，踞小濠涌，其父结高澜贼杜旺、豆皮盛等为外援，攻斗门土城。黄梁都巡检翟文俊、绅士赵梦梅、黄桂森等络绎告急，而上下闸之外，水路梗塞，购炮铙者皆由陆达于澳，澳夷亦戒严。二十三、二十四日，贼大举，系红旗于南八西岸松树上为疑兵，攻西路之青姜竹仔林村，攻南路之龙眼树涌、沙田、金角环、寮后、曲涌村，沿海焚掠，濠涌墩台守船扼之，不得渡。是夜，二百余船分道寇小隐港，及藜村之下伽涌，二十五、二十七日两攻东利、下伽、灰炉、三涌，滨海村庄悉被焚劫。乡团大集援击，获其探水贼郭进景，贼始退。官绅以东濠在上闸墩台后，炮不能及，且孤僻难守，命堵塞之。至是，贼自东移泊南六，攻上闸，偷挖东濠，又自木鹅迳登岸北门，士民分兵御之。上闸墩台守船轰沉数船，贼窜东海，攻张家边、四门、濠头村，以小艇入各涌焚劫，再挖东濠犁头嘴水栅，各乡民连战，枪炮齐发，贼乃遁。旋攻象角，日夜炮声震天，我炮至五六发不能再燃，贼更番战，我几殆。适郑允仕载三千斤大炮至狮山连击中之。贼逃，再攻金角环、寮后、曲涌村，泊宝鸭石，逼下闸。贼之敢深入也，恃大涌有内应，无后顾之忧。初象角、大涌皆有土人接旗，受贼伪职、召给红旗号，名曰接旗。格于其乡绅士不得逞。又见城局并力拒贼，且

屡胜，乃反正同仇，贼未之知。二十六日，大涌人伏炮于萧家渡，闻濠涌台船炮响，乃自尾夹击之；濠涌乡勇又移炮于台东之松堤，贼不及见，炮发，贼惊，皆逃死。自是不敢复窥南路。西海入县城，必由狮滘而象角，狮山炮台扼之，象角、龙聚环岭后五乡局，又以船载沙石沉于观音沙口，堵其阑入之路；由草塘、横栏诸小滘而入，亦必经长洲乡之大埗头，重紆叠曲乃可至，我迎击则无不中。大埗头有炮台旧址，长洲人修而守之。西路亦不可进，贼乃专意于东北，于是添设土台于上闸炮台之西偏，又添设土垛于溪东，藩以丛树。员峰乡人修故官基，环以堦；张溪乡人加厚土牢，堵东濠。自基边至岐头七乡堡，连团列卡，东路则徙水山卡于伞树墩，南路仍添设炮台于大涌林家渡对岸黄泥潭。再设小土台为犄角，以固门户。濠涌炮台又添设营卡，以防登山袭我之路。自金角环至曲涌，烽烟相望，内守益密，故虽危无恐。八月初一日，守备黄彬、罗福安帅舟师，千总王显，东莞副贡生邓林春帅陆勇，共船七十余只，奉总督檄赴新会解围，沿途击贼，至螞蛇沥、大南海获大船数只，焚小船无数；至小榄沙口，贼要之，黄彬等冲击而过，至南六海会官绅于上闸，顿兵一日，由下海往新会，过石岐，自北迤南十里外，白旗如积雪，人心始安。贼侦知黄彬兵已远去，十二日其游船扑张家边，乡人击却之。十五日，副将刘廷光率头艚拖舢四十余只攻小榄，时飓风甫息，东南风大作。十七日，朝食时，潮已落，牵缆逆流上，贼拒于沙口，炮台伏炮榄面沙，围基潮落已尽，兵船悉陷于淖，贼坌集击我，夺头艚船一，毙水勇数十，货装尽失，刘廷光奔回县城。二十日，顺德容奇乡伪元帅关士彪、杨甲成、杨肥顺、何新、伪先锋关花面添、宝珠九、陈大废率贼数千驾二十余艘，围眉蕉、大伞海，攻劫小黄圃一带，乡人奋力御之，炮毙数十，贼遂溃围。二十七日，署守备黄建勋帅师剿林谭保于仔洲海，杀贼无算。九月初一日，绅士何信韬等统水陆勇船四十，淇澳司巡检刘省三护其军伐，小濠涌邝鳌峰遁，其村人缚献其妻子及伪先锋邝德等，遂解土城之围。

十月初五日，贼攻全禄、石井村。乡人以大炮轰击之，获贼船一，生擒数十。方贼英之初破小榄也，悬伪示、设禁，民颇相安，久之乃肆劫掠。贼英遁回九江，其众互相雄长，民大悔。小榄绅士何瑞丹赴县，筹小榄招讨事宜。十一月初三日，黄圃贼五十余船泊横门，遍榜洪顺堂、洪义堂徵粮伪示于海岸。当时农人渔父莫不十百为团，人自为战。初四日，寇张家边，农人拒而退。初五日黎明，入下伽、灰炉、东利三涌，拔水栅，焚场舍，近乡以次来援，战于尔家环，伤乡勇二人，我亦伤其麾旗贼目。午后贼再入下伽、灰炉，两涌炮声匆匆，移数晷，村民卧旗息鼓，俟其懈，轰炮三，帆落舵折，遂遁。夜漏将尽，贼复登岸，援兵鼓角齐鸣，山谷响应，贼不测我兵多寡，走还黄圃。十二月十八日，寇东乡水洲山，炮台截击之。二十日，贼船百余自百花口至南六，外委湛真伟、湛洪亮以前山营兵赴援，营于牛口山下。曾就颜等督勇目潘胜于上闸土台炮击之，护台之拖舢亦夹击，贼败走。二十一日下东海分三路入张家边村，每路数百人，冒死冲突，乡勇马日仁等奋击败之。贼以小艇渡藕塘滘，乘潮进水洲，炮台又击之，中其大艘，乡之农父樵女荷戈守险，署左营都司杨耀宗及城团绅士督援师至，贼自横门白花海分道去。

五年春正月二十一日，贼大至。自南六东岸登张溪、基边，城南练勇御之。自南六西岸登入至鸭利沙，长洲城内练勇、前山兵御之，贼多中枪死。台船炮齐发，贼左右不能自顾，中其前队及火药大舟，岸勇衔刀泅海缘贼船舵牙上，贼毙勇二人，群勇大集，汹涌而登，短兵杀贼，夺其船，即转舵以炮攻其后，获大船、大炮、盔甲、旗帜、伪印无算，追至港口外，贼以二巨舰横牛脾口，焚之，我军不能逼，贼逃去。痘皮盛见势渐蹙，欲乞降，杜旺不从，遂与黑皮广杀之。杜旺余党大噪，杀黑皮广，高老胜欲降于东乡不果，遂遁去。省城近属，以次芟夷，破东义，复顺德城，黄福等失东义援，皆窜走，生员何上俸等擒贼党何跛寿数人，驰报县，邱才颖使李朝佐解省诛之。黄圃平，西义贼日益孤。二月初九日，绅士何瑞丹、刘汝球率乡勇收复小榄。贼曾社、吴万刚、钟成就反正。初十日，瑞丹集乡众于王中丞祠，令转白旗，贼犹负固，瑞丹怒，拔剑起，众兵手刃，从大呼曰：“领旗来，”遂拔红树白，有贼行劫者获之，瑞丹自斩以殉。汝球复擒贼目朱鬼晚等八人，解县铄毙之，王长庚遁。

三月十六日，贼洪英率船百余，由莺哥汎顺流下，复攻小榄。吴万刚、钟成就实应之，踞炮台。外委李雄刚拒战，练目李潮燃巨炮轰沉贼艘二，毙贼无算，贼退。四月，知县邱才颖、协镇刘廷光率兵至小榄，擒吴万刚、钟成就，置之法。贼党四百余枷毙之，贼悉平。是役也，军需三十余万，战守十越月，而城池获全。官绅兵勇出力者，督抚为保奏奖功有差。

道光十九年正月，查办大臣林则徐到粤。二月初四日，与总督邓廷桢、巡抚怡良坐堂传讯洋商，谕令缴烟，酌请赏犒。而英国最大，诸国皆观望于英，英商又推诿于领事义律。初十日，义律由澳进省，奸商哂欲遁，官知之，困诸公司，行移咨海关监督豫堃，将黄浦各洋商货船封舱，撤洋商馆买办，工人添兵守隘，禁人往来。距五日，伙食将尽，义律惧，稟缴鸦片二万二百八十三箱。林则徐奏请缴烟一箱，赏茶五斤，檄趸船回国。义律请留船在澳装货，不许，义律不受茶，各洋商遂往澳门。七月初八日，林则徐统兵驻香山县城，分兵驻各隘，严断澳门伙食，传谕西洋逐英人。西洋恐，奉檄驱义律 噸并住澳英人五十七家，寄住尖沙嘴货船及潭仔趸船。

二十七日午刻，大鹏参将赖恩爵师船泊九龙山，义律率船五只求买食，突炮火齐发，伤兵一名。赖急发炮击退。已而来船愈众，炮弹雨下，互有所伤，战至戌刻始退。八月初五，守备黄琮烧 哪趸船于潭仔。初七日，义律至澳，托西洋官目递书澳门同知蒋立昂，请罪乞和。十五日，请具结洋船任官搜查，如或带烟，货尽没官，惟抵死不书人即正法四字。

二十年，五月二十二日，九洲洋来兵船二。二十三日，来兵船七、车轮船三，后又

来兵船十，车轮船二，旋插木牌于滩，书汉字说：“内地船只不准出入粤省门口，俟英国通商，再行无阻”。又召商船赴英船贸易。七月二十二日未刻，英国哗等率三板十余、火轮船一，由九洲洋驶至澳门关闸，突然开炮，官兵迎击随遁。易中孚率署澳门同知蒋立昂、香山县丞汤聘三由南而北，署肇庆协副将多隆武、督标副将波启善由北而南，署提标游击阮世贵等在中往来接应，惠昌耀率师驶至青洲，水陆夹击，坏其船桅舵，沉三板数只。英兵堕水者藉藉，彼旋有船来助，香山水师兵罗名赞、曾有良、麦朝彪三人轰炮连毙英兵目一人、兵十余人，英船且战且逃，至戌刻向九洲洋窜去。获炮弹大小二百余。官兵死六人，壮勇死三人，波启善、水师守备陈宏光面目俱伤。署香山县知县吴思树闻英欲犯前山，即带乡勇至前山策应，雇缁船八只堵御内河隘口。林则徐随添设各路兵共八千名，屯澳英船随窜磨刀及伶仃洋。英人志不得逞，谋所以去林则徐者，乃猝往厦门定海，破城池，杀官吏，而林则徐去粤矣。澳门之屯懈，而英复横。知县吴思树、副将惠昌耀奉檄防英，派捐军费，修治城池、炮台、水栅，以绅士分董其役。时太平日久，兵事废弛，惠昌耀勒兵不出，惟取沙数百囊，堆四城门侧，下令洋人入则闭门，壅以沙囊，慎勿战。

二十一年，春二月初六夜，英人攻横档炮台。二十一日黎明，英人驾火船自南路入，破湖洲炮台，殪守勇，随至沙涌炮台，入渡头村淫掠，过野庙，斩其偶像，村人怒与战，雷兆成等十人死之。濠涌守者弃炮台踉跄逃。日将晡，英船至石岐海，居民遮岸望，英人见我众，顶礼摇手，要以无相害。既夕，至张溪口，陷于淖，英人大惧。有董事者家北门周北堡，奔而呼曰：焚其船者赏五百金，生获一洋人者赏百金，献一洋人首级赏十金。其人平日不信于乡间，无应之者。须臾潮长，英人火张溪文阁，出东濠，驾火轮船去。当英船之未去也，西北一带火光烛天，居民惊窜，四城皆闭。思树登城望，惟叹息流涕而已。后知其来也，兵头义律亦在船中，火之可无省城之祸，始不胜痛恨云。

咸丰六年，九月二十三日，英人驾火轮船入南路，至大涌水栅外，武生林国梁等守林家渡炮台，发大炮击之，中其舵尾，旋遁去。十月朔，英法联军破虎门，入省河；十一月十四日，陷省城。

八年九月十二日，英、法军由西海扰全禄、石井村西，乡义勇赴援，县城继之，船乃退。

九年和议成，后四月，英、法两国请于督抚，来香山游十二日。蕃役乘三板至石岐海入城，呈蕃目书。十九日，英、法兵目并驾根拔小火轮船之称八船，进泊老安山下，知县邱才颖馆英人于龙王庙，馆法人于三婆庙，其目登阜峰浮图，又登长洲山绘其形胜。二十一日，巴嘎礼来见邱才颖，行把臂礼，遂去。轮船出宝鸭石，撞击折坏，至澳始庆出险云。

澳門交涉附

明嘉靖十四年，指挥黄庆纳贿，请于上官，移电白互市于濠镜，岁输课二万金。三十二年，蕃舶托言舟触风涛，愿借濠镜地暴诸水渍贡物，海道副使汪柏许之。初仅茭舍，商人牟利者渐运瓴甓榱桷为屋，佛郎机遂得混入，高栋飞甍，栉比相望，闽粤商人趋之若鹜。久之，其来益众，诸国人畏而避之，遂专为所据。至筑室建城，雄踞海畔，若一国然。《祝志》云：澳城之建大率在嘉靖时。

隆庆初，葡萄牙国人抵粤东香山县之濠镜，请隙地建屋，岁纳租银五百两。置臣林富代请，许之。葡人遂立埔头于澳门，是为欧罗巴国通粤东之始。其后西班牙、荷兰接踵东来，佛郎西、英吉利继之。葡萄牙所立小西洋、东南洋埔头，咸被侵夺，仅余澳门一廛，为诸国之逆旅。

按：明初暹罗占城，诸国互市，俱在广州，设市舶司领之。本邑浪白澳，实为互市之场。据《广东新语》。正德初，移于高州之电白县据《明史·外国传》。是时，已有佛郎机入贡，及在省城西怀远驿筑室立寨之事。《明史》称佛郎机入贡在十三年，筑室事见御史何鳌疏。后虽绝不与通，然则欧罗巴国通粤东，实不始隆庆时矣。嘉靖十四年，黄庆议行移电白互市于濠镜。未几，借地暴贡物，佛郎机遂得杂居，筑室建城，雄踞海畔，则借居澳地者，又不始于隆庆时之葡人也。《瀛环志略》以隆庆初，葡萄牙人立埔头于澳门，为欧罗巴国通粤东之始，未审何据？又魏源《海国图志》云：佛郎机曾筑室濠镜，后亦弃去，殆佛郎机去后而葡萄牙人乃来请租欤？按：最近调查，谓澳门在前明时，葡人初入境，号曰马交，又名圣约翰岛，荷兰人次之，日耳曼又次之，其余各国人入中国俱有西洋保家之说，时荷兰人有荷兰园之设，其名尚存。日人有三巴寺之设，其址犹在云。此亦澳门历史之可资参证者。

万历九年，葡人始改濠镜，岁课纳地租五百两。此款自道光二十九年，葡人乘我国多故，始不交纳。

二十六年，八月初五，吕宋径抵濠镜澳住舶，索请开贡，督抚司道谓其越境违例，议逐之。澳蕃亦谨守澳门，不得入。九月移泊虎跳门，言候丈量。十月，又使人言，已至甲子门，舟破趋还，遂就虎跳门结屋群居不去。海道副使章邦翰饬兵焚其聚落。次年九月，始还东洋。或曰：此闽、广商诱之使来也。

自佛郎机市香山，据吕宋，和兰闻而慕之。二十九年，驾大舰，携巨炮，直薄吕宋，吕宋人力拒之。则转薄香山澳，澳中人数诘问，言欲通贡市，不敢为寇。当事难之。税使李道即召其酋入城，游处一月，不敢闻于朝，乃遣还。澳中人虑其登陆，谨防御始引去。

三十四年，佛郎机又于隔水青洲山建寺，高六七丈，閤厂奇闳，知县张大猷请毁其

高墉，不果。明年，番禺举人卢廷龙会试入都，请尽逐澳中诸蕃出浪白外海，还我濠镜故地，当事不能用。蕃人既筑城，聚海外杂蕃，广通贸易，至万余人，吏其土者，皆畏惧莫敢诘。甚有利其宝货，阳禁而阴许之，知县蔡善继甫履任，即条议制澳十则上之。后总督何士晋采其言，下令堕澳城台。蕃人又潜匿倭贼，敌杀官军。四十二年，总督张鸣冈檄蕃人，驱倭出海，张鸣冈因上言倭去而蕃尚存。有谓宜剿除者，有谓宜移之浪白外洋，就船贸易者，顾难轻动，而濠镜在香山内地，官军环海而守，彼日月所需，咸仰于我，一怀异志，我即制其死命。若移之外洋，则巨海茫茫，奸宄安诘？制御安施，似不如申明约束，内不许一奸阑出，外不许一奸阑入，无启衅，无弛防，相安无患之为愈也。部议从之。复奏请就其聚庐大街，中贯四维，备树高栅，榜以畏威、怀德分左右定其门籍，以旅獒明王慎德四译咸宾，无有远迹，毕献方物，服食器用二十字，分东西各十号，使互相维系讥察，毋得容奸，一听约束，皆用海道俞安性之议也。俞安性立禁款五，行县约束澳夷，详奉总督、巡抚，勒石永为遵守。《行县檄》详县志。

天启元年，守臣虑佛郎机终为患，遣监司冯从龙等毁其所筑青洲城，蕃亦不敢拒。时徐如珂署海道副使，澳蕃奔告，红毛将犯香山，请兵请饷，请木石以缮垣墉，如珂昌言于两府，曰：“此澳蕃尝我也。”已而，海警寂然，而澳蕃日筑百丈，如珂遣中军领兵戍澳，谕之曰：“垣墉不毁，澳人力少也，吾助若毁，不两日粪除殆尽。”蕃相视喑曰：“是故为南祠部郎，逐我王丰肃者。”自是稍戒心。

国朝康熙十二年，知县申良翰修莲花茎闸，旁增官厅，以资戍守。

二十四年，开南洋禁，蕃舶来粤，牙行主之：所谓十三行也。皆起楼榭，为夷人居停，所货守舶中，货尽限日出境，惟澳夷无来去期，自与香山县牙行互市，设立旗员防御，一驻大关，一驻澳门，每年请将军衙门选员弹压。

雍正三年，从总督孔毓珣之选定夷船额数，》《田志》云：道光庚寅，夷人火轮船始至广东，厥后诸船俱废，自和议成，后来者既无定额，亦不复编号矣。

八年，澳蕃晏些噏刃杀澳民陈辉，千总督策楞下其事，蕃目执其国法庇之。香山令王之正屡谕屡抗，晏些噏卒伏法。因上言交涉事件，罪在蕃人者，请明定条例，依国法抵偿，依彼法免解禁。诏以所奏，著为令。

乾隆八年，以肇庆府同知改设前山寨海防军民同知，移香山县丞分防澳门，驻望夏村。今尚有左堂街，是其旧址。

九年，吕宋驾兵船泊十字门，总督策楞问布政使托庸，托言英国小而强，吕宋国大而弱，客岁为所败，恐见笑于诸蕃，又不敢直至英吉利国挑战，故扬兵于此，虚张声势耳。第令印知县往骂之便去。策遣印光任往吕宋，即日去。三月，吕宋驾三舶

泊十字门外，时海防同知印光任奉牒，相度建署形势至澳，讯即去年所释红毛俘也，其酋西土古以赍书谢恩为言，而意实伺红毛图雪耻。光任留澳密白大府，许达其书，旋奉檄往谕，吕酋以词之严正也，为之心折。四月八日，扬帆归。光任以诸蕃恃巨舶大炮，然舟大难转，遇沙即胶，触礁立破，内地熟识海道之贪利，出口接引，以致蕃舶出入，漫无讥察，乖控制之，宜具议限制详县志。

十一年六月二十六日，上以福建有西洋人倡行天主教，降敕查禁。时澳门诸蕃寺外别立天主堂，名唐人庙，诱内地民人入教。其传教者，则有林先生、周世廉等十九人为之魁，以张其焰。知县张汝霖密揭督抚捕之，余令自首出教，封唐人庙，禁各县赴澳礼拜。

十二年二月，张汝霖奉督抚檄，委香山司巡检顾麟等封唐人庙，蕃目初奉檄，蕃僧以为事近灭教，忽中变，张汝霖复遣顾麟往谕，随亲临督封，数以初奉终违之罪，蕃人不敢抗，且迎送惟谨。

十三年，四月，民人李廷富、简亚二夜入蕃兵亚吗嘯咬哆呢家毙之，弃其尸。知县张汝霖已得主名，兵头若些庇之，匿不出。大府檄停交易，出居民，若些无如何，乃缚送二犯，当以弃尸而失重罪，准其国法，永戍地满，且声若些罪于小西洋狱上。小西洋亦遣使庇利那勘问兵头若些罪。时汝霖已解任，两府留竟其事，与知县暴煜详筹善后事宜，条议以上庇利那，以为便。十四年七月，督抚檄勒诸石，汉蕃文各一具。十二月，庇利那以槛车送若些反国。

五十二年八月，黑奴饮营地街，醉卧不服蕃官约束，蕃官以肆主之卖酒与黑奴也，反责之，邻肆与辨，遂迁怒，督黑奴拆毁寮铺，殴伤民人，并纵黑奴在望厦村偷窃滋事。货船到澳，不报，地方官往澳弹压，强词不顺。知县彭翥揭督抚，调香山协移驻澳门，又飭广州府张道源到澳封关，禁居民卖饘具食物。蕃众惧，引罪输服，乃复开市贸易。

嘉庆七年春，英吉利来兵船六，泊鸡颈洋，淹留数月，有窥澳门意。两广总督吉庆飭洋商宣谕回国，以是年六月去。去之日，特遣人陈谢谓法兰西侵澳门，故辄举兵来护，他讹言，请勿轻信，意将以掩其迹也。会西洋人索德超等居京师者，言于工部侍郎、管西洋堂大臣苏 额。上闻驰询，吉庆以英吉利开帆日奏，事遂寝。越数年，而有度路利之事。

十三年八月初二日，英吉利人入澳门，欲据之。英吉利贸易以粤东为大，尤重中国茶，向凡货船到粤，洋行定其值，售毕易货归，司事者曰大班，随船来去。乾隆三十年间，洋商负其值，始有在澳压冬者，赁居澳屋，不惜重费。初仅一二人，后接踵而至，遂有二班、三班以及十班之号。并有携家来，不肯归国者。习见澳蕃出洋之船，岁仅输船税二万，货物听彼国抽分，遂觊觎欲为垄断计，久未得间。会佛郎

西与英吉利构兵，遣人告西洋王母与英吉利通，英吉利闻之先遣兵胁西洋王，随迁美加利洲。大班拉弗侦知其事，致书伊国 咖喇之总管，遣兵头度路利来澳，巡船三。故事英吉利护货兵船例泊十字门外，其年货船未至，即给言护货，度路利扬言英吉利与西洋世好，虑佛兰西入澳滋扰，因以兵力来助，其实英夷败于安南，覆其七艘，故以余艘抵粤，驻粤大班喇佛乃唆令占澳门，为补牢计。澳夷不敢校也。于八月二日，拥入澳门，其理事官报县，知县彭昭麟请大府封舱撤买办，禁在澳服役人，从之。十九日，知府陈镇、游击祁世和至澳。九月中，香山协副将许廷桂领兵驻前山寨为声援，昭麟及都司余时高驻北山岭为犄角。度路利惧，乞陈镇转以情达大府，词未恭顺。昭麟札西洋理事官转谕度路利速退，否则火其舶而治其人。度路利益惧，遂以船上黑人换作蕃兵，与大班拉弗乘夜至黄埔赴省，请开舱不允所请，总督吴熊光奏奉谕旨用兵驱逐。昭麟益厉澳禁，严巡缉；二班叭喱等乃求西洋国使转乞昭麟，昭麟限以七日回国，并令与练总叶恒树晓度路利以利害，乃俯首服罪，随回澳门归国，十一月七日也。未几，总督百龄、巡抚韩封先后临阅澳门，以自咖思嘯炮台至西望洋炮台迤南，沿海石礮，易于爬越，英吉利兵由此潜登，令澳蕃加筑石女墙，以资防堵。派把总领兵专守关闸，派外委领兵协防望厦，又设前山专营，移平镇营游击驻防。按：此次年事。

道光六年正月，西洋吗帑 尔杀澳民严亚照，知县蔡梦麟揭报总督，檄广州府知府高廷瑶、香山协副将曹耀清、澳门同知冯晋恩同蔡梦麟赴澳诛之。英人久踞濠镜澳南环一带，悉夺而居之；贩卖鸦片烟土，因游奕三灶村口岸，有卖果者，夷人以枪指之，试中否为笑乐，洞胸毙；修筑西洋人之东炮台，改建英吉利旗号；开驰道于东望洋山。山多居民坟墓，英酋勒起迁，迁者给洋银一两四钱；不从者夷之，弃残骸于海，民大嗟怨，遂有沈志亮、郭金堂之事。详耆旧录。洋船复来，泊零丁洋，春至秋冬去，以大府准其避风告；自后遂以为常。时洋船四五十只，华船舫附通市，珍奇毕具，娼航赌艇，比于珠江。先是水师提督李增阶，遣视金星门，东至旗纛澳一百七十余丈，汪洋巨浸而水浅，西至唐家村一百四十余丈而水深，欲以十余巨舰载沙石塞之，不果。十三年，有奸民引夷人如李法测量，盖欲于此停泊，销售偷漏关税故也。继又于唐家、淇澳，树表量地，皆绘图识墨，复于淇澳山建英吉利国旗，大有营造意。因英人放债，西洋人质其楼，居土库，鹊巢鸠居，无驻冬之例，以候帐为名。既盆踞澳门，且欲跨金星而有之，居心殊叵测。旋得新安之香港地，尤利便，不复至。

二十一年，建拉塔石炮台，以关闸汛把总移驻，仍兼管汛务。

二十九年，葡人毁望厦村县丞署，侵住拉塔石炮台，县丞迁署前山城内，望厦汛外委退屯白石村三山宫。望厦汛，原在望厦村，故址即今之汛地街

咸丰年间，葡人占筑炮台于西沙嘴地在澳门口外对海南岸。同时西沙相连之氹仔地方，旧有铺肆二百余，民居百余，亦被强占，且编门牌，建捕房、兵房、教堂焉。

同治二年，葡人强占塔石、沙岗、新桥、沙梨头、石墙街等村民居数百家，添设马路门牌，租界旧墙由家私栏炮台向北转西至水坑尾，又迤西北至大炮台，再西北至三巴门，又转北沿白鸽巢至沙梨头闸内向西南至海边高楼止，北为华民村舍，南为葡租地。俱陆续毁去。

十三年，葡人因占界龃龉，乘间闯入拆毁关闸汛墙，改设捕房，另设大关闸。由三巴门以北至旧关闸，均认为葡界。

光绪五年，葡人占龙田村。

九年，葡人编龙田、望厦二村户籍。又辟马路，设捕房于望厦。

十三年，定洋药税厘新章，香港、澳门分任缉私，遂设拱北关于马留洲附近。与葡人立草约四条，豁免澳门地税，永远借与居住。并声明未经大清国允肯，不得将澳门让与他国。俟两国派员会订界址，再立专约，其未经定界之前一切事宜，俱照现时情形，彼此均不得有增减改变之事。巡抚吴大澂亲至履勘。是年正月，葡人逼索望厦等村灯费地租，村人鸣锣号众击退之。后至北山沙尾等处，编列门牌，亦为村人击退。澳门海道、自前山造贝岭之石龟潭河面起，直达澳门马角海口分界，东北归前山营管辖，西南归香山协管辖，全属中国领海，不在租界之内。葡人初则侵入银坑一带，继则以澳门湾仔之海面为公海，是年复拔去海之中洪浮椿，直作为领海。

十五年，前山同知增设北山岭炮台、汛房，遣兵驻守。葡人欲争为两国公地，经政府驳覆乃已。

十六年，葡人圈占青洲岛，筑造新路，转租英人，迫我国原驻青洲海之师船移驻前山，总督李瀚章允之。后又据氹仔、路湾即过路环两岛。岛旧有沙主，向为渔船泊地，与大、小横琴接，时海贼出没，葡以保护为词，建兵房、筑炮垒、抽船牌、纳业钞，俨成一小埠焉。荔枝湾、石澳各地均设营帆驻

二十二年，葡人在大、小横琴建筑兵房，总督谭钟麟拒之，偿以建筑费，乃拆去。

二十四年，葡人迫收望厦村业钞。

二十六年，知县刘盛芳船经湾仔海面为葡人要留。

二十八年，葡使白朗谷照会外务部，以商民欲修浚河道，请将大、小横琴二岛归其所属，且增改条约，部议拒绝之。

三十一年，葡人平毁塔石等处坟墓，投无主遗骸于海。

三十三年，葡人毁龙田村民居三十余家，且禁迁家具，违者摔毁之。事后略补屋价，以掩其迹，值十者不得二。五月，葡领事照会护总督胡湘林，请撤消华商来往湾仔、澳门官照，逼领葡照，船户有被拘罚者。六月十三日，葡兵忽至湾仔，强渔船入澳，湾仔与澳门对峙，中隔一海，以海汇为界，鱼拖各船向泊于此。至是葡人竟越界张贴告示，限十五日回澳，逾期充公。复在海面改设水泡。典史守备奉飭赴勘亦被逐去。银坑与湾仔接壤草油厂各渔船燬油处也。是年，葡人又勒收人情纸费，始得湾泊湾仔。医院为我国绅商创建，葡人干涉之，凡留医者非彼给照，不得出院。

三十四年，正月初四日，我国捕获私运军火日商轮于九洲洋面，致兴交涉，葡使柏德罗照会外部，竟混指为彼国领海。

二月，葡人筑兵房、辟马路于九澳山。十一月，又丈量该处地址，总督张人骏严词诘问，乃止。

宣统元年二月，望厦村口金谷山一带坟墓，葡人勒限一月迁去。三月，云南交涉使高而谦奉命来勘界，粤人开勘界维持会于广州，公拟意见书上之。

国初移界事附

康熙元年，海贼郑锦猖獗，命内大人科尔坤介山巡视滨海居民，令徙内地五十里，且赈贫民之不能迁者。于是黄梁都、沙尾、北山、奇独澳、黄旗角、潭洲诸乡皆迁。官拆界三日，贫无依者不能遽如令，五月夷其地。

二年十二月，蛋贼周玉、李荣寇海洲。玉、荣皆番禺蛋民，所辖舢舨数百，平南王尚可喜以其习水战，委以游击之任。自壬寅严海禁，于是尽掣其船，分泊港，迁其孥属于城内。玉等不堪，诈归葬，出海纠合亡命，连檣抵洲前，尽焚汛哨庐舍；复破顺德县，执县令王而去。社贼冯大伦余党乘机由陆路焚劫三日。

三年春，续迁番禺、顺德、新会、东莞、香山五县沿海居民，先画一界，以绳直之，其间多有一宅而半弃者，有一室而中断者，浚以深沟，别为内外，稍逾跬步，死即随之。于是龙眼都、小榄、古镇、黄圃诸乡皆徙。督迁兵士，恣俘掠，知县姚启圣力争之，乃稍戢。初黄梁都民奉迁时，民多恋土，山深谷邃，藏匿者众。平藩左翼总兵班际盛计诱之曰：“点阅报大府，即许复业。”愚民信其然，际盛乃勒兵长连捕，按名令民自前营入，后营出，入即杀无一倖脱者。复界后，枯骨遍地，土民丛葬一阜，树碣曰：木龙岁冢。木龙者是年甲辰隐语也。

四年总督李率泰遗疏，请宽边界事，虽未行，濒海民德之，与巡抚王来任同祠祀焉。按李、王二疏俱详县志。

七年，迁民结党为乱，三月巡抚王来任上展界之议，御史杨雍建复条奏，诏可之。撤排栅，改设各汛墩台，八月撤中路巡海大人。

八年二月，诏复迁海居民旧业，惟黄旗角、潭洲、黄梁都、沙尾奇独澳未复。时潭洲、黄旗角两乡人赴控督抚辕，知县曹文燧坚执前议，黄梁都亦格于寨议，俱不果。

二十三年，西南诸乡迁民尽复业。初，诸乡久迁未复，田尽荒废。自十五年尚之信叛，遂开界垦荒，令民耕蒔。十七年催收王庄税谷，十八年县寨官兵督迁，焚寮刈稼；十九年县征前十八年虚税，追呼不堪命。至是民归故土，地方官插标清丈，民始安业。

香山县乡土志四

汉唐宋

元明国朝

耆旧

汉

陈临,字子然,南海人。黄《通志》云：今广州香山县。家居海岛，奋志不同蛮俗。郡举孝廉，顺帝永建中官至苍梧太守。推诚而理，导民以孝弟。民有遗腹子，为其父报怨杀人者，为吏所获，临知其无嗣，令其妻侍狱中，后产一男。郡人歌曰：“苍梧府君恩广大，能令死囚有后代，德参古贤天报赉。”献帝建安中被征为廷尉。其后子孙蕃盛，播于岭徼，世以为阴德所致。祀乡贤。

唐

郑愚，家世殷富，幼颖力学，尝作诗曰：“台山初罢雾，岐海正分流。渔浦扬来笛，鸿逵翼去舟。”隐然有济川之志。识者，知其公辅器。文宗开成二年，进士擢第，释褐秘书省校书郎，累迁尚书郎，懿宗咸通初，为桂管观察使，所至廉察吏弊，阖境肃然。三年，岭南西道节度使蔡京苛惨淫刑，为邕州军士所逐，诏以愚代之。时疮痍嗷嗷，方抚循不暇，会南诏入寇安南，都护蔡袭告急，敕发荆南、湖南兵二千，桂管义兵三千诣邕州，受愚节度。而岭南东道又奏蛮兵必向邕州，宜先保护，未可驰赴；仍敕愚分兵备御，而所发诸道兵竟不进。袭又奏求益兵。愚支持半载，邕州得无虞。朝廷复督责之，愚乃自言：“儒臣无将略，请任武臣。”于是诏义武节度使康承训代为节度使，发荆、襄、洪、鄂四道兵万人与之，俱亟往救袭，则已无及矣。承训上言愚在镇善守御状，朝廷始知其功，即召为礼部侍郎。《泰泉集》谓：其召还也，在僖宗乾符中当以侍郎进同中书门下，同平章事。黄巢平后，广州残破。僖宗中和初，命愚出镇南海，以抚绥功召拜尚书左仆射。后三载愚薨。无子，诗文亦多散逸，仅见一二，皆奇作也。祀乡贤。

宋

梁杞，延福里人。性醇谨好学，通五经，直郡庠。仁宗庆历六年登进士。初为连州司理，谏狱详明，部使者荐为桂阳令。莅政以惠民为本，恤孤寡，抑奸猾，作陂池，教种艺，平赋役，弭盗贼，庶务悉举。虔商有扰市廛者，设方略殴逐之，邑以大治。嘉佑中，通判鄂州军事。俗尚巫鬼，为置局医，斥去淫褻，陋俗为之一变。熙宁初，致仕。与运判徐九思议立香山县，事不果行，然自是之后，竟成。县治启其

端者，杞也。祀乡贤。是时海曲族望称陈、梁二家，而杞家声尤著，其裔孙现理宗、嘉熙二年进士，知南康。作兴学校，辍俸增祭器，暇课试诸生，举行射礼，民皆怀之。

陈天觉，字元英，绍兴八年试博学宏词科，特赐进士第。议论切直，为时贵所黜，乃不复仕。时香山尚为镇，止设寨官一员，属于东莞，岁输粮莞城，常被海寇。绍兴二十二年，天觉请改寨为县，以便输纳。东莞县姚孝资请州，闻于朝，诏从之。天觉以文学知名，后筑城建学，邑人赖之。祀乡贤。

阮与子，赤坎人。天性纯笃，读书通大义。早丧母，事父元辅尽孝。德佑二年丙子五月，父病剧，旦夕稽颡北辰，请以身代，开胁割肝，取一脔以疗病，病为之瘥。乡里异之，以其事达于有司。经略使徐直谅，赉以二帛，号所居为孝行坊，祀乡贤。邑人黄佐曰：“呜呼，父母全而生之，子全而归之，礼也。故刺股割肝，法制所禁，此韩愈所以有鄢人对与？虽然，世降俗薄，固有悖逆其父母者矣，以与子之事亲观之，宁少知愧哉。”故论者原其一念爱亲之诚可也。

马南宝，沙涌人。家饶财，能读书，好义，尤工诗。宋景炎二年十月，端宗自潮之浅湾航海避敌，过邑境，南宝献粟千石以饷军。端宗敕奖之，召拜权工部侍郎。时帝舟为元师所迫。十一月，丞相陈宜中、少傅张世杰、殿前指挥使苏刘义奉帝幸沙涌，暂宫于南宝家。南宝竭力保卫帝，躬劳瘁备，至元人无知者。居数日，元兵陷广州，诸将召募潮居里民数百以行。南宝谓诸将曰：“痛饮黄龙府在此行也。”遂歌岳武穆直捣长驱之句，以相风厉，慷慨激烈，闻者莫不壮之。帝舟将复驻浅湾，未至，元将哈刺歹及宣府梁雄飞、招讨王天禄等来袭，世杰等与战于香山岛，败绩。陈宜中统舟八百艘走秀山即东莞虎头山。中流大风坏舟，众多溺死，宜中仅以身免。十二月，张世杰奉帝舟退保秀山，寻次于井澳。飓风大作，舟败几溺，帝遂得惊悸疾。元将刘深复袭井澳，世杰力战却之。陈宜中欲奉帝走占城，乃先往谕意，遂逃去。南宝闻之恸哭曰：“丞相必不返，国事危矣。”后果然。景炎三年春，都统凌震复广州，南宝赋诗志喜。时帝舟次于化之洲，崩。卫王昺即位，走厓山，张世杰等从之。而曾渊子充山陵使，奉帝还殡南宝家，伪为梓宫出葬，其实永福陵在厓山也。南宝募人为疑冢于寿星塘五处。南宝方赴厓山，会阻病，旦夕谵语未尝忘也。宋亡，悲愤不食。元人籍仕宋者，南宝逃匿不降。尝作诗有曰：“目击厓门天地改，寸心难与夜潮消。”又曰：“众星耿耿沧溟底，恨不同归一少微。”闻者哀之已而。元兵欲屠潮居里，人为南宝危之，而南宝恬不为动。后闻陈宜中奉帝昺犹在占城，元主忽必烈下令捕之，于是招讨使黎德、梁起莘与南宝起兵，运粮往迎车驾。元万户王守信谕起莘归降，起莘奔还冯村，遂仕元至都元帅。德与南宝讨其叛兵，大败，南宝被执，不屈死之。祀乡贤。当端宗过境时，有隆都人高添者，进士陈天觉女婿也，尝献粟二千石饷军，授宣义郎，性忠义，为南宝所重，从帝至碭州，卒于军。

元

阮泳，延福里人。世祖至元初领乡荐，为邑学教谕，迁惠州路学教授。学博行修，一时视为仪表。工古文辞，以韩欧为宗。子士桂同年领乡荐，亦以文行名其后。同邑有赵梅南、杨士元者皆以诗翰名于时，由泳倡之。梅南，黄梁都人，邑令恠夫之裔，本宋宗室，善书翰，浮游物外；好品藻诗文，尝作潮居八景诗；自号意翁，不仕终。

杨绍孙，南门人。九岁即能属文。性孝友好义，敢为。与弟仲玉同居，家道丰裕，迨分产业，绍孙以其壤之沃者让仲玉，乡里高之。兄弟均负奇志，常究心韬铃之略。元泰定甲子，海寇黎靖海为乱，仲玉挟策谒宣慰使邛云谷于海上。大奇之，令仲玉从军征剿。仲玉与绍孙率勇士五百人赴军门，亲与贼战，梟其酋，遂大破贼。以亲老辞，归侍养。丙寅，仲玉直学，与高元生输财，竭力倡修学校。至正，岁饥，绍孙与弟仲玉捐谷五千余石赈贷，存活数万人。后岁丰，人争偿之。绍孙曰：“推食者，礼也；周急者，义也；无礼、无义谓之悖德，吾惧夫悖德之日滋也，偿之何为？”悉辞不受。邑人德之，作亭于所居之南，榜曰：“丽泽”。兄弟同祀忠义祠。光绪七年同祀乡贤。

明

郑荣叟，莲塘人。果敢有谋，元末巨寇劫掠县治，宣差达鲁花赤朵罗歹力不能支，乃率荣叟及邑人杨昆等移县于古寨山屯守。已而，朵罗歹卒，人心动摇，有族人曰：“橘官溺死，人传为神。”荣叟投之以机，即迎祷之。每寇至，言见一红衣人掠阵中，乡人奋勇百倍，寇辄遁去。筑垒凿堑，据守一十八年，龙潭贼卢实善等累攻不下。洪武初，征南将军廖永忠率兵至，刀奉籍归附。祀乡贤。

徐伯良，字显人，麻洲人。九岁入邑庠，十三食饩。历十年以通经贡，成均。永乐六年，授都察院都事，谏狱明允。六载辞归，家居怡然自乐，屡举乡饮大宾。寿八十三。嘉靖间祀乡贤。

黄泗，字清下。赋性仁明慈恕，有古君子风。永乐丙申，邑大饥，谷价翔贵，独平糴，贫者造门，辄与之粟。尝有峒民来易粟，误倍其值，既去矣，会其数过赢，呼而还之曰：“掩人之误而利其有，犹盗也。吾岂为哉？”正统末，盗李千户来攻香山城。城门闭者三月，民有菜色，为粥以饲之；子女有流离者，出金赎之，归其父母；所全活者凡数百人。乡人感其德义，言诸有司，上其事，泗力却之。卒，葬邑南寿星塘。

郑子纲，字秉常，一字雍陌，洪化乡人。治经能文，笃行好善，事母孝。率乡民共遵元尹左祥谕俗三编，凡乡人诗章有及于奉先事亲言孝敬者采而刻之，题曰：《孝

弟集》。新会陈白沙有《怀郑雍陌》诗，邑人咸称郑雍陌，遂以号其乡。永乐间，与修邑志，捐貲修筑天王桥，邑宰邓迁表其门。子善宏，字彦博，成化丙戌、壬辰捐谷五百石赈饥，举乡饮宾。

杨余荫，字朴庵，邑诸生，父子颜，孝友信义，人无间言。嫁姻族之孤女四人，葬其不能葬者三丧。余荫生七岁而孤，及长博涉经史，尤通春秋大义。以母郑氏孀守，隐居读书，娱亲为乐。创建祀先之堂，扁曰：“敬思”，撰序数百言，以寓追慕继述之意。母歿，哀恸过甚，庐墓三年，止啖蔬菜，常作思亲之什，诵者辄为流涕，不忍卒读。东莞陈连喜其母子节孝，作贤母传。永乐间修邑志，余荫尝与容云岚、郑雍陌入局纂修，卢长史尝作四贤诗追挽之。正统庚申，与周慈坚倡捐修学。辛酉，邑大饥，捐谷三千石。先是元至正间岁饥，余荫四世祖绍孙与弟仲玉赈谷五千石，邑人德之，为建丽泽亭；至是新之，题曰：继美。后祀乡贤。

容悌与，字行白，乌石人。性醇厚，学博行，修明经，长于书。永乐中署儒学事，聘修邑志，士大夫咸推重之。执弟子礼者无远迹。居家有礼，男女各有学，祀先谨祠堂之制，嫁宗族孤女数人。母陈氏病风瘫，悌与躬侍汤药，十三年无顷刻懈。及母歿，哀毁逾礼，邑人称为孝行先生。自经学外，工吟咏，别号云岚，所著有《云岚集》数卷。卒年七十有七，祀乡贤。诸子汝勤、汝嘉并以醇笃闻。

李英妙，大榄都人。家饶于财，读书通大义。正统己巳，黄萧养作乱。族兄有服农者窃从之，拜伪千户，率其党数十人至家，执英妙谓曰：“前日吾两足皆涂泥，今拜官矣，弟盍从我耶？”英妙大骂曰：“汝盗也，尚可言兄弟耶？恨不斩汝。”贼怒，遂杀之。乡民闻变，皆被胁从。越月贼去，子智、女观娘收其尸，面犹如生。

梁富，字乐桥。黄梁都人。正统十四年，黄萧养作乱，乡人林帝祐附之，远近煽动。富激烈指陈大义，民无逆志。贼怒，胁富降，不屈，复大骂贼。贼杀之，投厓门海中。英宗朝旌表义民。国朝雍正己酉奉祀忠义祠。

卢瑞，字廷圭，麻洲人。少颖悟，从同舍曾贤游，有声，庠序。正统甲子同举于乡，计偕北上，贤道丧明，瑞念老母在堂，需禄养，遂就职，得横州学正。送贤至家，而后奉母就养，人皆赍之。瑞善讲经，士皆解颐。以内艰归，横士从而来卒业者数十人。服阕，改高唐州，州久无甲第。瑞择其秀颖者加意教之，三年得进士二。秩满，士子群送至三百里，有抵京师而后返者。考最，擢思恩教授，思恩乃羁縻州。郡立学未久，獯不能华言，言必译。瑞谆谆训谕，无少倦，用是积久而通。贡太学者，与柳庆无异。后除岷府长史。瑞至，藩王与世子皆尊礼之，僚属卒隶受约束，惟谨上下，各得其欢心。岁余卒于官。

李诚，字成之，小榄人。读书好义，每遇岁祲，捐粟赈乡间；尝拾遗金，立俟其人还之，不受谢。佃执盗禾稼者，诚劝以改行，助之资本，其人愧服，感泣而去。晚

耽吟咏，娱典籍，举乡饮宾。卒年九十一。

黄瑜，字廷美，仁厚坊人。幼聪颖，明尚书。陈东并以五经教授，瑜卒業其门。事父母惟谨，得其欢心。遭母丧，年十二哀毁如成人。继母李，敬奉如亲母。父丧，踊泣几绝，水浆不入口累日。送终之节，凡当时搢绅之所不能行者，务尽其曲折。景泰丙子举于乡，入成，均以经行，为一时冠。天顺初，天变，求直言，应诏疏上六事，曰：正身，则天下治；曰：正家，则天下定；曰：正礼，则天下化；曰：正乐，则天下和；曰：正赋税，则天下富；曰：正军，则天下安。凡数千言，触权贵，将得罪，赖吏部尚书王翱、户部侍郎薛远救之而免，直声震荡一时。居京师八年，学士李贤、邱浚辈皆器重之，欲延入馆阁，不就，作七诱以见志。尝中御史选铨部，已将奏名矣，其夜有俞姓者钻刺夺之，殊不色愠，曰：“吾名类彼姓，安知始非错耶？”成化五年己丑，乃授本省长乐县知县。礼贤与学，招徕流人，洗刷冤滞，曰：“吾乡人莅乡人，先化而后正之。”初，豪户不供税，莫可谁何，知其出于里胥强横，果皆乘肩舆，衣罗绮，导以征旆。来见即褫之于庭，示以礼制，阖境肃然。有曾某将履任，拿舟来迓，意必假以颜色，寻以征粮不完，与众同罚。由是逋租匿役，无有敢隐。凡避患他境者，还以数千计。户口既滋，增置二里，复增二仓，而邑益富。首以学校庠隘，捐俸迁建。及桥梁驿传铺舍皆兴修无遗。暇即与诸生讲学课业，时富家多为义官，寒门乃充庠士，思有以感动之，因陈老人子入学，躬送至其家，世家以不见临为耻，弦诵之声遍洽。听讼时，公门大辟，民或不持牒径往赴诉，鞭扑；间闻呼少孤者，必流涕释之。尤怜狱囚，每朔望必解桎梏，栉沐饮食之，莫不感泣吁祝。偶因公久出，归未抵城，狱囚闻之欢声如雷。兄弟有相讼者，开导以因心之义，皆涕泣受教，退让去而。义官李允擒剧盗卢公林至，谓曰：“盍为良民乎？”曲谕数四，即破械放之。允叩头争曰：“此贼为害数十年矣，纵放则流害滋大。”笑曰：“彼良心已动，森不可遏，非汝所知也。”公林果革心力田，永不为盗。豪氓杀人，匿其尸，讯不服法，司欲从疑释，因请自讯，忽蚱蜢折左股毙于硯，谓曰：“汝折其左股，沉黑水池中，神告我矣。”氓惊服。其洗冤烛奸皆此类也。邑旧多淫邪，每秋冬之交，巫覡载道，云驱瘴疫。立禁止之，其风遂革。又多盗贼，以德化导，牛羊盈野，人无敢窃者。有馈送土物，虽至微不受，惟禽鸟则受而纵之。民化其仁，家无储置网者，恒相谓曰：“黄父母恩德犹及羽毛，而况于百姓乎。”避其嫌名，至于舍黄鱼而不食。御史龚晟旌，为诸令之冠。以劲直忤当道，民攀留不可，致政去，士民思之，立生祠于学前直街。归途经黄土岭，向所化盗卢公林者率子弟亲肩其舆过岭，曰：“黄公生我，黄公生我。”其刚而能感如此。既归，徙居会城番山下，手植槐二，构亭吟啸其中，自称双槐老人。曰：“子孙能更植其一，则吾志毕矣，盖希踪三槐也。”为学以存诚为本，尝自诵曰：“不欺人，不欺心，合内外而一之诚也，外此而徒有文章事业，终小人耳。”置朱子语类及唐音、杜诗于卧所，晨起读语类，以析名理，暮则咏诗数章，而后就寝，于声色纷华一无所好。尝自香山省稼，回至白沙，访陈子献章，雨后蹑草屨护鞋而往，相见大笑，谈论竟日，各赋一诗而别。瑜诗云：“吟弄不知春已暮，满天风月玉台巾。”盖许以与点之意。陈子诗云：“与话平生灯火事，羞看白发满乌巾。”以

瑜老犹耽六籍故云尔。卒年七十有三。所著有《书传旁通岁钞》《双槐集》。赵金宪序其文近昌黎，诗如乐天，岭南一大家也。学者称双槐先生暨子畿、孙佐三世。俱祀郡学乡贤。

郑鸿，字振宜，莲塘人。年十五，有声庠序。成化甲午举乡试第三人。屡厄会试，梁储为少宰，鸿肺附戚也。客或讽之，鸿正色曰：“子徒知少宰能贵人，独不知人有良贵耶？”遂绝意仕进，卜筑莲峰下，凿池构亭，徜徉自乐。祀乡贤。

黄钥，字世美，黄梁都人。成化乙未进士，授大理寺评事，审谳有能名，升广西佥事。未几，赋闲。会郁林陆川寇起，诏钥军门听用。定郁林、博白，流民几三千户，清无征税米二千石。袭杀归化贼郭公才等，与陶鲁欧磐皆威行夷獠，以功复前职。改江西佥事，擒瑞州贼王宏、湖广贼姚明礼，俱散其党。都御史刘大夏总督两广，以钥尝有功广西乃荐升副使，兵备柳庆、南宁，兼分巡右江道，莅任即卒。祀乡贤。

卢渊，字光潜，成化甲辰进士，授江西新淦县。政暇多与士论文，每至夜分不休。邻封远近之士，咸北面焉。尝与郡守议地方利弊，语多抗激。守不恚，因谓之曰：“朝廷设官尊卑相驭，大小相维，未闻等级不辨也。”渊抗声应之曰：“官不论尊卑，期于尽职，事关民社，岂容缄默。如以任事为侵官，尽言为犯上，恐非朝廷命官之事。”语毕，趋出即解组归，以诗文自娱。著有《钓叟集》。

郑标烈，乌石村人。幼慧，嗜读书，娴武艺。宏治间，流寇入乡，攻其家，父兄窘甚。标烈率家丁御之，力战死，父兄免于难。族人立祠，塑像祀之。同治初，会望颜额其祠曰：“孝勇”。

黄经，字子常，麻洲人。生而严重律，身有礼，自少至老手不释卷。筑稽古堂于东林山下，自号山海子，读书谈道。邑士多从游者。宏治己卯中，应天府举人，以亲老愿得禄养，任霅益州同知。旋授教职，得泗州学正。时御史诣学讲书，教官例应奉签，经不可即，致仕去。著有《香山志》及《溟阳第一州志》、《淮泗一览》、《小学节条》，诗文共千余首。祀乡贤。

黄畿，字宗大。瑜之子。七岁善属对鼓琴，见者呼为奇童。十六岁补郡庠生，通诗、春秋二经，摭茹百家，涤去陈语。督学佥事张习称为古作者，然竟不能取合。有司一夕同舍生攘鸡邀之，谢不往，即束书归，曰：“是固尝业举擅场者，其行若此，吾胡可倡哉？”乃告改邑庠，即以养亲归。自是绝意进士举，隐居粤山之椒，乃研九流，通三才五行之蕴，撰三五元书，始犹杂于佛老。既而读邵子皇极经世，深造其奥，叹曰：“自箕子以来，合术于道，其惟尧夫乎？”遂尽弃宿习，稽元微，订律历，作《皇极管窥》十三篇。知言者取以附诸皇极经世之后，谓于康节之学符合。晚年，潜心大易、中庸，曰：中庸，易之疏义也；太极，通书定性；西铭，犹

中庸也。乃述易说若干篇。盖粤人著书之精奥者，以畿为最。其论学则曰：前之三代，由夏历殷而文成于周；后之三代，由汉历唐而文成于宋；名理纯粹，周宋其齐轨乎。是故周至元矣，道同乎伏羲，程至大矣；见卓于颜子，朱至博矣功亚乎仲尼，再辟浑沦，不亦元乎；心普万物，不亦大乎；功在六籍，不亦博乎。又曰：“孔门传心之要，一言而已，慎独是也，故为学必主于独。”生平未尝袒露星月下，梦寐中有不善语必吁天谢过。暗室抱寂终日，临妻孥无有惰色，其所养盖醇如也。天性至孝，先意承志，惟恐不及。父母有怒，长跪叩头，俟释乃起。一味之甘，必献庙奉亲，而后敢尝。母病吁天恳祷，蔬食者三年，病果愈。居丧哀毁逾礼，既葬日犹哭诸墓。方晨，有虎突至前，俯伏而去。旁有山人廖翼见之，大骇，为作感虎歌以美之。歌曰：“黄孝子遇于菟，孝子恸哭不自觉，气吞于菟恰若无，于菟初来威烈烈，咆哮未发石欲裂，须臾俯伏孝子前，叩头致敬腰为折。吾侪旁观股交战，孝子泪眼何曾见。乃知至孝通苍旻，嗟尔于菟良有神。”凡田宅财帛，兄弟欲之，即与，一无所靳。每合经史语，自诵曰：“天下无不是的父母，世间最难得者兄弟。”人以为名言。捐己田七十亩有奇为义田，以贍族。乡邻或肆凌轹，人所不堪，退缩不与校。饮酒微醺即哦邵子诗。评者谓类康节云。尝言梦一冕衣裳者，峥嵘如龙蜃可怖，再拜告曰：“我鍾山神也，七七之际，公当为吾主人。”觉犹环佩璆然，发书占之，曰：“吾他日其旅殡乎？”正德癸酉秋，与子佐计，偕如京师，至玉峡而病。笑曰：“七七之期至矣，数也，命也，何寿夭问哉？”抵宜真而歿。年果四十有九，别号粤洲，学者称粤洲先生。嘉靖甲午，父老核其行实，上之当道，揭名于孝友坊。丙申，家人以其所著《三五元书》、《皇极经世书传》、《粤洲集》诸书送察院，御史周煦叹曰：“此真隐居求志之儒也。”建逸士坊以旌之。以子佐贵，赠翰林院编修。祀乡贤。

黄佐，字才伯。四岁受孝经，五岁能随父畿执养亲礼，及就外傅，问曰：“大学自纲领条目之外，何以释本末，而不及终始。”师不能答。至十二岁而举子业成，乃更学为古文词、及皇极象数之学，著座右铭正骚。粤会赋，学使者以孔氏遗书命论题。佐谓：“曾子发尧舜之所未发，慎独是也。”正德庚午乡荐第一。作《九州问》，以见志。沉潜理奥，至忘寝食，叹曰：“孔门之学，知行并进，岂可偏废乎？”丁外艰，日必至墓所禫，犹不食肉。庚辰登进士，明年世宗即位，始廷试，选庶吉士；五试皆第一。诸老奇其才，以为张平子、王文考之流也。授编修，陈初政要务；又请修举新政，疏皆留中。康陵既祔大礼，议兴礼官，毛澄议兄终弟及，无追尊之礼，宜仿汉定陶王故事；佐主其说，署名牒尾，异议者以为党册。封南渭王、充岷府副使，事竣坚辞金币，归家即具出使陈情疏，未报，促复命，力疾还朝。三年考满，赠父畿如其官。上省亲疏，力恳得允。春，出潞河、与文征明联舟唱和甚适。便道谒王守仁与论知行合一之旨，数相辨难。佐曰：“知，犹目也，行，犹足也；虽乃一时俱到；其实知先行后。”守仁曰：“君太信宋儒。”佐曰：“知之非艰，行之为难，岂宋儒耶？夫子亦曰：‘知之未尝复行也。’”守仁叹曰：“直谅多闻，吾益友也。”抵家，上疏养病，有司请修广州志，书成却币，辞宴还朝。会出诸翰林为外僚，除江西佥事。旋改督广西学校。至苍梧，谒军门，旧谒者必跪，

佐长揖，抚臣不，悦甫抵任，与诸生发明理一分殊之旨，辑理学本源诸书，颁行郡邑。修书院，育人材，正士习，毁淫祠，行射礼，举节孝，立乡社，即獐獐子弟皆教之，风化大行。闻母疾乞休，不俟报竟去。下巡抚林富逮问，富言佐诚有罪，第为亲受过，情有可原。时大学士李时荐佐有程朱之学，宜充经筵讲官，世宗亦知佐名，而部核谓佐母老且病，非诈止，令致仕家居。远近学者踵至，始辟粤洲草堂以居之。又以时人多宗象山。谓朱子为支离，因折衷以告之。曰：朱子有万世不易之定论；亦有一时答问之言，偶书于传注者，则非定论也。如易曰：一阴一阳之谓道，本义曰：阴阳迭运者，气也，而其理则所谓道，此定论也。若注中庸，分道体之大小，而谓陆子静专德性之功多，又取其上天之载等语，以解无极，则非定论也。论大学补传曰：物有本末，知本而已，学于古训，问于师友，则知本。知本则知至善，知至善则理欲之择精，皓然一矣。疏大学者，谓博学可以为政，故屡引诗书，孔子以及群言，而诚意反诸身，其本则一。为要一以贯之，又马补哉？是故博学以明之，反身以诚之，孔氏之正脉也。作格物说，以明本指。曰：天生蒸民，有物有则。则也者，理也；违则，欲也；穷究其理之谓格，理欲明则好恶。诚，反身而诚，强恕而行，絜矩之本也。曰：盈天地皆物也，将一一格诸？曰：否，先其大者，本则身，厚则伦，物格则万物备于我矣。理一分殊，必自格物始。佐学以程朱为主。惟理气之说，独持一论。谓道之大原，天人一也。阳动而水木以生育为功，知仁交际，而万化出阴静而火金以制胜为事。礼义交际，而万化入，此谓全体大极。虽图书易范，一以贯之，而理气奚二之有？继善成性之后，吾能存存，知及仁守，则礼义是之。自出叙秩生于吾心，自然而然，乃明命之受于天，而流行不已者也。自私自利之念萌焉，则不受命，故子罕言利，以防其萌与？命与仁则无行而不与也。教人以博约为宗旨。盖得力于读书，典礼乐律词章无不该通，故即以此为教。是时阳明方欲尽洗闻见之陋。归并源头一路宜乎其不能合也。巡抚陶谐荐佐，文章华国。谋猷经邦。谏臣董进第等以遗逸荐，礼部侍郎吕楠以官僚荐，皆为议礼者沮之。丙申冬，以翰林院编修、兼左春坊左司谏起于家。至京师，作《九经正要箴》，充经筵讲官。遇事规谏，寻进侍读，掌南京翰林院。召为右谕德，擢南京国子监祭酒。颁五伦条约，禁超拨，清廩饩，以给诸生，出旧著乐典使肄习。学士张治曰：“乐典一书，箫韶九成可复作也。”佐始为此书，梦夫子告以知崇礼卑之说，积思二十年，始克成之。自谓泄造化之秘。丁母忧归，庐于墓侧，服阕，起少詹事。谒大学士夏言，与论河套事，不合。或劝佐委蛇从时，佐曰：“爵悬赏于君，命悬于天。道长时也，道消亦时也，吾惟与道偕行而已。”会吏部缺左侍郎，所司推礼部右侍郎崔桐及佐、给事中徐霈御史艾朴言，桐与左侍郎，许成名竞进，至相诟詈，而佐及同官王用宾亦觊望，宜皆止勿用。言从中主之，遂皆赐罢。佐不辨，归。卜筑禺山之阳。从游者日益众，日录所闻，曰庸言。语诸及门曰：词章之说胜，始有无用之文。虚寂之说行，始有无文之学。鲁论示人笃信好学，始乎悦乐不愠，终乎知礼、知命、知言、必真知之，必诚行之，乃成君子。盖佐笃信孔孟，而学贵力行，游其门者，人见之必推曰：“泰泉先生弟子也。”生平操履端谨，模范严整，居无惰容。燕无嫖语，私第邻府寺，敲扑喧襍，而处之裕如，布帷木榻，不求更新。紬绎经文，每至夜分不休。终岁少入私室。少癯然，晚更丰硕，知其所养充粹也。通

籍三十年，在朝仅数载，虽屏居，有廊庙之忧。周贫赴义，意惟恐后。增置义田，以赡族人所至表孝义，居乡必为言于官，临事审密而能断。壬辰海贼许折桂寇广州，至琵琶洲，城门将闭，佐画策以授守者，贼遂降。城中有夷达官舍，自永乐中安置，供费不给，武臣议裁革，众大噪，刑白马为誓。佐闻变，亟出慰谕，言于院使，复其旧，众感悦。杨指挥与三学生徒诟，竞歃血教场，欲歼诸生，佐言于镇守平之，城获安。安南莫登庸通使请封，诏大臣处分有力言可取，以觐进者。佐示永乐征交事迹，且言当从其请，以羁縻之。后登庸效顺，兵费不损，佐之力也。会有诏广州买香，海舶不至，责民为香户，民多逃匿，方伯张鏊率属以请，佐指授条约，民悦愿供香。岭外风俗日侈，伏戎渐盛，作乡礼以寓保甲之法，乡邦赖之。丙寅七月，疾革，将易箴，犹讲易系曰：“自天祐之，吉无不利，当以王弼注为是。”作诗有气完光岳，身在云霄之句。整襟拊带，曰：“宏毅之学，当如是也，小子识之？”乃卒。年七十有七。穆宗诏赠礼部右侍郎，谥文裕，遣官谕祭，祀乡贤。学者称泰泉先生。子在中，诸生；在素，嘉靖乙卯乡荐，通判漳州；在宏亦诸生。佐博综今古，究心于理学、经济，而修词掞藻，杰然争雄艺苑。岭南人在词垣者，琼台香山，先后相望，于是南越之文学，彬彬比于中土矣。著书凡三十九种，诗会论条贯，取材于西京，割正于李唐，研精于南宋，其言奥以文，其思婉而微，粹然一出于正，为南园后五子之师。其弟子多以行业自饬，而梁有誉、欧大任、黎民表，诗名最著云。《祝志》曰：孔门教人，但云博文约礼，至宋儒始衍即物穷理之说，故佐时有目考亭为支离者。佐学本程朱，而不肯雷同。以博约为宗，先知后行。其格物理气诸论，皆卓有发明。惜旧志未显。兹荟萃群书，辑为此传，补所未备云。

容师偃，字得治。悌与四世孙。事见明史孝义传。死时年二十一。

何世睿，字信斯。少失怙恃，王母陈顾复之。年十三，著声学宫，深研性命之学，而器量复汪汪千顷。方构难时，或告贷百数十金不偿，怡然不问也。尝语人曰：“我辈肯以廉耻二字共相劝勉，念念顾惜，则三代之风，可复睹于今日。若荡检逾闲，以示高放，江流日下，吾不知所救矣。”嘉靖甲子，子述忠、述瓚同登贤书，祀家庙，因出夙昔家难构讼一篋，告祖焚之。曰：“顾吾子孙，体吾志，砥砺自修，毋记怨者名。”年五十三，贡于乡，而卒。以孙吾驺贵，赠如其官。

何派行，字应充。其先出宋状元桌之后。南渡来居小榄，遂为香山人。自少昂然有出群志。夜诵三鼓不休，父止之，派行长跪，曰：“世德未彰，儿敢坠青云耶？”长，益博览群籍。督学田汝成设高等。嘉靖甲午，以易义中乡试。辛丑登进士。奔父丧，哀毁逾礼。起复授户部主事，历员外郎中，出知太平府事，地控闽方，未易法制，乃力为振饬，励以清节。土酋有争疆者，馈以千金，求左断，叱却之，而正其罪。又肃士习，振颓风，剔衙门积蠹，通小氓利便，颂声大作；有直指索龙涎香，弗应，弹调思恩。时八寨剧寇负固恣睢，以法绳之，令无敢挠。壬戌入覲，萧然一橐。寻晋陕西行太仆寺少卿。己丑，再转本寺正卿，奉敕案视山西马政。具疏清厘额马，权贵皆畏之。直指温公，谄以边将贤不肖者，率以直对，不相褒毁。颇为

时忌，竟以他事中之，遂罢政归山。舅氏某尝往关说官事，谢绝之，立促归里，后乃长跪请罪，其介性如此。

余光裕，字武可。原顺德马冈人，籍隶香山。性孝友，读书经目成诵。年十四，补香山邑庠，掇嘉靖乙卯乡魁。从游甘泉，默契体认天理之旨。甘泉作三杰歌赠之。屡困公车，就怀宁教谕。正己率物，以养贞操，明义利，究性命，戒怠荒。又择士之秀者作文会，给供需，因材施教，士多丕变。督学耿楚侗雅敬重之。期以大受，征典广右文衡，所录多奇士。四十四年乙丑，擢湖广桃源令。丁外艰，服阕，补博白。复丁内艰，未任。隆庆六年，改令广西柳城。下车革常例，却馈遗。秋毫无染。柳俗婚不亲迎，丧不辍乐，又多火葬，悉严禁之。清查隐占，均平差役，羸子大苏，豪右屏迹。獠民负险为乱，中丞视师容柳间，光裕慨然身任之，擒巨奸数百，抚降者以千计。中丞上其功，钦赐白金文绮。万历二十三年，迁蒙化府通判。政尚宽简，蠲租税之逋负者数万缗。寻欲告休，父老子弟上书愿留。未几，进荆州左长史，上言慎威仪、戒嗜欲等八事，正敬重之。著有《江石集》。卒于官。荆王诔曰：“嗟尔左辅，朴忠是导，民望国华，人龙天宝。惜夺予监，不遗一老，顾此迅飙，谁为劲草？”

郭绍鸾，字瀛川。嘉靖辛酉举于乡；乙丑会试副榜。任岑溪学教谕，转国学、历兵部司务。所得俸置屋为宗司，复捐己田之半为祭田。子尚敬，字吉吾，万历戊子举于乡。初任海阳教谕，升沙县知县。爱民造士，称为循良。解组还，杜绝私谒。邑人欲迁学，以费重难之，尚敬捐貲为倡。著《尚书约注》，学者宗之。俱祀乡贤。

何述忠，字惺宇，小榄人。与弟述瓚同举嘉靖甲子乡荐。少有夙慧，家无藏书，古今人文词，咸就坊间阅，归录之，终身无遗忘者。十上公车，母容氏勉以禄养，乃谒选浙江温州府判，意每郁郁不自得。至则进父老，问地方厄塞，振饬之。尤重名节，捐俸新颜真卿祠，自为文表章林景熙、唐珏遗事。尝进诸生讲学，出豆羹共饭，其诚朴如此。郡有疑狱，经二十年不结，直指檄述忠覆勘，尽得其冤状，阖郡称平。未几，奔母丧回里，甘贫乐道，监司表其门曰：“东瓯遗爱”。卒年八十有八。祀乡贤。

何述瓚，字赞元。束发受书，即问圣贤如何人？人皆可为之否？弱冠，魁甲子乡闾。于经史、诸子、性理、语录，日手书数十则，以己意论述之。遇格言要论，矢志躬行。工于诗，尤善书法。著有《周易问》、《介景堂文集》。崇祯间，祀乡贤。

王言，香山所昭信校尉。万历十年五月，倭寇犯鸡拍村，言奋志前驱，生擒倭寇噶等二十余名，斩馘无算。督抚优赏，言悉以所赏散之士卒。三十八年，随征广西，多所斩获，后以扶病出师，死于戎垒。

郑士熙，字我纯，濠头人。本浦江人，先世宦粤，遂家焉。性仁孝，幼失怙，哀动

路人。奉母教惟谨。弱冠饫于庠。万历二十一年，选贡谒选，得潮阳学博。以端士习，正文体为急。选山东长清令，会岁荒民饥，辄开仓假贷，蒿目沟瘠，未忍追偿，法当免，民恐失士熙，牛车担负，襁属不绝，旬日补足。调湖广城步县。先是县中有横征陋例，革除之，勒石示禁。每出，童子百十人迎拜马首，曰：“公实生我。”士熙笑抚之。在署惟饮水茹蔬，老归里家徒壁立。有侵其祖莹者，邑令廉得实，欲置之法，且檄令他徙。士熙止之曰：“彼诚不直，死者何知？”尹叹息曰：“先生可谓厚德矣。”卒。祀乡贤。

毛可珍，字美仲。原名元恺。其先耒阳人，洪武间从军入粤，授香山百户，因家焉。上而端悫。万历癸卯举于乡，知诸暨县。县在万山中，夙称难治。可珍月吉读法，进父老讲仁让，政大和。暨阳有义冢，势家溺堪舆言，欲举夺之。可珍持不可。乡人名其地曰：毛公地。俗多溺女，为严连坐法，由是存活者众。贫民以男女为质，逾期没为奴婢，可珍计其偿直，还诸父母。调静海，时庐田久为豪家私庄，岁耗课额，可珍下车不数月，宿弊顿清。晚年高蹈不出。卒年八十有八。康熙十有二年，祀乡贤。

李孙宸，字伯襄。小榄人。万历壬子乡试第二。癸丑成进士。授翰林院庶吉士。乙卯予告还里，营先人葬，间登罗浮、西樵诸山，与樵牧狎处，游屐所至，赋咏成帙。庚申秋入京，直起居注，旋掌内书堂，不欲与中涓作缘，求改掌诰敕，文词庄严有体。壬戌校礼闱，得人称盛。先是神庙、光庙相继升遐，班联中门户角立，孙宸册封藩府事峻归里，超然评论之外。寻晋掌春坊左庶子，奉纂修之命。乙丑春赴京，途次进南国子祭酒，除纳班准拨之例。丙寅春，晋詹事府侍读学士，教习庶吉士，以节义相砥砺。晋南礼部右侍郎，摄礼户两尚书事，中官矫旨，命礼部竖逆阉祠额，孙宸竟寝不行。崇祯初，晋礼部左侍郎，掌翰林院祭典，晋经筵充日讲，寓箴规于剖析；是时通蓟、遵化告陷，京师戒严，孙宸忠义愤发，上方略七事，与闽粤同官京师者，守德胜门，誓以身殉。上疏捐俸薪簪珥，助守城置器犒士之用。各官多市马为出奔计，孙宸曰：“君辱臣死，买马何为？”庚午回部颁程式，以挽浮靡，禁异服以还朴茂。辛未知贡举，进士井济文误犯光庙讳，及礼部主事冯起纶回奏，魏光緒参邓之沛事，俱下部从重议处。孙宸代为引罪，极力申求，得轻议，时论多之。五月亢阳，诏上书陈言，孙宸具疏有曰：“母以意在振弛，而间加重典；母以言者过当，而遂动严呵。”隐刺时政，意倍婉切。十月诏诸臣面陈时政，孙宸备陈阴阳消长，大小往来，国家治乱，而外吏贪污，繇抚按情面，廷臣废弛，因宦官干政，反覆愷切。晋南礼部尚书，上地震疏，再申前疏所未悉。旧制有寺田五百顷，供陵寝香火，为豪强所据，孙宸清核复旧额。南国子生，每大比，例待北部发咨应试。癸酉科以他事通行察覆，北咨未发，孙宸疏请暂据南咨起送，国子生乃得与试。甲戌秋，三疏乞骸，俱奉旨慰留。孙宸还山念切，因赋《金陵思归百韵》，年五十有五，卒于官。赠太子太保，赐谥文介，谕祭葬，百五门人经纪其丧。在官囊篋萧然，惟古炉、香带各一，鬻充殓殓，其余图书、字画、敝衣数袭而已。性孝友，立朝居乡廉介，可为矜式。著有《建霞楼集》行世。祀郡学乡贤。

繆士杰，号宾吾，龙眼都人。万历间选贡。初任河内县主簿，保固堤工，升颖川卫。经历减耗羨，平斗斛，屯民赖之，以清廉敬慎著闻。乞归后，闭门训子。岁饥，减价粜谷，作粥以食饿者。年八十三卒。祀乡贤。子志文，番愚训导，奖掖秀杰，优恤寒俭，造士有方，得苏湖遗意。

伍瑞隆，字国开。大榄都西头坊人。性颖悟，弱冠补弟子员，辟玉溪园、白燕池于所居之南，为课诵所。与同乡李文介、宗伯诸人文酒唱酬无虚日。领天启辛酉乡荐，解额中丁丑会试副榜，授化州教谕。聘修高州郡志，以信史称。擢翰林院待诏，迁户部主事，再迁员外郎，管仓场。历河南兵巡道，谢病归。晚卜筑于邑南鸠、艾二山间，号鸠艾山人。著有《临云集》、《辟尘草》、《怀仙亭草》、《金门草》、《白榆园草》、《游梁草》、《石龙草》、《铁草》、《雩乐林草》、《鸠艾山近赋》、《少城别业近草》。工书画，世宝之。弟瑞俊，字有开，以廪生官中书，亦能诗。

郑一岳，字于赓。父士熙尝为长清令，生岳；年十七与兄一龙同饬于庠。天启丁卯举于乡，崇祯十年丁丑成进士，授镇江丹徒令。徒邑当大江，素号要冲，兵至，一切征发旁午，调度有方，绝不苦累其民。如吴中漕兑，尤为军国重储，兵设法豫支远糴，以备急乏，而后缓征以备仓库。由是课额屡登，公私两便，民甚赖焉。时蝗旱连年，流民四集，捐俸赈之，多所存活。事暇尤勤课文造士，置田二百亩于香山书院，以为诸生膏火资。会岁饥，邑绅万编语太守有酒禁，酒户八十人鼓噪，太守不能止。岳遣人治其首乱者，乃寢。又山贼抵境，太守遣岳征之，岳毅然跨马，率家丁及兵役百十人，夜往转战，擒其渠魁，贼遂解散，邑赖以安。任满，会有旨以行取知县练达民事，可补荒残，复召岳补山东单县。单，齐鲁僻邑。是时民户凋零，豪梗横肆，竟不由令，置人狱中，狱卒又穴地埋人半身立毙，岳至廉得其状，立置狱卒，毙之杖下者四人，邑称大快。未几，以母年八十，归至南康舟次，病卒。祀乡贤。

何兆宁，字仲轼，邑庠生。大榄都人。沉深有大略；尝省季父吾驺于京师，习闻天下大计，益究心韬铃之略。会上命禁旅讨贼河内，兆宁遂请从军，所向馘贼以报。总兵官王朴拊之曰：“儒者勇乃尔乎？”七年，奏捷叙功，授守备，随禁旅还居京师。时两广方用兵，兆宁以部咨赴军门，清剿盘古十八洞贼。寻又破沙子下冈诸贼，复合楚师，捣主簿峒，歼渠散胁，以兆宁功为最，授游击。未几，复从征九连山八排诸峒，设奇制胜，多出兆宁计画。贼平，历升参将，辖肇标水兵，援剿海上诸寇。兆宁善用谍，豫得贼情，贼夕聚谋而楼船朝至矣，贼以是破胆。乙酉冬，粤西兵起，总制知兆宁可任大事，独召使画策，乃尽藏其哨船，集渔艇溯上流，火攻破之。晋副总兵、时溪峒土司蹶张犯隆安、宁化诸县，制府以兆宁勇略为诸将冠，于是专师西徇，多所擒馘。丁亥夏，率兵德庆，驻舟杨柳沙，与交址转战，身被流矢，奋跃波中而死。兆宁起书生，虽历行阵，犹手一编不置。平生喜畜砚，次第品藻，各有铭识。独一片纯白蕉叶，宝之逾玉。尝曰：“此吾殉葬物也。”死时，

硯果衷甲間。

楊晉，字子晷。年十二，補諸生。與張家玉、黎美周、梁未央結詩社白雲山寺，稱嶺南四子。崇禎癸未，歲荐于廷，直指柳寅東荐可大用，特簡兵部司務，異數也。時軍興旁午，晉區處精詳，尋遷本部職方司主事，以病予告歸。甲申，聞愍帝凶詔，号恸不欲生，母勸諭再四，始進飲食。五月留都踐阼，閣部吏可法荐，晉不赴。留都失，閩王繼立，黃道周，瞿式耜先後荐，俱上疏千余言，力陳時弊，不能用，罷歸。著書教子，足不逾閩。順治八年，詔舉遺逸，直指楊旬英力荐，晉托疾辭。十一年復舉遺逸，大司馬李率泰荐之，晉獻詩云：“鐵崖久矣耽泉石，乞放閑身侶白鷗。”率泰嘆曰：“宋之謝枋得也。”晉性仁孝，遇親諱日輒悲泣。祀必丰洁，以祖祠圯，卧處庀下，家人以為言，曰：“祖父未安其居，晉何敢逸。”卒竭蹶新之。母家何氏，遺十余柩未葬，晉皆擇地窆。族叔暮年生子，臨卒命妻子羅拜托之，晉為治喪抚孤。族兄遺子四人，貧无所依，晉皆教養成立。族叔君宁素任狹，一日从晉桂海遇盜，君宁善泅水，恋晋不忍逃，同被获。晋遗家书曰：“家破矣，我与叔势难两全，赎叔弃予可也。”妻毛氏读之，哭失声，罄家貲两赎之。君宁卒以忤贼毙。晋力为营葬，捐产择嗣焉。持躬严，危坐终日，无少怠。好读书，恒至夜分不辍。著有《读易曰解》六卷、《大易析疑》十卷、《性理指归》六卷。

国朝

容章美，字仲含。长洲人。邑诸生。幼丧母，事父及继母以孝闻。与继母弟友爱。顺治间，海贼入村，章美以父病足，负走，为贼所得，贼欲质其父，遣章美归，鬻产来赎。章美曰：“父老矣，不堪久困舟中，愿以身系，使父归。”从之父，归鬻产得金，时章美次子为他贼所得，父先往赎，贼闻之怒，缚章美桅樯上，煅炼备至，章美无怨言。会官兵至，贼取被掳者悉投海中以去。章美遂遇害。乡人自贼所归者，述其缚桅上时，犹赋诗念亲云。诗曰：东洲落日洪流紧，一望亲闾何所之。

毛浚，字孟深。邑庠生。性纯孝，五岁母歿，父元钰病足，浚视寝膳，不出户者数载。年十五，父歿，事继母以孝闻，弟宜声为贼所害，浚以计得贼及赃，告县捕斩之。尝与里人黄六亨善，六亨被寇掳，不得赎，浚以果园质数十金，卒赎六亨。著有《敬义堂集》十卷。

繆志和，字子介。龙眼都人。弱冠能文，事父母以孝闻。性和厚，邻人梁某家贫，常周其困。梁酗酒，击志和子几毙，志和不校，梁死，且施棺以殓，人称为长者。年荒，嬰孩载道，收养之，死而无告者，葬埋之。事母黎，进膳必旁侍，婉容劝餐。母病每吁天愿以身代。已有疾，必强起行坐，恐貽母忧也。以母老不仕。顺治辛卯恩贡。同年有得美官者，或劝驾，志和曰：“钟鼎虽荣，弗易膝下承颜之乐也。

”年七十，孺慕弥笃。母年百有三岁，志和卒，祀乡贤。

毛天翀，字汉翼。孝廉可珍第五子也。好学能文有才略。为邑诸生，旋食饩。伯兄尝被诬，天翀罄产出之。会邑令姚启，圣罢官羁旅侘傺无聊。天翀与相契，以千金资其入闽，后征讨台湾，因辟天翀为从事。军兴旁午，凡百所需，天翀无不立办。台湾居海岛，非船不进，时泉州永春山峒多天木，而峒蛮负险恃顽，乃署天翀为永春博士，理谕诸酋，遂得木造船，连复十九寨，及金门、厦门诸隘，抚剿并行，多用其策，叙功二十二次。归适遇宗人构难，走避湖湘，启圣求之不获。后以选贡。就惠州永安教谕。初，天翀之署永春也，留心造士，比至永安，尤加意作养，有贫不能赴试者，助以资斧，自制府中丞以下，咸褒美之。迁湖广安仁令，甫下车，禁陋规请托，兴利除弊，县有停棺不葬者，劝其豪右，捐地任民安厝，贫者捐俸饮之。半载葬棺数百，无复停柩。舆人有来暮之歌。去任日，攀辕者相属于道。卒年七十有九。

韦元懿，翠微村人。康熙五年，海贼袭翠微，元懿招众击之，遇贼老鸦口，懿吼声如雷，贼皆辟易。俄而骁贼舞刀向懿，懿手格贼刀，贼亦手接懿刃，相持未决，懿头触贼胸仆地，贼众奔溃。次年，庵山被寇，率众赴敌，贼闻其勇，遮道击之，遂遇害。乡人祀于西社。

容圣时，南屏乡人。康熙初，贼攻县城，圣时腰利刃，以两藤牌自捍，逾城而下，斩贼阵执大旗者，官军开门乘之，获全胜。以功授把总。

李龙翔，字御升。康熙壬子举人。曾修县志，号为精确。选知建平县，地瘠民贫，至则条陈利弊十余事，上官嘉纳之。性廉惠，无刻核行。然遇梗法者，亦不稍宽假。有武举逼良家妇投塘死者，立捕治之。俗溺女，榜禁恺切，委曲开导，动以天良，陋俗遂革。两经岁饥，设法散赈，存活无算。修义学，课士，以卓异荐，年老乞归。子孔昭，由增生贡太学，诗文负盛名。著有周易集说四卷，宁远堂诗文集六卷。

杨必，名字非庸。南门外人。状貌魁梧，读书通大义，遇事勇为。申尹良翰奇其才，委团练乡勇，为捍城计。康熙丙辰，抚贼陈器瑜率盗艘数百，分扼海口，渐进县城。必名赍蜡书间行求救，遇贼胁降，不屈死。

郑九琨，字公性。莲塘人。前山寨把总。康熙丁巳七月，海寇鍾吉生夜劫翠微村，琨闻警率亲兵十一人驰至村口，谓众曰：“贼贪财物，不虞我至，我分三队从四巷杀入，黑夜中一可当百。”众应诺。徐千总立山顶以旗招琨，且谓之曰：“众寡不敌，毋徒自苦。”及曙，贼掳男妇而出，九琨忿曰：“为朝廷守土，纵贼横行，何以生为？”立呼十一人下山，扼贼路口，贼呼雅林与敌，琨砍林额小镜，镜碎有声，吉生以鸟枪中九琨，九琨挥亲兵退，犹挺立作击贼状，贼不敢遽近，伺已众越田

，方仆地死。

鍾宝，字悦豪。旗澳人。质朴有勇略，谙练风潮。姚启圣宰邑时，见宝谓人曰：“此信布侑也。三藩叛、圣祖命康亲王传贝子南征，辟启圣为参谋，命宝从击浙之紫阆山、枫桥、平之。启圣授温处僉事。康熙十四年三月，命宝破石矾、夺杨梅冈，复宣平、太平岭等处，授把总。十五年，宁海将军贝子传喇塔、授宝千总，令剿石塘，宝攻破贼巢，夺盔甲器械山积，连夜进兵，复云和、龙泉、松溪诸县。十六年，启圣擢福建总督，宝从入闽。是时郑经据台湾，遣其将刘国轩等取长泰同安，进围泉州，再逼漳州，兵号十万。平南将军贝子赖塔欲弃城走，启圣曰：“贼狃胜而骄，出不意奋击之，灭贼平海，在此举矣。”启圣之子宜、力能从奔车后掣驷马，皆却步与宝结为股肱，并杨捷、张黑子，赵二、王三痴等十人皆，勇冠三军，乃命闭城门韬弓，卧鼓。忽一日，天大雾，吹笛策者三，宝等突开城门，持长戈而前，启圣以精兵继之，呼声震天。贼不辨众寡，自相踣藉。自辰至酉，杀经将郑英、刘正玺等十余人，斩首万余级，生擒二千余人，溺死炮毙者无算。国轩奔海澄，乘胜复长泰、同安。是役也，宝等以兵五千破十万众，事闻议功。十九年正月，授宝游击。二月，攻克海仓，复陈州三义河，玉洲码洲等十九寨。三月，复海澄、厦门、金门诸岛。二十二年，台湾平。加宝左都督。二十八年，授陕西潼关参将，莅任七年，兵民安辑，寻升固源镇西路副将，统辖八路官兵。训练有方，防卫甚密。四十三年三月，以病卒于官。年六十。宝驭下以恩，在潼时，奉部追取前各营因饥借折米银两，宝念士皆不能偿，具详请免，上官屡驳，宝抒诚恳切，得疏允免追，泰军感泣。教民造筏潼水、捕鱼为利；三十三年，淫雨涨溢，民乘筏走高邱，全活甚众。靖远军多恶猾，以牧马践民稼，宝严约束之，令诛其越界者，值岁饥，出米二千余石，亲给赈济，秦民以苏。华阴城西建祠绘像祀焉。从宝征浙闽十八人，同邑者江起良、姚逢生、苏义和及宝弟豪、义和、旗澳人，授千总衔。豪授福建援剿前营守备，加武德将军。

黄朝绅，号端庵。伯兄早逝世，抚幼侄如己出。尝割己田三十亩以供祖祠祀事。康熙丁丑、癸巳岁饥，出粟百石以赈，邻人德之。买紫马岭地作义冢，俾贫人无葬地者托焉。邻邑关某，侨居里闾，遭丧鬻子以殓，绅悯之，乃为焚券，仍助之资斧而归。有钱姓以所居质白金若干，久而不偿，侦知其贫，亦还其券，两举乡饮正宾。

黄铭，字镜心。以名诸生贡太学。泰泉五世孙也。泰泉父祖相承，著述甚富，甲于岭海。历久颇多残缺，铭父逵卿广为购求，次第付梓。铭善成父志，不惜重貲，复加搜罗，补辑校刊。先世有祠在会城承宣里，毁于兵燹，逵卿极力经营，仅能恢复旧址。铭复捐资创造堂宇，先人双槐尝建友琴堂，泰泉有涵一亭，遗迹就湮，铭买地莲峰之阳，重建亭馆，与友人读书其中，家学相传勿替。

欧国平，西门人。事亲孝父病长斋茹素，沿道稽首祷神，愿以身代。居丧毁瘠骨立，母冯氏泣曰：“儿诚念父，独不为我计耶？”乃矍然起，经营葬事，未数年，母

病且笃，国平晨夕侍药，号泣呼天，刲股肉以进，母食之果愈。

何积，字善家。岁贡生。小榄人。少孤，遭丧乱，流离播迁，失其母坟。稍长寻之丛林深谷间，足迹几遍。每逢寒食日，辄悲号不食，如是者十年，一老翁感其诚，指而识之。性友爱，事从兄如严父，家非裕，而轻财好义，有孝廉梁三寿者主其家，陡病药罔效，医者促其归。积曰：“吾家即若家，何以归为？”逾二日卒，为之治丧殓如礼。人益难之，著有《逆旅山房诗》若干卷。

麦陟瞻，小榄人。父死四月而生，尝以不逮事父为憾，奉母益谨。母善病，长斋吁天，请代母。歿哀毁骨立，其舅氏死无子，为置田立继，闾里中死而不能殓者，与之棺殓，而不能葬者与之地。今驼峰阳高坟累累者，即其义冢处也。

徐士桂，字贵任。世居前山寨。家贫采樵，至风门坳，山路巉巖，叹曰：“他日得志必辟此以利行人。”后筮仕时，即践其言。官至春江协镇，军政赫然。年七十告归。睦邻恤族，乡人德之，卒年七十八。

黄与京，号会同。少读书，知大义，其族与鲍谭二姓同居园林小村，百有余年矣。与京爱犁冈山水之胜，雍正壬子，出资购得其地，胥三姓而迁之，负担版筑之费，有弗给者，与京罄其资助之，乡人感其高义，因以号名村，曰：会同。

繆时鸣，号西泠。少孤，事母兄以孝友闻。性倜傥仗义，人以急相投，罄赠无德色。善属文，尤长诗赋。生平酷嗜山水，尝往来罗浮四百名峰，所著游草，载罗浮志。其云萝洞及七峰、唱和、南岳纪游诸集藏于家。

何儒，字席珍。幼以孝友闻。执亲丧骨立，比葬筑室墓旁，晨夕号泣，闻者怜之。与弟衡友爱肫笃，白首不析箸。故人李某，家五丧未举，厚助之，悉令安葬。乾隆元年，荐举孝廉方正，辞弗就，以明经终。

李修凝，字开至。仁都人。由岁贡任开平县训导，崇正行，敦伦纪，力更士习，老告归，辟紫里怡园，啸咏其中。两举乡饮宾；卒年九十三。著《尚书正义》、《小香亭稿》、《宦游草》，学使惠士奇题其集，有香山香瓣接江门之句。盖白沙桑梓儒宗，尊闻行知于其道，实有所得，不但声籁偶似也。

何士蛟，字冀北。少学骑射，补邑武生，旋改文。乾隆丙辰乡荐。丁巳登礼闱明通榜。任龙岩州州同。公正爱民，州盐价视米价为低昂商人欲增盐价，馈以千金不受。商賁缘大尹，业已给示，士蛟抗言事关民食，誓以一官庇民乃中止。州人感德，树大旗于道以表之。署宁洋县，革粮务折色加耗旧规；调署泉州海防同知，因病告归。卒年八十三。子子携、戊子乡荐。

韦易，字文衍。翠微人。邑诸生。寄情诗酒，周览罗浮，丹霞诸胜，所至题咏，落落有奇气。雍正乙卯膺岁荐；乾隆丙辰应举博学鸿词，合省得七人，易列第三，已给咨就道，缘病谢归，年八十卒。著有《四书录解》、《尚书》、《毛诗录解》数十卷、《四书制义》四卷、《诗文集》四卷。

陈书，字元官，西门人。性耿介，安贫乐道，研究理学，工文艺诗翰。乾隆戊午举人。任河南嵩县知县。邑有强奴以贾致裕，叛其主，复夺主人之女为妾，屡控于官，奴以贿通官吏，不得直。及闻书宰是邑，将复控，奴惧，使人道意，致千金为寿。书怒却其金，将拘之，隶役皆与奴厚，谓曰：“得毋不满其欲乎？”复益数百金献之，书益怒，立拘奴至。昔受贿者，皆为缓颊，书不听，而奴已援例授职，岸然入。书褫其冠带，长跪受讯，遂科其罪，以薄产资其女以终。举邑称快。书知为大吏所忌，遂乞假归，讲学丰山书院，以廉隅励后学，晚岁道益高，邑令常造访，时有服亲罹法，而书语不及私，尝预修邑志，以议不合去。所著《光屋文稿》四卷，冀北王植谓其步泰泉而祖白沙，腴于道德，发为文章，义利之辨素严，而身心性命之地确乎有所见，故可传也。卒年七十一。

卢文起，字深潮。上栅人。受知惠学使士奇，补诸生第一，旋食饩乾隆十三年成进士。是时士奇罢官归吴，贫售所居，文起合同门生醵金六百赎之，传至都下，有弟子赎回红豆斋之句，遂成美谈。谒选得湖南临湘令，调贵州仁怀县。山僻民贫，往往鬻子女偿征税，犹迫迫呼。文起至，宽贷之，立除其害。人苦不知书，文起颁刻诗文数种以为程式，文教以兴。时有某妇与奸夫谋杀其夫者，投山穴中，访数月，得尸不变，吏白当拆验，文起曰：“伤痕故在，而必拆其尸，伊何罪也？”因请于抚军，谓贵州山高土厚，凡尸不变而可验者，概勿拆。抚军嘉纳，方拟登荐剡，病假归，旋改教授仁怀，民为建遗爱祠。家居与兄文兴友爱最笃尝率乡人作官涌桥，民免病涉，张司马汝霖有记纪之。

郑基，字筑平。得都人。少孤力学，为诸生以诗文著声，贡国子，援例移名吏部，以知县用。筮仁凤台，凤台于凤阳府为偏县，基下车辄问民疾苦，县之东北，乡有通川三，曰：黑濠；曰：泾泥；曰：裔沟；汇颖上，蒙城诸县水以达于淮，县人统谓之三河。岁久三河尽湮，上流水无所泄，秋雨暴涨，挟悬出反入之势，争注凤台，弥望成巨浸。农时失业，基因郡守具牒上请，时裘文达以户部侍郎出治淮颖诸水，先与江南大吏集议所浚地址，独不及凤台，疏稿已具矣，得牒颇难之，基侃侃陈利害，及畚揭木石之用，广袤之势，程工久暂之期，倭指无遗算。裘广其才，为补疏得请不逾时工蒇，民不知役，农安其居。县偏隅有鲁松湾，地远于淮，而土势洼下，濒岁患潦，基捐俸为之倡，士民继之，筑建堤障，遂成膏腴。擢寿州知州，州与凤台接壤，基故知州有安丰塘，周百里，灌田四百顷，楚令尹孙叔敖所治之芍陂也。岁久塘圯，为农田患。基审核旧制，复缮旧塘，为水门三十六，为闸六，为桥一，其旁则为埭、为堰、为圩，启闭以时，污莱悉辟。尝循行阡陌，见沙地硗确，多不治，以为古者淳卤沃瘠，分殖五谷，宜仿其意行之，教民种山薯 佐麦菽，寿

州不知蚕蛾，而地多椿树，可饲蚕。乃购蚕种于山东，教之饲养，于是寿州农功桑功并兴，其后凤阳亢旱，民多流离，独凤台寿州以水利之修，收成稔于他县。基在寿三年，令行化洽，升泗州知州，擢淮安府知府。淮安故水乡，基夙谙水利，谓聚众水以争一门，淮所以溃也。疏之其不可缓。于府之东，开浚东乡涧市河，于北则开渔滨山字河，于西则开护城河，壅滞既通，田陌资灌溉，引其流兼以济漕运，民便之。基于水利讲求最熟，退食之暇，涉览前史，遇河渠水利图经诸册，丹铅殆遍，以故源流洞悉，行之极著成效。授江南分巡道命甫下卒，年五十六。

刘鹤鸣，字禹甸。城东人。乾隆庚午举于乡，官钦州学正，谪湖南澧州，授徒讲学，从者常数百人，寓澧三十年，性恬静、垂帘一字，或偕一二知己，寻水望山，吟咏自适。晚年学益邃，问奇者日益众，能文者多出其门，学者称松崖先生。尝论诗，谓如建章宫、千门万户，当阅历使遍，然后抉去藩篱，别寻妙悟。其题李遐龄诗曰：在心为志，发言为诗，读之而茫不知其志之所存，诗云乎哉。故其诗缘情指事，因物寓怀，松崖之诗，松崖之性情也。粤诗人近推冯敏昌为一大宗，鹤鸣雁行其间，当无愧色。兼工于文，湘南碑版，多其手著。有松崖诗钞。

李遐龄，字芳健。岁贡生。幼颖异，亲有忧戚，婉询曲慰如成人。或怒责诸兄弟，辄泣跪求并责。家故贫，授徒奉母，兄嫂早世，抚其孤逾己出。弟彭龄卒，亦如之。祖祠祭田豪家所夺，父若兰将讼之而歿，遐龄承父志，卒复所侵田，族人酬以金，却之。七岁学诗，时有奇语，尤长于乐府。刘鹤鸣在澧时，谓为桑梓夕秀。补弟子员，归里与顺德黎简遇于舟中，谈诗达旦，叹曰：“此今日南金东箭也。”所著《勺园诗钞》四卷，江西吴嵩梁谓其挺脱处似杨诚斋，瘦劲处亦似二樵云。

郑交泰，字协德。平岚乡人。少读书强记，屡试不售，由例贡生就铨，拣发广西，补苍梧县知县。丁内艰起复，知安徽望江，阜阳县，迁亳州六安州知州，擢嘉兴府知府，授浙江督粮道，失察曹案，降调归。交泰性英毅，善听断，能以片词折疑狱，当其平反，虽大吏盛气临之不能夺。其署上林也，有谋杀入于河中者，初不得主名，其妻樊曰：“杀吾夫者，必盘特串也。”前官坐樊知情，以同谋拟磔。交泰至，而虑之。樊在母家，尝与盘特串通，将嫁，盘特串曰：“吾必杀而夫，及夫见杀，故知之，而实非同谋。”申大府不许，以去就争，卒得释。南陵知县陈科联者，潮州人也。以赃钱六十千被论时交泰署怀宁县，抚军雅闻其能檄审之，得其胥役及家人作奸情弊，陈坐失察，以稿入复，抚军声色俱厉责曰：“而为同乡徇邪？”且掷其稿于地，交泰俯拾其稿，徐对曰：“按牍载勒赈者五人，今五人欠缴谷六百石，陈令果贪，岂索钱六十千而止。况陈令首捐米二百石，纵贪六十千之钱，何不少捐三十石之米，而作此周折乎？且察其事，与官无涉，何用徇为？大人原籍浙江，今隶属下者不下十余员，平居接见，及题升调补，未尝异视，今乃以徇同乡罪审者何也？”抚军默然。旅见者六人，莫不咋舌，而交泰进退如度。明日案定，从交泰议。知亳州时，滁州有高永威者与其党八人横劫，旋获二人于定远县，据词当五人论斩，二人遣配，一人枷杖发落而已有司锻炼周内之，以论斩七人题达，寻获四

人，其词与前二人如出一口。年余案不能定，抚军檄交泰至鞫之，执五人论斩之议，提刑怒欲中以失出罪，交泰抗言曰：“狱贵得情耳，以二命易一官，亦无所恨，且定远滁州初报，犹在失出罪也，失入非罪乎？若以题达为定则，皆斩之可矣，奚审焉？”长揖而出。后抚军廉其实，以交泰为然，提刑亦悔谢。当是时，交泰治声闻于江南北，凡疑狱积年不能决，交泰一再鞫必得其情。性勤敏，案无留牍，尝以旬日断释积囚四百余人，民免拖累苦，囹圄几空。去后百姓皆思之，所至无不以争得好官为快。初，需次都门，谒阳春谢仲玩，谢故湖南循吏，语之曰：“献狱而用刑，何以得情，惟平心静气以情动之，以理折之，彼即倔强狡猾，第令直跪一二日，徐与之言，言多必有破败，从其破败追求之，则其情露矣。既毕言其情，令少休，且饮食之，复问，越日又问者三事之次序，年月如一，则为真情无疑，否则跪时假捏耳，君其慎之。”交泰用其言，故历官州县二十年，而招解罪人，未尝翻一词云。

黄绍统，字燕勋。前明祭酒佐七世孙。统八岁而孤，即知媚学。家苦贫，尝啖数螺毕一饭，怡然自得。而奉母则甘旨常充。母卒，卧灵帷三年，不入内室。抚兄之子女如己出，以次婚嫁。乾隆己卯举于乡，选石城训导，进诸生以圣贤实践之学。随其资性，曲为接引，诗、文、书法皆有程式。单寒之儒，尤加意拯拔。有父子兄弟同堂，及门及年届耄期，尚躬行执贄，一时学者皆称仰山先生。仰山者，课士之堂也。尝自署堂楹云：为伦类中所当行之事；作天地间不可少之人。在任十八年，擢琼郡教授，士民饯送二十余里，设供帐三百余所，为从来司铎所未有也。统博学能文，尤长于诗。钦州冯编修敏昌至会城，见其诗，大为倾倒，遂订古交，时人比之廉庆。其诗不炫异，不求工，不规规摹仿，即事抒怀，自合温柔敦厚之旨。著有仰山堂遗集，古文五选，石城县志，旧志脱略过多，为稽献征文，补其未备；特次养济院于寺观后，谓僧道皆无告之民，有寺观以居无告，天下无一夫不获其所矣。体例独创，而善亦隐然胞与斯民之意，时论韪之。

李振芳，初居镇南村，未成乡落，务农勤俭，积百余金，尽舍以创辟里闾，卒后祀义祠。

詹官，字焕宾。乾隆庚辰乡荐，由大挑试用四川。初署梁山，民为勒去思碑。时值金川军兴，委解军饷马匹，事平改发贵州，历署青谿、施秉县、广顺、镇宁、开州，均有政声。补余庆，值岁荒，设法赈恤，存活甚众。创他山书院，宏奖士类，严缉奸匪，良善以安。宦黔十余年归里，贫如寒士。初，官去职旅居贫乏，民时以钱米馈之，有乡民呼冤于其邸门外者旁人推之不肯去，曰：“是吾旧父母也，岂今日不为吾民剖析乎？”既归里，黔人有贾于广州者，犹问安否，不绝其遗爱在人如此。

陈兰芝，字拂霞。小黄圃人。补弟子员，官山东高唐州州判，州南旧无河，岁常被潦患，民就食他所，兰芝阅地势，得漯河故道，凡数百里，直抵禹城，湮已久，请

于上官，奉檄督浚，役民夫万余人，工未半疾作雨至，州长议且罢役，兰芝艴然曰：“河稍疏而下流壅，一旦水决，是以邻为壑可乎？”亟力疾祷于城隍神获晴，露宿河干督役，工甫竣，潦果大至，田庐无恙，州民与邻境之民皆欢呼，为陈公河。会筑城垣，兰芝于估计外，命多造砖数百万坎而瘞之，州长以糜帑诘，兰芝曰：“城工保固，十年限内无开报例，乘便预备，不至重费劳民也。”明年夏雨，西隅陡塌，即发前砖整治，役不告劳，人咸服之。金川用兵，上官廉其能，令解兵饷百余万赴军，经蜀道阻雨雪，众哭欲死，兰芝结以恩信，崎岖万状，曾无反顾者。及抵军门，尚未及限。尝搜缉王伦余党，分别泾渭，多所存活。路见遗骸，则然泪下，或谓逆骨何足惜？兰芝曰：“愚民从逆，国法已申，掩骼葬骼，以广法外之仁，不亦可乎？”因命所在检埋，数县遗黎，闻而感泣。寻以军功优叙，兰芝忽勇退，病假乞休。州南百万家，顾祷以身代。去之日，哭送数十里不绝。解组后，遍游泰、岳、嵩、华及西湖、天台、雁宕、罗浮诸名胜，撰有《岭南风雅》、《鲁蜀文献》、《锦岩志略》，增补校刊，则有《家礼辨定》、《岭南名胜记》、《愿体集》等书。

麦佑，字启正。小榄乡人。乾隆三十四年进士，授刑部主事，升山西司郎中。佑生有异质，读书能过目不忘，人皆以神童目之。至是治申韩家言，才识过人，每有疑狱，尚书辄令专平，皆成信谳。居常念刑律出入，生死所系，故性虽明敏，而定一谳，必极踌躇审慎，往往形于颜色。秋虑囚，披稽案牒，夜至漏下数十刻，犹闻叹息声。家人请小休，则曰：“吾职也，子姑去。”四十四年俸满记名，以繁缺知府用。时刘丈正公以大学士管部事，雅器重佑，谓秋曹中有识而能断，无出佑右者，惜佑去，遂奏留。旋积劳卒。生平无他嗜好，惟耽书甚，退食暇，门无杂宾，但手一编。曰：“吾以代宴会谈剧也。”著有《惠游诗草》、《漾波楼诗集》、《咸斋文集》。

黄标，字殿豪。其先潮州南澳人，以宦居籍香山。幼孤，负薪养母，读书知大义，膂力过人，能开二石弓，左右射。甫冠，充南澳步兵，拔外委。乾隆四十五年，补香山协镇守备。五十五年率舟师擒洋匪吴昌盛等于濠州，并剿狗头山盗，记大功。嘉庆二年，授广海游击。寻以功议叙，授海门营参将。三年，复以功授广东左翼总兵，赏戴花翎。七年，惠州贼陈烂屐四盘据罗浮山，制军吉庆檄标带兵，会同提督孙全谋赴博罗，分道拒战。标选健卒从间道埋伏，密授方略，伺间轰炮，贼骇窜，标冒险深入，焚其火药局，大兵继至，遂破羊矢坑，罗溪等处，直捣贼窟，擒其魁。贼平，事闻赐玉扳指带头荷包等物，且褒以岭海要臣，不可旦夕离职守。特命绘像以进。旋奉旨引见，封武显将军。八年，侦知海贼大队出掠，与孙全谋出海捕之，贼遁广州湾，湾险不可进，标曰：“守其隘口，不半月贼必乏食，可尽歼也。”孙以相持日久，有风涛患，实妒标功而欲养寇，乃少分兵，令标孤守隘口，贼侦知官兵舰少，冒死冲突，标知众寡不敌，乃占上风发炮，烟迷贼艘，佯作追捕状，全师以退。仰天叹曰：“失此机会，海氛无已时矣。”愤懣成疾，卒于电白营。病中犹跃起大呼，纵船纵船云。标生长海壖，习知水性，出海攻贼，亲持舵驶帆，运炮

发火如弄弹丸，一舟先，众舟尾之，浪高如山，随风上下，若履平地，贼畏之如虎。自结发从戎，出海未尝失利，剿贼歼其首恶，不妄杀，所获赃，以其二赏将士，其一为修船费，分毫不自取。降者量才委用，俾自效，擢显职，为良将者数人。所习韬铃，不自秘，麾下承指授，建殊绩者尤多。于东南海道浅深险易，进退战守之处，黑夜皆能辨职。望日月星斗，知风雨，人咸目为海疆长城。手注测天赋，及海疆理道图。卒年六十有二。

李胜南。字德聪。隆都人。生平倜傥有奇节，贫而好义。尝于象角水步拾一囊。白金几二十斤，胜南念舍而去，他人将拾之，乃怀而坐待，须臾一人至，周视瞿瞿，遽欲赴水死。胜南挽而问之，与囊中数合，探怀返之，其人奉三十金为寿，胜南麾曰：“多之不图，而少取耶？”其人泣拜去。道旁多称叹者。卒年七十五。

何其英，字琼玉。小榄乡人。少孤，事母孝。乾隆六十年，由举人挑发陕西，以知县用。明年，摄凤县事，兼署留坝同知。四川白莲教匪倡乱，县之斜谷与褒城，连云栈通，旧有马二百匹，无事寄牧于民，有事则征之，民受其累。其英至，裁之。军兴、役民输运，困蹶道路。其英乃捐俸购骡驮载，民力以纾。留坝民有号草上飞者，土恶也。纠众助乱，抚军某募乡兵剿捕之，名曰秦师，师故无赖子，将又无律，所至淫掠，民疑为贼，发炮御之，毙六人。于是督师某势赫甚，闻民炮杀其卒，怒欲坐以谋反，民惧逃匿穷林中，天方大寒，多冻死。其英招辑之，且挈若干人与秦师质，其英曰：“秦师淫掠，民疑为贼，故发炮御。实非谋反，督师不能卫民，而反以害民，复听其诬说，不激成祸乱不止。乡人围练以御贼也，秦师淫人掠人，非贼而何。民实击贼，官又罪之，将何所措手足乎？”其英故有治声，督师某耳其名，至是语塞，怒乃解。县西境与四川为邻，贼尝侵轶。其英则严设备不少懈。尝之西安，中途闻警遽反，一日驰四百里，难民纷纷趋城，门者方拒争，其英至，命悉入，即登陴为守。寻与游击苏维龙击贼进口关，杀四十余人，贼披靡去。已复来寇，苏游击战死，远近皆震。其英设奇守御，贼一岁凡五至，不能得毫发利，自是不敢犯。大府廉其能，题补宝鸡县知县，时嘉庆五年也。宝鸡为出栈北口，差徭浩繁，较凤县为难治，其英居数月，尽得所不便于民者，次第革之，邑民大悦。其英视民如子，苟可以保民，恒不顾身家任之益坚。其在凤县也，苏游击败于沟口，乡民避城中者数万人，将军某故有威，自抚军以下，见之无不委蛇行者，时统索伦兵至，索伦兵素横，其英虑扰民，令闭城。将军谕开门不应，以节召其英，其英立楼橹上，与将军语。将军曰：“何故闭门拒我？”其英曰：“知县职司守土，贼逼近城，鲜守兵，又无外援，安得不严守御乎？闭门拒贼，非拒将军也。且将军统重兵以讨贼，贼在城外，而将军必入城中何？”也将军嚅喏，顾左右曰：“去之，彼强项令无与语。”其英官凤与宝鸡，凡十七年，不妄取民一钱，兵兴旁午，民不知役，及归，走送者数万人，过凤翔，岐山两邑民亦沿途奉酒相饯，人谓二百年间，邑士出为循吏者，惟詹官及其英云。归辟地半亩于葵水之滨，杂蒔花木，颜曰有巢。读书课子，不与外事。卒年七十有一。著有《巢诗集》二卷，《文集》一卷，《陇右月纪》一卷。

郑应元，字丈川。城内人。乾隆四十六年进士。由庶吉士改授内阁中书，充三通馆纂修官，兼总校官。引病归。嘉庆十年，海寇阑入内地，应元偕从子敏达，从兄龄，邑人刘鏐辈出，与邑令彭昭麟筹守御，相度险要，设犁头嘴炮台以当东路，易上闸炮台水闸之向，添蚝壳坝以当中路，增港口碉寨，塞浅水湖，以防其前。塞南九南六滘以防其后，内守甚严，故贼屡至不得逞。十四年夏六月，总兵许廷桂败歿，逃兵闯入城夺食，应元倡议首施赈米，以安难兵，次募乡勇以屯海岸，邑以镇定。未几应元卒，年五十五。敏达，字逊江，以例贡捐都察院经历乐于周急，族多贫乏，敏达请于母，捐田七十余亩，助婚丧费，倡建五峰书塾，延师主讲，俾不能自备束修者就学焉。与彭宰善，御贼之赀，彭一属之敏达，期以藏事偿，敏达诺之，称贷数万金。敏达遽卒，彭亦去官，执逋券者索诸其家，其子鬻产以偿，家遂落。应元从子廷槐，字昭甫。性淳谨。嘉庆十五年举人，官内阁中书。林清之变，值宿内廷，不得食者二日。贼平，晋两阶，旋乞假归。道光六年，往港口炮台验视火药，药藏罌中，岁久凝结，从者以铁器剗之，药燃，廷槐受伤，数日卒。

方天根，字应复。邑诸生。持躬狷介，沈潜敏悟，所为诗古文词，绘事、篆刻皆卓然可传。年三十八卒。与顺德胡同谦、张玉洲并为时彦惋悼。黎二樵少所许可，独雅重天根。哭天根诗云：使我同斯世，得君诚古人，小时闻孝友，一往不淄磷。可以想见其为人。有《少游草》，多所散佚，从弟绳武与同志搜集遗诗梓之，题曰：《风佩轩遗草》。绳武，字显谟。邑诸生。性峭直，好面折人过，而其中实无城府。少与天根以文行相切磨，馆许邑令署宅时，有某氏子治具招饮，陈百金求援，未启齿而绳武已出于户。雅嗜酒、尝为污漫游，所至辄呼饮必醉，虽千锤未尝辞也。诗笔豪健，所学成就于天根者为多。年五十卒。著有《七峰第一峰草堂诗》集。

程仰添，亨美人。家赤贫，孝事瞽母，每得一二钱，宁忍饥寒，市饼饵以啖其母。人惠以酒肉，必先奉其母而后食。或已不食而劝母，母问之，则谓已已食矣。居尝拍掌抚髀，曼声高歌，求得其母欢心。人谓仰添未尝学问，而与老莱戏舞事同，盖发于至性云。

黄琮，字节庵。标次子也。有父风，援例捐千总。嘉庆二十二年秋，发广州右营效力旋署千总，改内河水师，历署碣石镇守备都司，虎门提标守备千总，道光十九年春，署香山右营守备，题升碣石右营守备。鸦片烟禁起，钦差林则徐至粤缴烟土，驱趸船捕私贩，令綦严，总督邓廷桢，提督关天培，交荐琮可大用，遂檄催诸趸赴龙穴缴烟土，从参将李贤缉东莞镇下村私贩，擒其魁万卓、邓实英，酋貊麦玛礼臣义律，为汉奸所喉，抗弗缴，钦差总督震怒，檄琮帅师焚其趸。八月初五日，琮扬帆至香山之潭仔洋，谍报趸船贩如故，琮策夷必抗拒，且船炮坚利，难以骤攻。乃使敢死士乘小舟藏火器于舱，伪为鬻鲜菹，买烟土者麇至，发火器投之，风急帆樯皆焚，须臾尽。事闻升都司，先换顶戴。诸夷日晡必于濠镜澳南北环游弋，琮侦知之，以兵围其三板，获貊麦玛礼臣二酋，长跪乞命，兵士怒欲沈之海，琮曰：“是将羈縻之，以制诸夷之命者也。”二酋叩首乞食，琮使厨人以瓦缶盛饭杂酒肉食之。

，二酋以手攫食，如乞人状，兵士乃大笑，锁其颈至省，系诸狱。钦差大悦。旋豹麦得释，大举入寇，琮拒之于虎门沙角大角炮台，连日接战，受火器伤，事闻赐白金三十两。二十年夏四月，护理崖州协副将，升补海门营参将未赴卒于崖州。

黄培芳，字子实。绍统子。明祭酒佐八世孙也。培芳幼聪颖，应县试时，题诗山寺，方绳武见之，访与订交，二十补弟子员。嘉庆九年，中式副榜，肄业太学。道光二年充补武英殿校录官，十年选授乳源教谕。历任陵水县教谕、肇庆府训导。培芳秉性孝友，操履端洁，居嫡母生母忧，俱哀毁尽礼，三年不入室。侍从兄沃棠疾，不避劳瘁，与从兄干芝辈互相砥砺，勉承家学，早为郑士超、冯敏昌器重。当道闻名、延课子弟，未尝干以私，游其门者，名硕辈出。如许尚书乃普、罗侍郎文俊，其尤著者。官乳源时，新进诸生书券为贄，及送出门，反诸其袖。乳源大旱，徒步入山，祷雨立应。人呼老师雨。调陵水、以士习朴陋，罕睹书籍，因详列教条，及当读书目，遍谕乡间，受学者麇至。邑有顺湖书院，膏火不敷，三昧寺有余田，僧徒启争，密言于有司，驱僧拨田贍膏火。时海贼萌蘖，居民避入城，商旅不行者数月。县令以公事赴郡，培芳飞书崖帅请援，得无事。任满陵人俎豆之。祁宫保督两粤时，用培芳策，各属团练，南海等县分土著民为七社，不费官帑，轮戍省城。又议建各仓储谷，备不虞。叙劳加内阁中书衔。复与祁商榷，上变通考试，遴选真才，疏欲仿唐制举科目，并司马光十科取士条目，以罗群才。祁称其深切时务云。世居省城泰泉旧里，藏书五万余卷，咸丰丁巳，英夷入城，居民迁徙一空，培芳以先祠图书所在，坚守不动。曰：“脱有不测，则大夫死宗庙之义也。奚避为？”因与坊邻竭力联卫，卒无恙，人服其定识。性好游，尝六上罗浮，谓罗浮，粤望也；可名粤岳。因自号粤岳山人。又与张维屏辈，于白云山濂泉间筑云泉山馆。中祀苏文忠公、崔清献公及文裕公以志景仰。著述甚富，尤邃于易，诗文书画俱工。北平翁方纲目其诗与番禺张维屏，阳春谭敬昭为粤东三子。江南盛子履又推培芳，及张维屏、谭敬昭、顺德吴梯、黄玉衡、吴川林、联桂镇平黄钊为粤东七子云。咸丰丁巳，年八十，重游泮水。卒年八十二。

沈志亮，名米，以字行。先世福建人，贸迁来澳门，遂家于前山寨南之龙田村。慷慨尚义。道光十六年，英人辟驰道，毁居民冢墓，灭骸骨，和议成，复大辟之，酷甚于前。民诉官，置不问，志亮先墓亦受害，思所以报之。谋之其乡荐绅鲍俊，俊谋之总督徐广缙，徐曰：“此诚可恶。”鲍还以告，志亮乃与同志郭金堂等数人，怀刃伺之；英酋素负勇，尝因战折其左臂，常语人曰：“澳门一掌地，只手用不尽也。”出入皆以兵从，志亮等自春徂秋，不得间。久之，偕西洋酋数骑出，志亮乃使或为贩鱼及鬻果蔬，驰担于道，若观驰马者，金堂又以野卉盈束置于道，马闻香不肯前，日将夕，天且风，马腾尘眯目，志亮俟其出，作投书状，英酋俯接而视，遂出刈刀钩其颈堕马，杀之；以夸示其手也，并断其手，埋诸山场之外。金堂杀其从者，西洋酋疾驰入关，皆惴惴不敢出驰马。未几，诣军门索杀人者，制府欲以死囚者代，奸人恚之，索酋首为证，制府不得已，趣鲍劝之出，志亮乃与金堂发所埋首与手至省，自投下狱，金堂语志亮曰：“尔有母无子，不如我争自认。”而卒坐

志亮，制府恐民变，昏后即弃市。金堂论遣戍，时道光二十八年某月日。凡冢墓之受害者，其子孙墓祭日，必先望空拜志亮，后遂立庙祀之，以金堂诸人配食。金堂、望厦人，死于狱。

韦允升，字东暄。翠微人。少习兵法，尤娴击刺，目视日不瞬，怒则须眉尽张，由监生捐千总，中道光戊子科武举，以材武受知于湖广总督周天爵，奏留在楚教授两湖军。提督罗思举闻其名，置酒邀周及允升，曰：“吾帐下健儿数十辈，皆绝伦，请相校为乐。”先是周延山东技师孔某，教其子，命与允升校，允升胜之。至是皆胜，罗因解宝刀赠之，由是允升名动齐楚蜀间。周属允升助其捕盗，楚有朱氏女者，豪役闻其美而图之，杀女兄，女控官，吏受赇，事几寝。允升获凶手，雪其冤，复擒治多盗，周奏请奖，部著回籍，以营千总即用。道光二十一年，英人破虎门，总督祁 知允升能，命募民数千，营列新庵山，朝夕训练，旋以议和罢。退居于家，后寇警四起县令属允升团练卫乡里，几十年，有以请补大鹏营千总者，不就。天爵自允升返，无当意者，适广西长发贼猖獗，诸将血战无如何，天爵慨然曰：“微允升谁与分忧者。”召允升募勇速赴援，时贼啸聚十余万，允升部下仅五百人，所至身先士卒，斩伪先锋廖八，生擒数百，击毙无算，贼望见香山韦勇旗帜，辄退走。秋七月初十日，进攻桂平之新墟，夺贼炮台，直扑贼垒，贼患其恃勇来入，伏莽火攻之，允升裹创转战，逾数晷，后军不继，死之。事闻。上谕以都司例，赐恤荫子达文云骑尉，祀昭忠祠。

刘炳南，字亮勤。北门人。事亲孝，少有奇气，喜吟咏，遇忠孝节烈事，则慷慨发为诗歌。应童子试不售，纳监捐未入流职。道光二十一年，英人犯省，督抚征兵；炳南募拖船二十，民勇五百赴援距，省城十里，有东濠为入省咽喉地，军府檄炳南御之。时英兵悍甚，炳南帅死士冲战，敌多死，退走狮子洋，靖逆将军奕山深器之，奏加六品衔，赏戴蓝翎。旋议和罢兵，炳南蒿目时艰，益奋励。凡出奇设险，悉规画而识之，见香山城恶曰：“城濒海，一杭可薄，倘宵小猝至，何以守？”遂倡议修治之。躬自巡功，旋加捐府经历，分发湖南，甫抵楚大饥。上官议赈，知其才，檄署长沙县丞，司赈务。炳南设赈所四，兼施药饵，存活甚众。贼首李沅发寇宝庆，据新宁县城，巡抚冯德馨以炳南有胆略，特命与守备熊钊领兵四百，驻新宁之崑山，甫立营，谍报贼由大绢峒之左八角亭逾岭。炳南与熊钊帅兵追之，至半山，贼冒险冲突，炳南奋臂大呼，士皆争先，贼堕溪谷死者无算，生擒其头目李承莫等十一人。贼大奔，穷追至罗远峒，地险巖，贼伏起夹击，杨雷拥重兵相距甚近，而不救援士卒死伤如积。炳南犹裹创血战，所杀过当，贼奋击断其脰。熊钊亦死之，时道光二十九年十二月初五日也年三十六。炳南既死，贼见其尸戴蓝翎，大悲恨，复断其头，剗刃其腹。咸丰二年赐恤荫子定璈，袭云骑尉，并祀楚粤昭忠祠。

何朝亮，字品鉴。小榄人，年二十六，由监生报捐营守备。咸丰元年，升寿春镇中营游击。二年护理寿春镇总兵。三年实授寿州都司。发贼扰安徽巡抚江忠源闻朝亮能，欲调至庐州剿贼。九月贼船由柘皋运米，其大队泊巢县东关，闻官军至，奔运

漕北，朝亮击之，贼走裕溪，遂复巢县。当舒兴阿之援庐州也，城垂破，而臬司张印塘檄朝亮与总兵杨青鹤分路赴救，朝亮率所部健卒八百，由中路进，贼立木城拒，官军攀援直上，贼分两路来袭，官军撤攻回击，守备包纪功伏兵攻其后，朝亮攻其前，遂大败之。十二月，复调回庐州御贼。朝亮昼夜兼程行，中途为贼所阻，朝亮力战夺隘，及至庐州，而城已陷，江南提督和春檄朝亮带兵由左路攻庐州北门，昼夜力战，连夺城外贼营，亲擒伪丞相陈宗胜。五年三月赏戴花翎，五月朝亮偕同知江忠浚等复以北门。六月，和春亲督各营进剿。十九日，直抵贼垒，为贼所困。朝亮带队争先，奋击力却悍贼一入贼营，众寡不敌，力竭被戕。年三十二，事闻，赐恤予云骑尉，世职恩骑尉，世袭罔替，事迹宣付国史馆，纂入忠义传，祀昭忠祠。同治初，给事中潘斯濂奏朝亮死事尤烈，赐立专祠。同治十二年二月，赐谥勇烈。

黎源，字应科。西坑人。修干飒爽，综理精密。咸丰六年，由吏员捐纳从九品官，分发广西，叙乡团功加六品顶戴。署北流县双威司巡检。七年正月，容县贼围北流城，源调乡勇赴援，二月城陷，源以孤军退保隆盛墟，绕道如州乞师，知府命剿州之垌心贼，旬日平之，遂委署北流县统兵。剿贼二十余战皆胜，胁从之乡咸震栗，愿杀贼赎罪。源营逼城五六里，兵久疲不敢进，军需窘乏，辞县回司知州，仍以剿贼专属源。八年春二月，土贼结连容城二万余，八道来犯。源悉歼之，道路无梗。六月初五日，克复北流，士民益爱戴。适县令以忧去，复署北流。源遂抚疮痍，缓征敛，散诱惑，旋实授浔州秦川巡检，仍署北流。九年三月，总督劳崇光檄源会郁林博白陆川之兵，剿贼大克之。陷贼诸砦悉反正，输诚出练助饷，北流得安。十年春，源以文教久废，兴复旧章，延师课士，几于邑有弦歌矣。贼不得逞，合平南桂平诸贼来犯，总督檄郁林州全属会剿，六月州兵出守西山，源出守旺芝塘，各跑北流城三十里为犄角。七月二十四日，贼破西山，州兵退，源仍守旺芝塘，贼悉众攻之，连日鏖战，所杀过当，然贼日多，兵日寡，或劝源且退师，源不可，督战益力。众或惶怯，则驰而前，以身先之。贼觇旗鼓处，燃炮中其喉死。时八月十四夜也。源死，部下悉溃，旺芝塘士民以板盛源尸，坎而埋之，覆以土草。贼恨源甚，以铁钩钩其尸出之，并索黄三杀之，黄三者；初为贼，降源立功者也。贼以竹篷卷源尸，攻北流城，匝月不克，乃舁源尸回容县，贼首范音谓众曰：“彼作官人，与我讎杀，分当然，不如以官殓之，待其来赎。”遂置诸容城之外。十一年十月，北流士民以二百金赎其骸。范音恚之，裹以布，置竹箱中，如负贩者，始得出家人，后视其指甲皆卷向内。事闻。赐恤荫子宗濂袭云骑尉，祀昭忠祠。先是源于死之前十日，作书别其父，并训其子，家事甚悉，缄而不发。死之夕，乃以付家人，源殉难后，郁林兵勇每临阵犹设位祷之。

潘庆，字鸣威。原籍罗定州，家毁于贼，入籍香山，隶良都。由大鹏协外委调署小榄千总。时会匪骚扰，擄巡检某，庆救出之，获其魁。丁未春，赴省考校，匪复炽。刘建华、黄太、张斗、刘槐芳啸聚至万人，勒索市肆办供张，罢市数日矣。庆回，知事急，乃佯与张斗善，谓斗曰：“吾官此可若何？”斗曰：“勿犯汛地足矣。

”庆曰：“若此是速吾亡也，吾从若耳。”斗乃告以五月初八举事，庆计敌众我寡，非散其羽翼不能济，乃潜集三百九十余社，社长社正，动以利害，令反正。咸许诺，署名乞自新者一万二千余人。遂驰使县营告急，知县陆孙鼎、副将洪名香，促兵至，贼惊窜，庆乘胜扼要道，悉擒其魁。小榄地肃清，众为位祝之，一在开元寺，一在九州基，咸丰二年，升水师提标参将。时提标以洋巡出兵，潜通贼。八月十七日，贼陈蛇南攻虎门，庆巡洋闻报，回遇贼于竹洲，横击之溃。始战药弹失，营弁沈某自鹅公洲来，火药焚，贼呼洪兵胜矣。时贼自称为洪兵也。庆亟入城，严诘得奸细数人，置之法，贼复合攻东卡，兵士以内患既清，战气益倍，败之，获陈蛇南等。庆以虎门城狭而恶贼易之，议于莲花山顶增女墙，择要筑炮基，庆自捐二百两为诸弁倡，遂蒧事。四年十一月，总督叶名琛檄从按察使沈棣辉剿佛山，议者请尽塞通佛山诸河，专攻石壁，庆以石壁围涌，贼垒几遍，攻以舟，水道浅窄，贼援一集不能退，群盗惟佛山陈开最悍，方烧民居两昼夜，火未熄，必内变，宜乘机攻之，破开则群贼溃矣。沈从之，攻临海庙高桥头诸垒皆克。适曾琪车陂河之军陷，檄庆防东，贼五路昼夜攻省城，庆三胜之，贼收合赤冈山，梁贼数万，再逼河南，乡勇败，庆与陆兵夹击之，贼溃五年，贼西窜，陷浔州，檄庆领快蟹船十二驰救，贼窥梧州，总督檄苏海昆芳领船四十败。庆黄钟音新任臬司、统兵驻梧，促苏昆刻期进，庆以西潦没堤缆不能牵，我沂流上危滩，贼顺流压我必败，须流缓乃可，而黄钟音不知兵，促战愈急，七月廿四日，仅至藤县白沙河，贼连檣下，擒钟音、杀昆芳，我师大败。庆接战自辰至酉，十二船俱尽，庆子乃贞、侄绍良，俱死。庆右足中炮落水，关防漂失，残兵援之舁入梧城，翌早乃苏。事闻诏铸参将关防给之，调还省堵东江。九年，镇阳江。十年十月，调署广西提督，下埤贼罗渚观仁、和墟贼陈金刚合兵窥梧，庆声言下封川，潜渡容墟、南绕二贼后，自上流击之，又遣陆勇紆道夹攻，贼狃于藤河之役，不虞官军之飞渡也，骇散。汹涌而逸，擒贼十八人，夺船四十，乘胜收下埤，龙洞等处。会疾作，回籍调治。性俭朴，居官尤廉，置宅东门仅数椽。年六十八卒。

曾望颜，字瞻孔。原籍顺德祖昌垣，始徙邑之员峰乡，隶籍良都。父富业邑诸生，授徒自给。望颜亦以此为甘旨计。县试第一，补弟子员。嘉庆己卯举于乡。道光壬午恩科进士。选庶吉士，授编修，补江南道监察御史，署河南道事，掌山西道事，转刑科给事中，兼署户科给事中，迁光禄寺少卿，太常寺少卿，晋顺天府府尹，擢福建布政使护理，福建巡抚。代办闽浙总督。以官御史时，查库亏空，追治免官，赔补完缴，给还主事。咸丰四年，入都以五品京堂授通政司参议，再迁顺天府府尹，升陕西巡抚，调署四川总督。以陕西参劾，属员翻案解任。同治四年起授内阁侍读学士，回籍卒。望颜刚介严毅，知无不为，座主英和汤金钊并器重之。曰：“此必能自立，不肯苟徇流俗者。”居台谏时，条奏悉称旨。既擢京卿，宣宗谕曰：“科道为朝廷耳目之官，责任綦重，凡利弊攸关，俱应直言无隐，近如冯赞勋、曾望颜、黄爵滋、金应麟等，遇事敢言，指陈晓畅，故特擢任京卿，风励言官，以广忠谏之路。望颜等益当仰体朕意，不避嫌怨，力矢公忠，如以建言为梯荣地骤，得升阶即图保位，岂朕用人图治意耶？”寻迁京尹，召见，谕曰：“我知尔赤心为公，

非沽直希荣者比，今既管地方事，切宜认真，勿染外官习气，一味含忍。府尹管二十四州县，先宜查拿邪教，弹劾劣员，不可以容忍废职。”翌日，复谕曰：“事有未当，尔不肯为，朕能信之，惟是新膺民社府尹，事多未经，宜随时历练，毋误乃事。”望颜跪聆，感激流涕。每月敷陈十数次，上皆召见，询地方事，及属官贤否，望颜愈砺精报称。搜剔顺天科场积弊，及回漕邪教，隆丰寺、三官庙、僧、尼、响马、大盗，事多波及要津，株连宦竖，人皆危之，纠弹不职州县，与兼尹大臣，反覆辨难，一意孤行，不之顾也；时称为曾铁面。庚子海氛不靖，简任闽藩，谕曰：“藩臬原应奏事，若事关重大，尔可专奏，毋庸会商督抚，致畏首畏尾，朕观近日外官，似天生一副饮食起居与他，全不是京官样子，我知尔尚不至此。”再问某日可起程，某日可抵任，带人若干，家眷去否？望颜逐一奏对，天颜霁悦。到闽兼权督抚二事，蕃使由南台口阑入省，呈国书，望颜命督标参将收之，许为代奏，使者悍然造军府请见，望颜以和约未定，若请见，当从琉球诸属国陪臣礼节，蕃使嚣然争，将军以下劝稍贬损，以顾大局，望颜曰：“设有变故我一人当之。”遂调麾下七营将士，列堂发炮，鸣笳鼓升帐，使者逡巡不敢进，以国书交府县代呈，谓未见中国官有如此者，遂扬帆去。未几罢归，文宗御极起用，密奏粤东会匪之患，吏治之坏，民生之困，反覆数千言，上为动色。召对复一一陈之。再任京尹，严于其旧；奉命巡抚陕西，以救弊补偏为急务。陕西戎政废弛，望颜亲临考校，汰老弱补精壮，劝训练；又以秦军贫乏，禁支粮减克，大阅自出犒犒赏，秦军大悦，乃行保甲，励乡团，劝民储谷，备缓急。登山视险要，筑寨堡，擒治红黑签匪，商旅可以夜行。河南捻匪煽乱，屯武当山，地迤而险经，楚军驱逐，闯入武关，地扼四冲，恐久据，调飞骑星驰捣之，限三日至，贼不虞官军之猝至也，窜还豫。望颜以事关两省，不分畛域，先奏奖楚军，其固持大体，皆此类也。回民与汉民构讼，往往不得直，望颜语属吏，以汉回皆国家赤子，祇分曲直，何分彼此，治之皆得其平。临潼汉回斗，几致乱。望颜遣官赉文书驰往晓谕，各捕其为首数人，遂解散。回人中大憨拜六儿者，历任无敢撓其锋，望颜以兵围获之，并获汉人中巨恶李麦芒儿，同日梟诸市，回人谓自林文忠后，仅见此人，我虽与汉人世仇，但曾抚军在，不可生事，负恩德，由是帖然。滇贼扰川境，上命移节督川，川之戎政更坏于陕，贼已陷州县，奏调甘陕兵至，人地生疏，檄土司兵至，鹑衣菜色，刍粮戈甲皆不给，乃捐廉数千恤之，土兵始踊跃用命，而陕西被劾，属员翻案，台参事起，部议革职留任，再劾成都翁守诈而赃，翁亦互讦，遂解任回籍。文宗驻蹕热河，询望颜行止，左右以翻案台参诬罔对，且谓望颜性过刚，故不合时宜。文宗叹息久之。穆宗御极，起授内阁侍读学士，以老乞假归。同治庚午夏四月，卒于城南里第，年八十有一。望颜勤于官事，校簿书恒至夜分，服食一如秀才时再仕再己。粤中大吏，招之不出，亲故希见其面。先是学政于新进覆试，每名缴十金有奇，名曰开门银。望颜慨然曰：“学政为朝廷有人材，奈何需索至此。”及为御史，即奏请禁革，粤东州县于未及定罪，及牵涉之犯，另设系所，名曰外羈，凌虐勒索，一如犴狱，望颜并奏劾之。军兴征于商人，奸人藉为利，抽及鱼虾。邑城贩竖皆罢市，望颜谕众安集，请于劳制军，崇光而免之。通籍四十年，未尝牟利，后有恃势豪夺者，人辄思望颜不置。云光绪六年，闽浙总督左宗棠以望颜在陕两年，政绩卓著，陕民感慕上陈，奉

旨政续宣付国史馆立传，并准予陕西省城建立专祠。

林德泉，字恭溥。大涌安堂人。由廪生中道光辛巳恩科举人，挑发安徽，署石埭县，调太湖县。二十二年，英人之役，调赴上海军营。英人阑入吴淞，直指江宁，主兵事者，徙库储于安庆，委德泉督运，甫出江口，舟子闻炮惊逃，德泉率亲兵扬帆入皖。复调防御江东，德泉先于和州梁山设伏，乃沿江建炮台，张旗帜，英人两至皆逡巡不敢进。德泉陈防江战守策，江苏巡抚程矞采善其议，檄所属行之。旋署和州泾县，二十八年，再调江苏，督水师追获海寇苏走等于浙江之普陀洋。救出被虏者数十人，功上以海疆知县调补，后以同知升用。先换顶戴。三十年，补青浦县。振兴文教，士风蔚然。咸丰元年，调广西军营，江南督抚以海疆奏留。三年调安徽军营，补宿迁县，领粤东水勇，剿上海股贼。四年以军事，奉檄回粤，会匪事起，督抚奏留原籍，董团练。萧家渡之捷德泉与有力焉。

林谦，字德光。大车乡人。淡薄严正，好学不倦，而常抱经世志。由廪生中道光戊子举人。大挑知县，分发直隶，告终养归。咸丰六年，以团练功，加同知衔保举孝廉方正，家故贫，父鸛翀，家属多，谦藉馆谷供菽水。先是大父梦兰，虑谦以家计废学，给田资之，及得馆谷，请于大父，还所给田为弟侄读书助。父母丧费皆自任之，未尝责之两弟。同邑友郑廷检、官中书，歿于京师，谦为护柩，及其孤还，余千金，悉归其家。有异乡友流落省城，慨然赠金作归计。其师之曾孙女，鬻为婢，谦为赎券，抚育成人，备奁货送归，俾其亲属为择配。东乡故贫瘠，谦为筹画置田一顷为公储。又置田八十亩，豫为四都社学经费。道光辛卯，米价昂，谦仿朱子社仓法行于乡，丁未复于榄边墟设助耕仓，乡人互相则效，积谷遂多，崇义屯田变价，应缴银万四千两，谦以田为仁良十都人士乡会试费所从出，仿三益会法变通之，设立章程，得银二万两缴价外，以其余增田三顷。东乡道路倾圯、桥梁朽坏，谦倡议醵金修治之。邑征粮岁轮图甲举总催官给之票，名曰金花票，粮胥卖票于图役，役向轮户讹索，名曰大当，陋规岁万两，贫寡之户，倾产鬻男女以供其求，甚有畏累自尽者，谦首建言除之，胥役以千金进，弗纳，与邑绅吴景濂等诣县陈状胥役乞哀于官持不决，谦将控诸大府，适曾望颜自闽藩回籍，谦嘱致书知县陆孙鼎，痛言其害，弊始革。勒碑丰山书院。庚子，英吉利以禁烟启衅，奸宄乘之，谦告县集众于云衢书院，立章程严堵御，东乡赖以安。自是以严禁会匪为先务。甲辰，乙巳，三合会匪煽惑，东乡悉破获之，无有入其党者。丁未戊申、西粤、贼起，蔓延东省，谦知其必及我也，先期为备，于是分东乡为六局，督乡团、察游匪，设总局于邑城之东。策赈粮、通军报、预应援。又谋于下伽山、小隐港、三仙阁，兴筑炮台，藩蔽东海。咸丰甲寅秋贼果破港口，逼县城，东迁者络绎不绝，夜行亦戒心，谦召其都人士，帅乡团星驰至，营于东门外，知县邱才颖谓东人激励有素，使登陴，时西北江乡雁行顿刃，炮声殷天，而卒无溃志者，恃有东乡为退保地也。谦性严而恕，事必综核，而不事矜张，与人共事，有所可否，恒十相往复。尝获窃贼黄阿瘦，察其有悔意，释之，黄遂改行，并戒其党，尝告乡人罪，后察其误，自引咎请释之。邑之土民、客民，素相安。同治壬戌秋，他邑土客构祸，讹言石门客民将为变，

人心汹汹，谦不为动，廉得其伪榜于通衢，事遂已。谦歿后，其子孙求葬地过石门，乡人曰：“微尔先人，无今日，地惟所欲。”当时讼曲直者，咸比之王彦方云。官有公事，必借谦以信于民，而未尝私至宰室。又尝诫其子曰：“公事不易为，尔无轻与。”晚年少有所蓄，置数弓地，营先庙，以其余地为屋三楹，颜曰：过俭草堂，置经史万余卷，及手钞书数百卷。年八十，犹灯下作楷，凡前言往行，时事得失，条记满墙壁间。学宗李安溪，主讲丰山书院，与生徒辩论必求精确，临歿遗命遵古丧礼，不用缙黄，著述详县志艺文，同治十三年，祀乡贤。

郑藻如，字玉轩。邑濠头人。父乃康，慷慨好义。有孟尝君焚券风。藻如少读书，明大义，道光丙午补诸生，咸丰辛亥举于乡。值洪匪扰境，与同邑林谦募乡团，迭破贼，邑城以安。大吏奏奖内阁中书衔，江督曾国藩聘至沪，总办机器局，规模罔整。历任江督，皆交章保荐，记名以海关道用。赏戴花翎。督造吴淞炮台，西人亦惊异焉。光绪戊寅，相国李鸿章以人才荐，召见还，留办北洋海陆营防。是年简放津海关道，裁各卡海巡，民便之。会巴西国遣使通好，李鸿章属之订约，时称为审当。晋豫饥，以筹巨款助赈，加二品衔。辛巳加三品卿衔，派充出使美日秘国大臣。初，美人嫉视华工，遣使言于朝议，禁续往。藻如至，折以公义，卒罢之。壬午，至日斯巴尼亚递国书，国王待之有加礼。甲申，至秘鲁，见其外务大臣，筹保护华民，且言招工之违约。先是华民被奸人骗鬻，佣于秘，十年逾十万人，工主虐待如牛豕。藻如与秘鲁申正条约，严缉拐匪，积弊稍除。又集款三万余，创中华通惠局，华工信息，始与祖国通。任满，朝议复留半年，乃由秘返美，右手得废疾，舟泊素未通问之哥林，秘国国主慕其贤，特遣官医调治，嗣是力疾从公，以左手作书。著论述秘鲁虐华民情形，历历如绘。未几，美人杀伤华工四十余人，藻如电请美外部调兵保护，办凶赔偿，反覆诘办，国主为之动容，卒如议。历任四年，所至布信义，固邦交，尊国体，保侨民，感人甚深。累升内阁侍读学士、鸿胪寺卿，通政司副使，光禄寺卿。以病乞休，离美未二千里，复有旨慰留，再辞，乃允。藻如留心时务，律己严，居官不改儒素。致仕家居，以邑中蚕桑棉茶之利未溥，购种散给居民，教以饲畜，种植诸法，本邑之有实业，藻如称先导焉。卒年七十一。

陈子清，字季腴。本顺德人。徙员峰，家綦贫，幼与曾望颜同攻苦，望颜早贵，越二纪丙午，子清始举于乡。丙辰挑教谕，不就铨。侨居邑城，操履狷洁，以书画自贍。邑令杨钺，杨先荣，尝屏驺从造访，清谈竟日，其见重如此。郑藻如持节归，不敢径馈以金，既歿为代偿夙逋，曰：“毋以是损清德也。”易箦时，有邮至樁券者值百金，隐其名，莫办为谁。子清晚年道益高，翛然物外，书画尤为世宝贵，所为证真画斋诗，萧闲简远，如其人。邑人刘？芬梓之以传。论者谓子清贞不绝俗，和不失身，其与望颜之刚介严毅，虽仕隐殊途，而自立不苟则一云。

何璟，字伯玉。小榄人。祖文明，父曰愈，县志均有传。璟幼颖悟，好学，随父宦四川，称为伟器。年十七，以监生应顺天试，道光二十三年中举人。二十七年，成进士，改庶吉士，散馆授编修。咸丰二年充顺天乡试同考官，家素贫，旅食京华，

不谒权贵，人益重之。三年，记名以御史用，未几丁祖母忧回蜀，服阕入京，授江南监察御史。时英人陷广州，疏请起前兵部侍郎曾国藩赴广东，与在籍侍郎罗惇衍等，调集民团，俾民心有所维系。八年英船入津沽，璟疏陈战守之要，又疏言和久不成，战宜早决。请克日进剿，抗论至八疏，凡数万言。九年升给事中，十年，英兵逼畿辅，官军擒其酋九人，璟请立斩之，并请飭广东官绅速督兵团收省城，捣香港，必解近畿之患。时有传英酋脱囚后，欲与为难云。在台谏掊击不避权贵，十一年引见，以道员用。授安徽庐凤颖道。同治元年，抵皖，江督曾国藩奏留省城，总办善后，及营务处差。国藩事无大小，一以咨之。二年，奏署按察使，兼署布政使，时捻匪窜望江等处，声言欲图省城，而国藩驻金陵，巡抚乔松年驻寿州，调度每不相应，璟便宜应敌，贼不得逞。皖省收复未久，尤以兴文教，恤民疾苦为先，捐廉购书置书院中，资文士诵习，兴建养生局，育婴堂，养老院等多处，数年之间，百废具举。四年，授湖北布政使；六年，护理巡抚，次年曾国藩咨撤霆庆十营，霆营凡两撤，皆生变，璟先调分扎上下巴河，声言金陵散勇沿途骚扰，将遁鄂境，特令防守，复调水师四十艘，及提督刘维楨一军，分屯其后，又飭军需局多备船只，听候载撤勇，分送各省，然后出檄示，即令缴械领饷，且多给十日粮，不数日至川、至沪、至湘中，皆晏然。当各军分屯巴河，时薪水奸民欲为乱，见官军至疑事泄，遂反。值霆营散尽，璟得专治其事，发兵擒斩其魁，事平。八年回布政任，是年调山西布政。璟所至均谕州县积谷备兵荒，以晋民种罌粟，尤妨麴麦，禁之而未能全革，后数年，晋果大饥，人服其先见。九年，擢福建巡抚，旋调山西巡抚，十年调江苏巡抚，十一年二月，曾国藩卒于位，命署两江总督，办理江海防务，悉秉国藩之经画。会内务府传办大婚，备赏缎匹值二百万，奏言为款太鉅，向所未有，且西陲未靖，军饷浩繁，骤增此款，恳飭核减，寻得旨减半。是岁，以丁父忧回籍。光绪元年，服阕入都，陛见，即授闽浙总督。赐紫禁城骑马。召见时。谕以福建地方紧要，知汝公忠体国，毋负委任。途次，命兼署福州将军。上年闽迭遭水火风灾，五月复大水，城不没者一版，璟坐城上七昼夜，督诸军拯救，首捐二千金助赈官绅继之，灾黎不至失所。又筹款设局平糶，水退乃浚洪塘，编竹槌导流入海。台湾后山阿棉乌漏两社生番蠢动，总兵吴光亮击破乌漏，请增兵。璟檄驻台南统领提督孙开华会剿，遂破纳纳阿棉两社。是役也，总番目马腰兵遁后，复率众诈降，欲袭官军，璟已预檄各营严阵以待，擒马腰兵斩之，并焚毁助逆之沙老等社，后山中北两路遂通。五年兼巡抚，疏言日本议废琉球，兵船时时游弋，心殊叵测，全台形势，基隆尤为外人虎视，应调各轮船集基隆合操，月以一船分巡各口，有警则应，运掉自灵。有英教士建教堂于省会乌石山，侵公地，绅民不服，前抚丁日昌拟以城外地易之，事定矣，而久不迁，复建楼屋，众愤，火其楼，彼籍口欲即侵地修复，璟持原议力争，卒令交还，以他处易焉。九年，法人构兵越南，疏言闽兵力太薄，惟有固炮台，以逸待劳，万一有警，当出省调度。十年四月，上命侍讲张佩纶会办福建军务，五月法兵舰十余艘泊上海，闰月二十一日，闻有入闽口之信，璟电咨总理衙门，以前奉旨有彼若不动，我亦不发之谕，若俟其扑犯，彼已深入，我恐不得势。二十三日，法船入泊马尾，乃与将军巡抚等言，法船借游历为名，陆续入口，而所立条约，拘手挛足，所占商岸，拊背扼吭，阻之则先启衅端，听之则坐失重险，

一旦决裂，我电未至，彼信先闻，则炮台之军不及入援，南台之军亦难径渡船局，势殊岌岌，则以兵船过少，水上无游击之师故也。现敌注意福州，臣璟拟即出省驻扎，臣佩纶以为安民御敌，宣示镇静，如有战事，臣佩纶臣穆图善亲赴前敌堵御，惟法人鬼蜮实有密据要害，先发制人之意，如果圣意决战，务请豫授机宜，俾臣等水陆合击，较为得算。疏上，得旨该将军等当实力备御，二十四日，始奉总署电传谕，阻法舰进口，璟已照会法官，而法舰入口者渐众。初，张佩纶自奏请前敌，遂驻守船局，调舟师聚马尾，璟拟分船外扼长门，内扼临浦，不顾也。时法船环泊马尾，遂会电总署，如法船再入，我惟有塞河先发。谕以闽口有英美等国兵船，堵塞应与领事说明见，经美国调处，局势未定，所称先发，尤须慎重，仍会电总督力争，及法攻犯基隆，又会电总署，法已启衅，不如早定战局。并飭南北洋互援。七月二日，闻法有初三开战之说，因电告张佩纶，请严备。次日午法战书甫至，即电马尾，彼已先期开战，我船遂为所伤。法船十余艘，我毁其二，并毙头兵二名，大将某亦轰毙。敌连日环攻船厂，图登岸，我军均力却之，当战时，璟欲率师应援，而鼓山临浦无舟可济，且奉严旨不许出城，于是塞临浦河，屯重兵鼓山，法声言攻省城，璟誓以死守城，彼卒不敢深入，退攻馆头田螺湾，闽安长门诸炮台，皆为防军所遏，长门台先已击，沈其外应兵舰一，至是复毁其二，法即退出芭蕉山鏖战凡四日焉。时陆军援师不下二十万人，璟筹饷缮械，而客兵不扰，且以告金告粵，江右閩閩安堵，其台北一路，法人先为官军败于基隆，至沪尾又诱其登岸，大胜之，皆璟策也。旋以马江之败，上疏自劾，奉旨革职，既解任，官橐萧然，告贷亲友始成行。城外旧有陈清端公宝生祠，闽人并祀璟其中。抵家后，左宗棠，杨昌浚查办闽事，疏入，张佩纶遣戍，璟免置议。璟自归里，粤吏延主应元书院，暇辄观书作字，种花竹自娱。虽家无担石，泊如也。光绪十四年卒。年七十二。著有《春秋大战录》、《通鉴大战录》、《奏议》十五卷、《事余轩诗》十卷。璟服官数十年，忠清谨慎，勤求物务，不动声色，而利兴害除，不求时誉，亦不为苛察矫激之行，故所至无赫赫名，论者谓璟老成谋国，马江之役，使得自行其志，必不待敌猝发而后应之，以至蹉跎若此云。

香山县乡土志五

人类

香山民族，自汉陈临家居海岛，奋志不同蛮俗，子孙盛于岭徼，开化之迹兹为最先。唐郑愚作诗有：“台山初罢雾，岐海正分流，渔浦扬来笛，鸿逵翼去舟。”之语，则本邑当唐末时，如石岐一带之地，必航路交通、人成都聚无疑矣。北宋则梁陈望族著于海曲。至陈天觉倡议设县时有刘必从捐其仁山祖居以为县治，雍陌郑姓又争建县城于其乡，殆亦巨族也。凡此者，其初由中原徙至，与□均未可知，然聚族已久，不谓之土著不可矣。近有分粤地民族为陆居、山居、水居三类，陆居则皆中原种族转徙而至者；山居则为獠獯，如今客家之类；水居则为蜑民，今本邑三灶官久已奉裁。详下。陆居、山居者几已混合为一，科举未废以前，香山学额二十名内客籍二名，后彼人嫌其太少，稟学使归众汇取。此事为二族混合之一大关键，盖粤人县界素严，常有攻讦冒籍之案，若考试准其汇取，则畛域不泯而自泯矣。至蜑民顽悍，明初籍以为兵，实羁縻之术，非诱之向化也，故风俗习惯究与土著不同。国朝雍正七年，诏令蜑民有能盖屋栖身者，许其在近水村庄居住，力田务，本以示一视同仁。自是泛宅浮家之辈且有更易姓氏以自附于大族。县城西甲子桥内有地，嘉庆间尚名蜑家墩，今已改名大墩，此亦同化之一证。所不变者，海滨寥寥数百，而已况夫河泊输课久编定籍，海寇入扰，增船著功，详下。教育普及之世又何妨导之同化哉？今更就山居、水居者，略析其源流事迹如左。

客民，即猺獯俗名客家老。明田汝成《炎徼纪闻》：猺獯，一名猺獯，种类甚多。蓬头赤脚，轻命死党，以布一幅横围腰间，旁无襞绩，谓之桶裙，男女同制，或云：彼本地主。后秦始皇徙中国万家于岭南，中国人生息渐繁，彼遂衰弱，故反主为客，名曰客籍。其人本山泽之癯，率以畋猎樵苏为业，近多出洋留贸，易糴载而归，屨丝曳縗，家拥素封者比比皆是。盖气象又一新矣。

畚蛮，本闽潮人之逃叛流亡者，就地垦荒，以刀耕火种为名，随处有之。自乾隆五十四五年间，始有私至十字门附近之过路环凿山取石。道光间，屯集至数千人，盖生计所营、室家所托焉。今殆散去。

獠，明万历间，三灶沿山獠民相聚为盗，官兵追捕，旋匿旋出黑山黄梁都属。兵不能御，又不谙正音，难以化导。东澳属黄梁都人周高扬者，铁匠也；鬻器于其市，习其人，通其语，獠众悦之，巡海官至，则高扬为宣谕，俗渐革。奏授高为三灶抚獠守备万历二十八年。治其地，世其职入覲加授宣武将军。崇祯元年卒，子德显袭；国朝仍之，三传至坤，乾隆三年卒，四年奉裁。田志云：獠官署在春花圃久圯。按：明时新会皂幕山为广东獠山之□。香山地邻新会，獠族虽退处海岛，声势必振，仍须设官镇抚。后殆，以其种渐尽，无事防维，故汰之耳。

蜑人，以舟为宅，业捕鱼或编篷，濒水而居，谓之水栏。见水色则知有龙，故又曰龙户。齐民则曰蜑家。自唐以来计丁输课于官。明初编户立里长，属河泊所，岁收鱼课香山等县尤多。洪武十五年，命南雄侯赵庸籍广州蜑户万人为水军。二十四年，都指挥花茂上言，东莞、香山等县逋逃蜑户附居海岛，遇官军即称捕鱼，遇蕃贼即同为恶，不时出没劫掠，殊难管辖，请徙其人为兵；又奏添设沿海依山卫所城池，收集海民置军守御。诏皆从之。

国朝嘉庆间，鲸窟纵横，半为渔户，而屡挫其锋者亦为渔户。其为盗也，衽席风涛所得者不足以供汛兵巡丁之索取，生计日绌，稍强者即愤而为之。其舆盗抗者，大抵皆生殖有资，身家自重者也。十四年，渔户陈敬裕等请总督百龄给大船三十，领壮勇为前锋，许之。初敬裕等以繒船七十，分三队，捕盗外洋，所向有功。十三年官给以顶戴，又给口粮，令分赴险阻堵御，邑人且资以保卫乡间焉。

卢亭，今无其人。《澳门记略》引《月山丛谈》云：老万山自澳门望之，隐隐一发山有人魑结，见人辄入水，盖卢亭也。晋贼卢循兵败入广，其党泛舟以逃居海岛，久之无所得衣食，生子女皆裸体，谓之卢亭。尝下海捕鱼充食，能于水中伏三四日不死。按：唐刘恂《岭表录异》云：卢循既败，余党奔于海岛野居，惟食蚝蛎，叠壳为墙壁。又云：海夷卢亭者，以斧楔取蚝壳，烧以烈火，蚝即启房，挑取其肉，贮以竹筐赴墟市，以易酒肉。此盖以卢亭种为今之蜑民，俟考。今邑黄梁都之南隅有卢亭环，四字都黎村有卢亭井，岂即此种人窜伏之遗址欤？

香山县乡土志六

户口

本邑户口，光绪二十六年间，由县飭查一次，旋以诸乡局缴覆册籍者不及十之二三，事竟中辍，知者惜之。考祝志户役篇只存嘉庆间户口实数，而光绪五年新修之田志亦无新增，盖自编审制停，而民数统计之难，详有如此。迨者，宪政推行，地方自治渐见发达，官绅分区调查已得端绪，亦足一洗前陋矣。兹录旧志所载户口数于其前，而以本邑新制宣统元年民政表及宣统二年户数表编于后，俾对照以观，庶知民族孳生之速率，而教养之不容或缓也。

嘉庆十九年，知县马德滋查报通县居民九万三千七百九十六户，男二十四万四千四百五十丁，妇女十七万九千五百九十二口；蜑民一千二百九十九户，男三千六百五十九丁，女二千五百一十四口。

宣统元年本邑民政表

城厢

方里数 户 数 口 数

六 一〇四五一 六八二三六

乡村

乡村数 方里数 户 数 口 数

四一三 七〇九六 一二〇一〇 五九八〇二四

市镇

市镇数 方里数 户 数 口 数

二二 八九五 三二七五八 一五五九五八

合计

方里数 户 数 口 数

七九九七 一六三三一五 八二二二一八

宣统二年本邑户数表

某区某段某乡 正户总数 附户总数

第一区第一段城内 八〇三 二三九

第一段东门外 一二九四 三六六

第三段西门外 四三四一 六八三

第四段南门外 二四八六 四八四

第五段北门外 一七七八 六九〇

第六段厚兴街 六五九 六九

第七段峰溪 基边 二四四八 三六九

第八段长洲 一八八八 四四

第九段港口 一四六〇 无

第十段茶奇洛 三九九 一一

第十一段竹秀园 三八四 一

第十二段恒美 九七六 二

第十三段沙涌 四八八 无

第十四段上堂 二二四 无

第十五段葫芦棚 一二一 无

第十六段龙环 一八三 无

第十七段板桥 新村 二五六 无

第十八段龙塘 五四 无

第十九段梅坪 五九 无

第二十段北台 二九七 无

第廿一段曹边 二一七 无

第廿二段龙眼 树涌 一三四 无

第廿三段沙田 一七六 无

第廿四段金角环 二〇一 无

第廿五段寮后 二七五 无

第廿六段福涌 曲涌 二六五 无

第廿七段渡头 七二六 无

第廿八段深湾 一一七〇 无

第廿九段石鼓 五五五 无

以上第一区合共 正户二万四千三百一十七户 附户二千九百五十八户

第二区第一段谿角 二〇七八 二

第二段庞头 四一五 一

第三段岐坑 三一二 一

第四段石门 七三二 无

第五段秀美园 五九七 无

第六段豪吐 六五七 二

第七段坎下 九四四 无

第八段龙聚环 六七六 无

第九段龙头环 一〇七八 无

第十段象角 二二三〇 一

第十一岚霞 五八六 无

第十二隆墟 一〇七〇 七

第十三段申明亭 三七八 无

第十四段沙谿墟 一五五八 无

第十五段上坑 五一六 四

第十六段涌头 一三四五 无

第十七段涌边 五七三 三

第十八段水塘头 七七三 无

第十九段南文墟 一七七四 一六

第二十段安堂 一七〇六 一一

第廿一段大岚 一一四七

第廿二段南村 九八五 一

第廿三段叠石 全禄 九五 无

第廿四段西头堡 青姜 一〇五五 无

第廿五段濠涌 一二七三 二

第廿六段沙腰沙 四七四 无

第廿七段腌沙 五四九 无

第廿八段叠石口 六四六 无

第廿九段芙蓉沙 九一五 无

以上第二区合共 正户二万七千九百九十二户 附户六十三户

第三区第一段小榄镇 基头坊 一一八一 六八

第二段濬口坊 一二六四 五六

第三段车公 庙坊 三七六九 六三

第四段下基坊 三〇九七 一七二

第五段妙灵 官坊 三六三二 一四五

第六段九洲基坊 九三三 八

第七段西海沙 三二一一 无

第八段曹步 一六八六 无

第九段古镇北约 一五六四 三九

第十段古镇中约 一〇八〇 四五

第十一段古镇南约 一四一六 二一九

第十二段海洲 一五八九 一八九

第十三段东海沙 二八四六 无

以上第三区合共 正户二万七千二百六十八户 附户一千零零四户

第四区第一段山际尾 一四五 一十

第二段大柏山 一九四 二一

第三段细柏山 七九 无

第四段牛起湾 六一〇 六

第五段土瓜岭 一三一 无

第六段库充 三六一 一二

第七段紫马岭 一三五 无

第八段新村 五五六 无

第九段三角塘 一四六 一八

第十段忠心 八六 无

第十一段长江 二〇〇 无

第十二段大寮 六四 无

第十三段盘栏桥 一二六 无

第十四段龙贡 四〇 无

第十五段长命水 三二 无

第十六段齐东 一〇八 无

第十七段大鳌溪 三〇七 无

第十八段细鳌溪 二一〇 无

第十九段上陂头 七八 无

第二十段下陂头 九〇 无

第廿一段下员山 六〇 无

第廿二段濠头 一〇七五 无

第廿三段沙湾 二五八 无

第廿四段老富头 九一 无

第廿五段沙边 三七三 无

第廿六段龙环 一〇 无

第廿七段西陂 四七 无

第廿八段泗门 一五八 无

第廿九段窈窕 二三一 无

第三十段萌尾 三六九 无

第卅一段陵冈 三一〇 无

第卅二段张家边 一三四四 无

第卅三段大岭 三二四 无

第卅四段宫花 二一一 无

第卅五段西丫 四一五 无

第卅六段江尾头 三〇四 无

第卅七段神涌 二一六 无

第卅八段东桎 一五五 无

第卅九段 原阙 无

第四十段三洲 八四〇 无

第四十一段大车 三六七 无

第四十二段赤坎 四五九 无

第四十三段榄边圩 一五六 无

第四十四段莆山 二八二 无
第四十五段茶园 五七四 无
第四十六段南塘 二六八 无
第四十七段濠涌 五七四 无
第四十八段林屋 二四六 无
第四十九段岐山 七六九 无
第五十段麻子 六四六 无
第五十一段珊洲 二二三 无
第五十二段下岐涌 二六六 无
第五十三段湖头汕 四八 无
第五十四段土草 一一〇 无
第五十五段井头山 四三 无
第五十六段贝头 一三一 无
第五十七段贝头里 一五六 无
第五十八段关溪 一六九 无
第五十九段稿获 三一 无
第六十段百喜 三〇〇 无
第六十一段大 头 一三九 无
第六十二段左步 七二四 无
第六十三段涌口 四六七 无

第六十四段南朗圩 二八六 无

第六十五段书锦 一二〇 无

第六十六段田边 三一六 无

第六十七段安定 三八五 无

第六十八段亨美 六〇三 无

第六十九段西村 五七 无

第七十段西亨 一七一 无

第七十一段南庄 九二 一

第七十二段泮沙 六八一 一

第七十三段隔田 五二九 无

第七十四段崖口 六一八 四

第七十五段化美 一八六 一

第七十六段翠亨 一四七 无

第七十七段合水口 一二五 无

第七十八段龙穴头 二六四 无

第七十九段石门堡 六六一 无

第八十段长沙涌 一〇二 无

以上第四区合共 正户二万三千四百一十七户 附户五十八户

第五区第一段平岚 一九八七 五

第二段乌石 一四九九 一五

第三段桥头 五四二 无

第四段沙冈 平湖 大布 八二九 三

第五段雍陌 九二五 八

第六段塘 一〇〇八 四

第七段马鞭埔 四五四 无

第八段石窝口 三〇四 无

第九段外埔 五四五 二

第十段鸦岗 六六七 无

第十一段龙塘 一六一 无

第十二段申堂 员山基 五一八 无

第十三段石塘 二八三 无

第十四段牛皮地 六〇七 无

第十五段神湾 四七〇 无

第十六段古宥 四〇二 无

第十七段黄竹荫 六九 无

第十八段白石 一六八 无

第十九段黄家村 一四六 无

第二十段饶山 七四 无

第廿一段三树兜 一五九 无

第廿二段獭山 六六 无

第廿三段藟菜塘 一一一 无

第廿四段各沙 六三 无

以上第五区合共 正户一万二千六百二十四户 附户三十八户

第六区第一段唐家上村 一二五三 五

第二段唐家下村 九三一 无

第三段东岸 六四五 无

第四段上栅上村 六九六 无

第五段上栅下村 五九五 无

第六段上下北山 六六四 无

第七段新围 四五〇 无

第八段官塘 一二七三 无

第九段埔仔 二二九 无

第十段下栅墟 三二三 无

第十一段那洲 七四五 无

第十二段会同 一六五 无

第十三段鸡陌 三七二 无

第十四段菱塘 一六二 无

第十五段淇澳 七九二 无

以上第六区合共 正户九千二百九十五户 附户二十六户

第七区第一段前山 一二八四 一二一

第二段白石 七八七 四一

第三段柠檬涌 三五九 三

第四段吉大 五二〇 一五

第五段香洲埠 原阙未详

第六段山场 七〇四 四四

第七段华梓口 三三〇 无

第八段翠微 九九九 八六

第九段上涌 六六六 二三

第十段南澳 七〇一 四

第十一段里外界涌 一一八〇 一四

第十二段南屏 八二六 一二六

第十三段双石 二五一 二

第十四段北南 六八三 四七

第十五段湾仔 三沙 五五六 二七

第十六段横琴 二八二 无

以上第七区合共 正户一万零一百二十九户 附户五百五十三户

第八区第一段斗门各村 七八八 四

第二段南门各小村 九五八 三

第三段小濠冲各小村 一六八〇 一〇

第四段大濠冲各小村 一四八九 五

第五段马山各小村 一七九一 三三

第六段南同各小村 一一六五 六

第七段荔山虎山各小村 一四七三 一〇

第八段乾雾各小村 二四四七 六〇

第九段东澳各小村 五四五 三

第十段坭湾各小村 五九五 五

第十一段龙坛各小村 四九四 三

第十二段大赤坎各小村 一一四三 七

第十三段小赤坎各小村 一〇九四 二四

第十四段凤山各村 四九四 六

第十五段汉溪各村 一三九九 三七

第十六段南水三灶 三四七六 六

第十七段白蕉乡 八〇四 七

第十八段大托 一五一七 二

以上第八区合共 正户二万三千三百五十二户 附户二百三十九户

第九区第一段小黄圃 一二二五

第二段西新地 六〇 无

第三段北嘴 八四 无

第四段大伞 九〇 无

第五段三枕 七一 无

第六段大黄圃 二八二六 一五

第七段南镇墟 六一九 无

第八段对圃 新基 二五〇二 无

第九段新沙 九八六 三

第十段鳗子洲 九三八 三

第十一段浮墟 六三八 无

第十二段沙栏 九〇〇 三

第十三段浪网 二九八 无

第十四段中沙 三四九 无

第十五段南头 八〇七 无

第十六段屯饭 一〇三 无

第十七段三角 五〇七 无

第十八段乌珠 二一〇 无

第十九段潭洲 一七八〇 无

第二十段四沙 二二八三 无

第廿一段大岗 六一五 无

第廿二段黄角 三二九九 无

第廿三段横档 三二七 无

以上第九区合共 正户二万一千五百一十七户 附户二十五户

连上第一区至第九区，共二百四十七段，合共正户一十七万九千九百一十一户，附

户四千九百六十四户，此最近调查之确数也。

香山乡土志七

氏族

邑城仁厚坊黄族，其先江西筠州人。始祖元，西台御史，宪昭以直谏安置广州，卒于途。子从简留家南海，从东莞伯何真起兵，官至宣慰司副使。四世温德繇，广州右卫徙隶香山守御，卒葬东郭大北山。子泗，遂家香山。泗次子长乐县知县。畿，徙家会城。承宣里今双门底。八世至文谷公佐，生三子，分三房，国初长房一支迁回香山，二支、三支仍居会城，由宪昭至今传二十一世。

泗三子珩，居香山，别为一支。由宪昭至今传二十一世，族丁仅百余，然邑城数诗书世胄未能或之先也。

黄梁都南门乡赵族，始祖恻夫，江西鄱阳人。宋端平元年任本县令，有惠政，卒于官。子时鑑淳祐十年进士，宋末避乱至此，子孙寓籍焉。三世祖平冈迁居大赤坎为一支。明永乐初，六世祖光太再迁大沥岐。景泰时，七世祖晴峰始择居南门，分四大房。现一十七传，丁口三千五百余。

得能都张家边黄族，始祖阳，始兴人，任前山寨守备，明嘉靖时剿寇阵亡。次子万福葬其衣冠于老户头山，遂迁居此。

良都员峰曾族，始祖昌垣，原籍顺德，本朝始徙居员峰。

榄都麦族，隋上柱国铁杖之后。其十六世孙必达自南雄保昌迁邑之黄旗角。十九世元俊，元至治间又迁小榄，至今传二十三世代。

得都库涌陈族，始祖文龙。子天觉，宋绍兴八年试宏词科，赐进士第，家文顺乡仁山下。建城后徙库涌，子姓复分支陵冈暨隆都水塘头、冈背。现二十八传，合四乡丁口约三千余。

谨案乡贤列传，苍梧太守陈临子孙蕃盛，播于岭徼，而鄂州通判梁杞传称，海曲族望陈梁二家。天觉为开县之贤，文顺前属东莞，即今县城，徙库涌者长子彦也。陈族支派最多，俗有米碎陈，箩糠糖李之谣。天觉裔孙颐录谱略云：原籍珠玑巷，疑有误。

良都沙涌马族，始迁祖曰驿、曰驳，其曾祖端公宋南渡令新会，家于会城金紫街。子持国、孙晞骥俱郡守乡贤。驿、驳奉所生母林氏徙沙涌。五传至宋侍郎南宝，饬军殉国。元军欲屠潮居里，族众徙匿，明兴始复故土，侨寓张家边塘，遂家焉。现二十八传，三乡丁口约二千余。

仁都麻洲徐族，入粤始祖祖光，原籍江西赣州府瑞金县，元季宦游广州。至闰甫徙香山。越三世伯良，都察院都事，祀乡贤。五世曰观，未冠成进士，历仕刑部郎，壮岁归隐大石之阳。曰常，知玉山县，有循声。曰统、曰桢，皆岁荐，里人颜其间曰：南州，即徐屋街。子孙蕃衍，析居员峰、三灶等处。现二十一传，南州派约一千二百余人。

仁都麻洲李族，先世居南雄珠玑里，宋李避乱来广州，至新会。咸淳七年，始迁祖桂窗徙居香山仁山下。次子梦熊赘入黄旗都，遂家黄角。孙昌泰分支四都、岐山、小隐、大环、隆都、沙棚下。五世翠柏等居城南麻州。厥弟愚庵、纳斋居莲峰下埗头街。子姓分支库涌、板桥、羊寮等处，合麻洲、黄角、岐山、埗头四派丁口约七千余。

谨按：《麻洲李氏家谱·南来岁月考》，援榄都麦氏及新会莲边里麦氏两谱，南海洗氏谱云：为胡贵嫔事，珠玑巷九十七家于咸淳九年二月起程抵冈州，五月至香山，遂分居各属。《东莞英村罗氏谱》并载：绍定元年，批发路引，乃理宗朝苏妃事，南雄府印发冈州批判，至今犹存县衙。则南来似应以绍定为实，而麦谱并云：随流先至香山大良角，即今黄角，盖宋自南渡以来朝政不纲，辽金逼处，中原氏族流离播迁；又虑南雄地当要冲，定遭兵燹，挈家来广，不仅避妃乱已也。至《广东新语》云：河南祥符县有珠玑巷，南渡诸臣随驾入岭，至止南雄，不忘所，自号所居为珠玑巷。又云：巷在南雄州城东门外，原名敬宗门，表孝义，因避敬宗庙号，易名珠玑。广属氏族至自珠玑巷者，居其大半；而路引先罗麦李黄，仅九十七家，惟麦谱称并亲眷附行者甚众，南迁之议，发起于珠玑巷，故统而言之欤？事远年湮，传闻异词。近人《珠玑巷种族考》犹数典者所宜研究也。

隆都刘族，始迁祖汝贤，父仲敏，宋宣和进士，官南雄刺史，侨寓珠玑，避兵至广。子三人汝贤居次。绍兴末徙邑东乡土瓜岭。六传后开于族山谿角，析居邑城东南、龙聚环、涌头、寮后、龙眼树涌、坑口墟、北台、葫芦棚、湖洲脚、沙坪下、龙塘、库涌、新村。现二十七传，丁口万余人。齐东、古鹤等乡别有派。龙头环派原籍南雄，乃昭武将军刘禘当，明洪武初随军入广，家于榄都，仍隶军籍，历八传分支石岐、大墩、龙头环等处，丁口亦二千余人。

良都长洲黄族，始迁祖献，字文宪。先世闽之福州人，避乱徙新宁潮境乡，凡八传至献。宋理宗朝宝祐乙卯科进士，景定三年，官行人，册封安南国王陈日煊，归舟遭颶漂泊至香山，复命后遂卜居长洲。所娶平岚林氏女为继室，生子祐，孙广派，定籍良都，析居城北，分支大墩、麻洲、外界涌等处，丁口约万余人。

仁都麻洲黄族，凡三派，一霑益州同知、乡贤黄经祖仲翁，至自龙眼都，辟稽古堂，聚书万券，经居东林山下，筑山海斋，号山海子。一广东左翼镇总兵黄标，由南澳以宦籍香山；子琮，崖洲协，家仓箱街，故将军遗宅犹存；现七传丁口二十余人。

。一由广派祖分支，开辟新墟，聚族南仓街、东栏街、大石下，凡十二传，丁口约百余人。

得都义门郑族，入广始祖曰贤。宋天圣间以进士授广州郡守。孙六七学长，始居邑之长洲。再传至漕，试省元度，徙得能里之游街荫，复由游街荫析居濠头、西亭。其庞头一支则因度之曾孙贤赘豪兔旁，遂家焉。现三十传，支分四派，丁口万余，居邑城者闾閻尤盛云。游街荫旧志作鳌街荫。

谷都南湖郑族，谷都始迁祖菊叟，于宋仁宗朝自福建兴化府浔阳县入粤，任惠州路判，家于都之榕树埔，徙桥头。子姓分支乌石、平岚、南屏、雍陌，丁口约万余人。恭都南屏支始祖曰世宽，菊叟十三世孙。明嘉靖间迁来，分三支，现传十四代，丁口四百余。又一支同治十一年自谷都迁南屏，现传五代，丁口百余。

仁良都南湖郑族，莲塘始迁祖芑，宋以状元官广州郡；乾道壬辰年七月由福建莆田县徙香山，卜居莲塘。八传曰荣叟，元末保障邑城，掇县事；洪武十八年旌义士，祀乡贤。现二十八传，分居城内东里、深巷、厚兴街、基边、张溪、东丫、库涌、柏山、沙溪等处，丁口约七千余。

谨按：鄙谚有“刘黄郑，杀人不用偿。”之语，揆之情理必无是事，不过极形其族之富且强耳。如谿角、如长洲、如谷都、三乡聚族尤盛，迩来赶办地方自治，日形进化，渐臻文明，此语□无人道。

仁都南关杨族，始迁祖元规，宋绍兴庚戌进士，官广南提举，由扬州广陵徙广州，卜居邑城南。现二十七传，丁口二千四百余。四世祖仲玉，分支隆都申明亭，丁口二千二百余，北山、隔田、北台别有派。

大都南荫程族，始迁祖师孟，号正谊，原籍江苏吴县人。宋景祐元年进士，任广州经略使，修学筑城。子柏随侍，官东莞盐场，署县事。宋南渡徙居邑东乡大字都，支分安定、亨美、田边。现传三十代，丁口五千四百人。德兴王府长史定宦裔，居麻洲，今柏桎、合水口等处丁口亦数百人。

仁都城东侯族，始迁祖俊堂，原籍韶州府曲江县梅塘村。元至正从军赣州，明洪武二十六年改隶香山军籍，因家焉。子孙为邑著姓，现二十传，丁口约三百余。

榄都小榄李族，始迁祖必贵，宋咸淳间由珠玑巷避乱荔枝山，斩竹结筏，随流抵榄乡亭子步，奠居焉，即今泰宁坊也。孙光祖，隶大鹏军。八传至尚书文介公孙宸，始改民籍。现二十三传，丁口约三千人。

榄都大榄李族，乃烈士英妙子智，官江州判，聚族榄都，分支谷都白石等乡，丁口

二千余。又一支至自新会，原尚书任堂派，黄梁都李屋围乃任堂弟棕宇裔。两族亦千余人。

仁都麻洲蔡族，始迁祖益崇，原籍南京凤阳府，宋时任南雄判。子本宏徙香山，居南门。数传分支恭都那洲、隆都南文。现传二十六代，丁口千余。古镇一派尤为大宗，恭都上栅、隆都岭后、四都贝头别有派。

谨按：蔡氏谱：本宏迁居，传至四世，香山乃开县云，则蔡实邑之旧族也。

仁都麻洲蓝族，宋咸淳间至自南雄珠玑巷。四世祖分支小榄，丁口共一千五百余人。

谨按：麻洲氏族有“蓝、禰、蔡，不够胡、卢、蒲一勺。”之谣。邑志选举表有赣州教谕禰国彦；岁贡禰忠，交趾利仁知州。蒲伯龄，岷府长史。卢瑞，新淦令。卢渊，岁贡。卢锦，重庆府教授。蔡子彰，岁贡。蔡观、蔡子良皆著姓也。麻洲近推李、徐、高、陈、梁为大宗，六族只存蓝、蔡，他如欧光、曹登、周宗、曾贤、姚明诸家，或他徙，或子遗，民族消长，麻洲有余慨焉。

仁都麻洲柳族，始迁祖乐会知县齐，自湖南长沙宦琼州，遂籍邑之仁都，子姓分居茅湾、灶贝，现十五传，丁约四百人。

谷都茅湾麦族，始祖松吕，自新会草坪迁来。现十七传，丁口百余。

隆都青羌黄族，至自新会杜阮乡。其始祖德澄负贩隆都，娶妻生二子质初、质正，留居青羌。子姓分支龙聚环、板尾园、土瓜村，丁口千五百人。黄屋坑、沙棚下、小庞头各派丁口约千余人，迁居邑城北门、小榄等乡尤贵盛。

仁都紫里李族，始迁祖华京，原籍新会潮连。康熙三年移边，子日英与弟梦熊东木、先梅、瑶岳等同徙石岐。孙修凝由新会学拔香山，隶籍所都，聚族沙冈墟，支分翠微、小隐等处。谷都沙冈乡始迁祖占伟，与正薰街建平令龙翔孙曲沃令卓揆，家亦至自潮连，俱任堂派，丁口共千余人。

隆都李族，至自新会者分尚书任堂两派。先世河南祥符人，系出唐凉国公愬。十传至銓以御史监军南雄。孙乔木，宋兵部尚书，绍兴间奉使至古冈，因家斗洞。见新会志寓贤传即文庄公。也十四传孙尚璧，明万历从涌头曰尚智任堂派徙田头，分支金角环、石斤、青羌、象角等处。尚书派：一至自禄洞，以大岚、岚霞、起凤环三乡为大宗，明初始迁祖曰大佬，分支祖岚肇等。一至自荷塘，以恒美、涌边两乡为大宗，明代始迁祖曰康所，先居南川；乾嘉学风岚霞、恒美为尤著。一至自瓦冈，居石岐城西南。一至自麻园，居张家边、牛港、柏桠，合两派籍隆都者约一万一千

丁口云。又一族于康熙二十五年由新会里村迁来，始迁祖石轩，寄籍隆都李宗茂户，迄今十传，丁口四百余。

隆都叠石余族，始迁祖文举，至自南雄珠玑巷，分支全禄、下坑、麻洲等处，现二十二传，丁口三千余人。

隆都濠涌方族，始迁祖榕涧，至自肇庆府开平县，初徙平岚，转居濠涌，分支城内、大都、左步头、谷都、下涌等处。现二十四传，丁口五千余人。

仁都邑城郭族，原籍曲江县。初迁南海大同村，再迁新会天河里。明永乐，曰梅山始定居香城。现传十八代，丁口五百余。

良都槎桥落郭族，始迁祖致正，由南雄徙邑城南麻洲。子复，官黄田场管勾，尝捐金修学宫、置学田、筑桥梁，宦成，隐老安山，卜居槎桥落。县治堂柱根于是桥，马藟葵木也。子侄分支麻洲街、竹秀园，而平岚、桥头、翠微尤为大宗。现传二十四代，丁口共三千余。

良都牛起湾杨族，始迁祖宋博士恒，号云巢。咸淳间由珠玑避难邑之深湾，因移边之役徙牛起湾，隶良都。现二十二传，丁口一千六百余。

恭都下栅李族，始迁祖先德，亦至自新会，由行伍戍恭都下栅，娶氏林生子四，因家焉。分支厚江涌、茅湾、外埔、南大涌、外壘、河头埔、三灶、张家边、李家村等处。现十四传，丁口约三千余。茅湾派同光闲多，起家洋务，有号秋坪者，能办地方公益，与同里麦润斋筑桥、亭、石路，行人便之；在上海筹赈，任画、任费。没后，疆臣请于朝，追赠道衔。会城翰禄桥重建御史祠，与田头、大岚、恒美、涌边捐赀尤厚。

仁都邑城汪族，始迁祖良，号野庵，乃越国公裔，二十传孙也。子鸿业，号万川，宋嘉熙登进士第，随授南雄保昌县令，殊有政声；良就养任，故邑人爱之，留居此土；继因兵燹，良精形家言，见香山为南番古粤之冲，山川秀异，爰卜居武峰下。子孙分支南乡、西乡，现二十三传，丁口未滿千。

恭常都唐族，始迁祖绍尧，宋度宗咸淳七年为避胡妃之祸，由南雄珠玑巷迁居新会，复由新会迁香山唐家乡，地本荒原，旧名釜涌，唐氏至此遂改今名。家焉。六世有名广礼者，迁居本都鸡拍村，另纪。名广润者，迁居东莞。七世名竹庄者，迁居本都那洲村。十五世名广元者，迁居新安，现计二十五传，丁口一千八百余；鸡拍五百余，那洲百余，共丁口二千五百余人，迁东莞、新安者不及计。鸡拍族始迁祖隐翠，广礼孙也。广礼同子东溪由唐家乡迁居得都江尾头村。东溪子二，曰隐翠、曰仕隆。仕隆仍居江尾头。而隐翠复迁鸡拍马坑地方，开垦田园，时明成化年间也。

；子三，分三大房，现二十三传，丁口约五百余人。按鸡拍村唐君调查报告云：明正统间，奸民畚蚩盗采鸡拍村银矿，村民拒之不胜，屠戮殆尽，其余流离转徙，几变荒墟。而隐翠公遂迁居于此。嘉靖时，方相国献夫奉旨开采银矿，驾驻村内，与隐翠公子石屏公契洽，且制锦轴为文寿之，而悬志纪事载正德中奸民畚蚩盗采村矿，屠戮村民；至嘉靖时，苗脉已尽，乃散其地，鸡犬桑麻俱尽等语。考鸡拍旧址原为杨、文二姓人所居，被贼屠戮，即杨文二姓之人。文氏现已无传，今杨氏子孙犹能道其事者。唐氏由明成化时迁居，至正德时乃开基鼎盛时代，何以鸡犬桑柘俱尽，考之谱牒亦不载屠戮之事，至谓嘉靖时矿苗已尽，何以方相国又到开采？志云：正德或正统之误耳，说颇详核，可补史乘之失；且关民族之消长，合著于此。

仁都邑城东门外张族，始迁祖镜辉。由顺德简岸乡迁来，今二十四传，丁口二百余人。

圃都大黄圃孔族，始迁祖文基，由顺德黄连乡初徙大黄圃，分支榄都。两派约四百人，其大派俱由山东曲阜命名，冠以广昭等字，盖圣裔也。

良都良字都梁族，原居延福里，即石头村，与沙涌、库涌毗连。宋代产三乡贤。庆历进士、比部郎、鄂州通判杞，致仕时建议立县。其裔孙现亦嘉熙进士，知南康。元明间徙族北台溪、漕边等乡，合福涌两派丁口约千五百。

谨按：梁乡贤所居石头村，今名井尾，与槎桥落尤近。土人锄地种植，屋村尚存。前数年掘得一古铜凤，翼长尺许，重拾余斤，巨家旧物也。乡贤冢墓，县志未详，家谱云：葬柏桠斜阿婆墟。蔓草荒烟，久无觅处。石头村大仰环，乃其妇墓，以乡贤衣冠合祔者。向由漕边、福涌两派祭埽。光绪甲午，福涌利其旁穴，先图控据；漕边还诉得直，该姓父老嘖有烦言。吾邑山案，强半类是惑形家言，失尊祖修睦之谊，诚陋俗也。

榄都小榄何族，系出宋尚书仆射何桌之后，原籍四川。宋南渡入岭，侨居南雄。桌孙九郎、十郎偕来邑之榄都。十郎族阀尤盛，乡贤述忠、述瓚、明首辅吾弼、制府璟等皆其裔也。现传二十余代，丁口约五千余人。

四都大车林族，始迁祖小三，自宋南渡由南雄珠玑巷迁来，定居于此，即孝廉方正乡贤谦家也。子姓分支那洲、田头等处，现二十五传，丁口千余。安堂一支同隶四都二图，族姓尤蕃，别有派。

四都林屋边林族，始迁祖孟七，明初由福建至榄边。分支山洲坑、陂头、窈窕、沙棚下、大岭各乡，丁口三千余。

四都赤坎西堡林族，始迁祖省元，宋末由南雄徙邑城。五传至子卿，聚族西江里。

现二十六传，丁口共五百人。

四都赤坎东堡阮族，始祖元辅。宋末由珠玑巷徙香山东北莲塘街，随迁东乡四字都赤坎。子与子以孝旌。八传至冠山，分支小隐。现二十六传，丁口千余。

隆都象角阮族，始祖佛生，明初自冈州卜居龙眼都。先世御史中丞逵，宋南渡宦游粤东，居南雄珠玑巷。子姓复徙冈州，佛生其五世孙也。佛生子观泰登明永乐乡荐。现二十一传，丁口约五千。

隆都象角彭族，始迁祖圣养，原居东莞琥珀坑，自莞庠游学香山，徙隆都象角乡濒海而居。四传至翠崖、谷山开族。今历十八传，丁口一千有奇。

四都小隐黄族，本姓王，始祖慕槐，世居邑西隆都石门乡。子怀东，明洪武间隶军，籍易今。姓乡贤林谦撰黄姓谱序，详其端末。现十九传，丁口约五百余。

榄都大榄詹族，初徙谷都之西山，廷贵分居榄都。现十八传，丁口二百人。余庆知县詹官乃廷贵裔孙也。

谷都沙冈张族，始迁祖处顺，亦至自新会。现十六传，丁口百余人。

仁都麻洲庞族，世居隆都龙聚环，数传至沛庵分支城南麻洲街，丁口合共千余。

榄都海洲魏族，始迁祖天目，至自南雄珠玑。分支茅湾、外埔及佛山镇，其在本邑者现传二十二代，丁口五百余。

榄都海洲袁族，府尹三接之后，先世至自东莞。现二十二传，丁口约二千有奇。

仁都邑城高族，原籍闽之莆田。始祖师曾，官保昌县丞，遂家南雄。子南洲，宋宝祐乡举，初徙香城。孙参军添献粟饷宋军，从端宋至冈州御敌殉难。遗孤宸英生子四，曰元生、梁生、洪生、忠生，其后分支城南麻洲马头街、治东节尾新村、白庙、城西长塘街、隆都豪兔、岐坑、大石兜、青羌、良都长环、尖涌、寮后、北台、磨刀等处，丁口七千余人；徙顺德马滘、洪简者亦成巨族云。

仁都邑城萧族，至粤始祖世范，宋嘉祐贡士，任南雄推官，流寓广州，有子曰苑。应绍圣拔萃科，拣选香山镇，遂家于麻洲街。现三十传，丁口六百余。

仁都邑城毛族，始迁祖金，原籍浙江余姚县。洪武初随常遇春分守耒阳，后从军入粤，以征贺县功授香山百户，因家焉。现二十一传，聚族邑城，支分东乡濠头、西乡田头、寮后等处，丁口约七百余。别派如谷都神前、马边埔两乡，合千人；城东

柏桎亦有数十。应龙、国斌父子先后从戎阵歿，以难荫其后人，至乡贤诸暨令可珍，子安仁令、天翀皆守御所百户。裔两族俱以忠义显，天翀台湾之役为尤著焉。

淇澳锤族，从征台湾，功授左都督，固原协镇，宝家也。其先由南雄珠玑徙邑之良都，再迁淇澳。丁口现约千余。别派如榄都锤家巷、谷都西山、邑城西市俱至自新会，丁口合数百人。

四字都濠涌严族，始迁祖汉臣，宋末由南雄珠玑播迁至邑之东郊，定居濠涌。现二十六传，丁口共一千三百余，

四字都南塘简族，始迁祖古峰，亦由珠玑徙居南便塘。现二十六传，族丁五百余人。

四字都陈族，凡三乡，曰莆山、曰茶园东、茶园西。其始祖宗公，于宋末由南雄珠玑徙邑城。至元顺帝间，裔孙志和迁莆山，玄保迁茶园，现二十一传，丁口共二千余，其留居邑城及小隐亦数百人。别派如石岐、嵩县令、书布衣斗文家，氏族最古。麻洲、沙冈、柏桎、员峰亦分数派，得都张家边、窈窕族至自新会石头乡，析居外界涌等处，丁约千余。隆都新露亦至自新会。小黄圃族阀尤盛，近由荫尾、上巷、白庙分支，丁口合二千有奇云。

隆都亨里乡汤族，始迁祖佛保，至自新会河村，于明景泰间徙居邑西之亨里。现传十九代，丁口共三百余。

四都神涌乡周族，相传始祖疆，唐秘书郎外迁郡守，由陕宦粤，留居莞邑杏花村，即今城东良朋里也；建城后分居神涌等处。明洪武甲子，御史尚文始领解额第进士，任龙岩丞。其孙慈坚居城南，与郑子纲、容悌与、杨余荫称麻洲四贤。现神涌一派已四十二传，丁口约七百余。城东南关塘埔、齐东等处合数百人。

吾邑氏族，南宋以前多无可考，即族望如陈梁二姓，按其谱牒或隶东莞，或属南番，先代仍未及详，亦氏族中一大憾事也。周姓徙自长安，距李唐至今千年，旧族莲峰之下曰杏花村，古迹相传，可补志乘之缺。

隆都龙头环周族，其祖子高，于元末由东莞黄塘从戎，隶东莞伯何真麾下；明太祖定鼎南京，散军屯田，子高充屯长，移驻小榄高沙，嗣遭海贼扰乱，迁居龙头环。现计十九传，丁口约一千有奇。

榄都小榄梁族，厥祖宏益，由南雄珠玑巷迁古冈州，又迁小榄。分二族，一松隐祖族现十余世，人口约六百有奇；一毓灵祖族现十七世，人口约五百有奇。

榄都小榄张族，始迁祖曰梦兰、曰岱峰，由番禺石井迁小榄，同隶卫所军籍。现传十八世，人口八百余。其余或由新会迁居，或由海洲迁居，支派不一，共计约一千五百余人。

恭都北山乡杨族，始祖泗儒，宋嘉熙元年丁酉，自南雄珠玑巷迁来。分两支，现传二十四代，丁口一千七百余。一为素略户，一为先义户，同聚处乡中。

恭都南屏容族，始祖六二，宋嘉定间自新会迁来。六二生光祖，光祖生八子，遂分八房。由光祖至今传二十三代，丁口共二千二百余。

恭都南屏林族，始祖胜和，明洪武十九年自黄梁都乾雾村迁来。现传十九代，丁口八百五十余。

恭都南屏张族，始祖万八，宋咸淳十年自南雄保昌县珠玑巷沙水乡迁来。分两支。现传二十四代，丁口一千二百二十余。

恭都南屏郑族，始祖辉山，乾隆初由古鹤乡迁南屏，分三支。现传六代，丁口百余。

恭都南屏张族，始祖清怀，明嘉靖时由石岐迁平岚，再移南屏。现传十五代，丁口三百余。

谨按：县治前有十二所公祠，考明洪武初定卫所之制，香山置守御千户所、百户所，其官多世袭，军士亦父子相继。祠盖是时千户、百户等子孙流寓本境。联各姓建此，以奉其先者也。有盛氏亦居其一云，余俟考。又县志职官表，千户有陈、钱、刘、王、何、李、林、田等姓，百户有周、桑、王、穆、马、李、蔡、张、毛、尚等姓。

又：榄都如梁、谭、周、张等姓亦明初卫所屯田官军流寓者，故称军籍云。

香山乡土志八

宗教

香山未立县以前，延福里人梁杞已以好学通经著声。宋仁宗世，自设县、立学校，士习翕然称盛，与他州相颉颃。逮明而黄双槐、粤、洲、泰泉三先生出，学风所被，俗鲜歧趋，有海滨邹鲁称。佛、道二教当盛于宋乾道中，县令范文林崇建寺观，时刘中行且有舍宅为寺之事。其后庵寺踵建，惟信徒居少数，于社会无甚影响。若基督教，则自万历九年意大利人利窦至澳门后，遂渐沾染中土，然邑境虽逼近澳门，通邑实无进教之人。乾隆时，彼族建唐人寺，其赴澳礼拜者间有外省人，以顺德紫坭人为多。据田志稿载县令张汝霖奏记。旋奉文封禁，故自有明三百年来，内地人民向无开堂传教者。咸、同以降，彼人援内地传教约章，各县均次第设立，而县城教堂前十余年始有之耳，其余各乡或有或无。兹据调查所及者著之，不详者阙焉。

榄都光绪二十二三年间，始有人来传天主教，今信徒约二百余人。耶苏教人甚少。

谷都墟仔乡、平岚乡各有教堂一所，信徒人数未详。

隆都现无教堂。

现调查得全邑耶苏教人约二千四百余名；天主教人最少，除榄都外，不过十数人而已。

香山乡土志九

实业

全邑士类制科未废以前，有司岁试，隶诸生籍者约四百余人。童试约二千余人，近年以入学堂肄业者计算，据光绪戊申年统计，全邑学堂只六十余所，学生约二千余人，其余私塾学徒亦称是云。

全邑农民约占泰半。东南一带沙田上腴，种稻者夥，西北一带则蚕业为盛。榄乡民数约十万，而业农者几三万人，余可类推。东南濒海诸乡，如恭常都属民亦有业渔者，然不及农业之盛也。

工业之素有名者，如东乡牛起湾、濠头、陵冈、窈窕诸村之夏布，南萌乡之棉布，库充乡之铁犁前十年，谷都大布村亦有专铸此者，运售美属檀香山各埠作垦具，颇获利；后美禁华，工业遂不振焉。颇多输出。他若邑城之习艺所、小榄之工艺学堂、谷都大布村之机器织布厂、石岐上基之机器造米厂，尚占工业之一部分。此外，制铜灯、竹合者，邑城有数十家，销场亦狭。榄都竹合以登云桥下一肆为精，近此肆仅得一人能之，恐以后将无传人矣。其余旧有之业，如攻金、攻木、埏埴泥作，则仅资糊口而已。

商人则东南诸乡人多侨外营业，如谷都、恭都各乡，民以往南美洲者占多数。内地如石岐，商务本盛，近亦凋落逊前。澳门洋界以商务著名，近亦凋落，只赌场娼院占多数耳。虽设立商会，成效罕睹。惟香洲开埠，发达可期。小榄茧丝销场尚旺，差强人意耳。近得宣统元年本县申报户口职业分别统计表，录之于左。

官 绅

士

农

工

商

兵勇

书吏

差役

杂业

无业

乞丐

合计

文七品、武五品以上

生员以上

八二

六三〇

二二七

约二十余万

约五万余

二八三〇

九三二

九四

五〇

无

二百余

五六

三七〇五七〇

按：此表全邑士类仅得二百二十七人，系据儒学查覆者其入学堂肄业诸生尚未列入，似宜入本门第一条调查人数，参观方见赅备。

香山乡土志十

地理仁都良都隆都得能都四字都

大字都谷字都恭常都附场都大榄都

黄旗都附圃都黄梁都

地理

本县，在广东省广州府城东南二百二十里。

本县广一百有三里，纵一百一十四里。东至新安县海界六十八里，西至新会县界三十五里，南至马角海岸五十三里，北至番禺县界六十一里，东南至新安县海界一百一十里，西南至新会县界三十三里，东北至东莞县界五十四里，西北至顺德县界四十七里。按：以上俱据张制军人骏《广东舆地全图》改辑。

本县分为十乡，十四都。附城仁厚乡为仁、良二都。仁都二图，良都六图。西南德庆乡为隆都。六图。东长乐乡为四字都，二图。永宁乡为大字都。二图。东北为永乐乡，为得能都。六图。东南丰乐乡为谷字都，三图。长安乡为恭常都、二图。场都。三图。西北宁安乡为大榄都，四图。古海乡为黄旗都、四图。圃都。一图。西南潮居乡为黄梁都。二图。外有所都，一图。附仁良二都。按《祝志》云：所都图一，据档册新增，未详附何都。而《田志》稿则云：疑附仁良二都，今姑从之。而场都则嘉庆、道光间所增，仍附恭常都。圃都则乾隆十一年所增，仍附黄旗都者也。

仁都

仁厚乡，故延福里香山镇。宋既建县，改良字围。自明洪武十四年编籍立仁厚坊，城中居民及县四城门外俱属之，四周均界良都。

古迹

元旧县土城，在城南。洪武二十六年开展城池，建守御所，千户改筑，故地遂为军营。

医学，在县治西。永乐元年，本学训术程胜禄创建，今废。又有阴阳学在县治东，永乐二年建，久废。

宋杨伟隼宅，在城南水关头。伟隼为广南提举学事，卜居于此。内有松竹园，为前明杨余荫读书处，今为杨秀峰祠。

刘中行宅，在县东南五十步无量寺故址。宋乾道中，掘地得铁佛，遂舍宅为寺。洪武中，寺徙寿山下。

友琴堂，在县前。明黄瑜故居，今在寿山里内郑崇本堂内。

敦睦堂，在城南。明杨余荫建，黄佐题额。

丽泽亭，在麻洲街。邑人为杨绍孙建，正统间圯。杨余荫于故址建继美亭，岁久废为列肆。光绪二年，杨氏子孙毁肆重建，复丽泽旧名。

演武亭，旧在沙冈。明初隶香山所，操练屯军，岁久亭圯，建关帝庙。

小鲁亭，在莲峰麓。明嘉靖时，大学士张孚敬厘正祀典，命易学宫先师像为木主，邑人不敢毁像，建亭安之今废。像迁学宫燕居亭。

涵一亭，宝书楼，明黄佐建，俱在北城外韭菜园。黄文裕公书院，今圯。

仁山，在城内。其阳为县治，为上有书院，即仁山书院，明嘉靖二十四年，知县邓迁建，黄佐有记。其阴为仕学台，其左曰丰乐园，上有陈文龙墓。文龙，天觉之父。清明日其子姓由东仓入祭扫。今院及园久废，惟仕学亭在墓前数武，亭即台址。嘉庆十一年，知县彭照麟重建。山多鹤巢。其东北曰：庆寿山，城跨其上。东南曰：丰山，昔仅培塿，近民居，已平。西曰：武山，城垣跨之为战台，有西山寺。明邑人毛可珍读书处，延僧居之，山门颜曰：第一峰。有红棉六，数百年物，岁久枯，邑人别植新者。四山外尚有盈山、在丰山之东，东为仁寿街。福山、在仁山东南，其南为长泰街，西为英武街。凤山，在福山东南，西至四方井，东至城垣。已平于筑城时。明洪武初。以其环拱县治，名为七星峰。

月山，一名笔架山。在城南麻洲街尾。有迎阳石，乱石中此石特出，高约十丈余，大四五丈许，上平可坐十余人，壁峙路旁。明成化间，巡海都督张通题字画盈尺，遒劲古媚林木阴森，佳境也。石旧名挂榜，自张易以今名。康熙元年六月，飓风折石旁古榕，石因仆地，阳字入地五尺许。题名已埋土中，不可见。北数十步有狮头石。高可二丈，以形似名。南为金鱼石，大尺许。在火神庙前。相传，庙前旧是大洋，石浮海面，潮不能没，今皆成田，与地平矣。

东林山，俗名雷坛山。在县南半里。高五十丈，广百余丈。西为莱菁街，山川坛、养济院皆在其上。邑人黄经构小海斋，读书其下，易名东林。与西北半里之西林山相对。

石岐山，亦名阜峰，俗称烟塾山。在县西半里。高十丈，广五十丈。古有烽堠，今废。明万历间建七层花塔于其上。隐泉寺、众香亭在其麓，与莲峰相对，直抵于海。

莲峰山，在县东北一里，即旧寨。以元季徙治于此得名。其阳为学宫。

祠庙

学宫，在城东莲峰之阳。宋绍兴二十六年建，淳祐四年徙建城内西南隅。元泰定间徙复莲峰旧址。明嘉靖七年迁建于城内丰山下。万历三十三年又迁复莲峰旧址。戟门外左为名宦祠，祀三十三人，详耆旧录附。右为乡贤祠、祀二十九人，详耆旧录附。忠义孝弟祠、节孝祠俱在义路门内西。

姚少保祠，即姚爷庵。在城隅东水关上。康熙间，邑令姚启圣妾赵氏出家为尼创建，有启圣画像犹存。

彰义祠，在城内中学堂左。乾隆间邑令暴煜建。祀宋刘汝贤妻罗氏。罗氏尝捐田筑县南之竹迳陂，灌田数百顷，今称其陂曰：罗婆陂。

诸葛武侯庙，在南门外。庙藏汉骆越铜鼓。鼓式详《祝志·金石门》。

坊表按县中坊表多圯，此不过据县志存其名耳。

忠孝节义名邦坊，明邑令周维持建于石岐接官亭正坝头。分列宋、明忠臣、孝子、节妇、义士姓氏。嘉庆十六年重修。进士坊，在县左，为明进士黄钥立。擢秀坊，在县左，为明举人黄瑜立。解元进士坊，在县右；宫詹学士坊，在武镇坊，俱为明礼部侍郎黄佐立。大京兆坊，在迎恩街；两都京兆坊，在石岐接官亭后，俱为明府尹袁三接立。六朝元寿坊，在达德街，为明大宾儒官百岁黄化立。岐海流芳坊，在石岐津头，邑人为明知县邓迁立。

桥梁

南门桥在南门外。登瀛桥在西关下娘妈厂。西门桥在城西，内外二所。西关桥在水关，内一外一。东关桥在城东，内外二所。桥仔头桥在城南麻洲街尾，光绪丙申重建，易名南安桥。青云桥在石岐山西北，通圆山仔村。

市镇方言谓市曰墟。

石岐墟 县前街市 西市 新墟市 大社坛市 沙园市 朔关市 万安街市 沙冈墟市 大井头市 上基市

学堂

香山中学堂东门城内。香山初等小学北门城内。颖川初等小学西门城内。隽德女学堂西门城内。

仁都属城内街十四，南门外街十四，北门外街十三，东门外街十，西门外街十五。

良都

仁厚乡良字都，故延福里香山镇。北界黄旗都，东界得能都，西界隆都，南界谷都，中包仁都，西北界榄都。

古迹

宋行宫，在沙涌。即马南宝宅。按：今马家祠是其故址。端宗自闽入广行宫三十余处，此其一也。明黄佐有诗。按：沙涌北距海，东南距山。故老相传：宋兵分屯村前冈，深沟高垒，城门备设，今尚有南山北门之目云。

宋疑陵，在县南五十里寿星塘。塘侧陵迹有五，盖马南宝所筑宋端宗疑冢也。

明处士黄泗墓，在寿星塘。侍郎黄佐之曾祖。

柏桠斜，即北丫坑。在县东北一里。南为大柏山，先农坛在其南。有明知县黄瑜祖黄温德墓。

大柏山，在县东一里。元伪千户王一据之。元末海贼相继劫掠，宣差托罗克台守其上。一名旧寨山。

戴土岭，即大岭。在县南三十五里。南有花树坑，山多刺桐，元邑令黄裳有诗。曰：闻道乡人说刺桐，未花先叶是年丰；我来到此忧民瘼，只爱青青不爱红。

第一角海，在县西南二十里。海门浅隘，南临大洋，为县门户。明初，都指挥花茂防寇于此，民呼曰：花夫人马头。

金钟山，在县西南水道三十五里。其东有烽堠。嘉庆十四年总兵许廷桂与海贼战，殁于此。

祠庙

王巡抚庙在长洲乡，祀巡抚王来任。事详兵事录。

桥梁

天王桥，在县南桥仔头村；宋端宗驻蹕沙涌，道经此，得名。村旧有天王庙，今圯。清风桥在城外西南隅，路接北山村。槎桥在槎桥落村，相传村多马留菱，木有大逾合抱者二。初建县时用为县治前柱。其根，乡人析以为桥，似槎，故名。石鼓桥长二十六丈，嘉庆十年修。

学堂

香山高等小学东门城外。南区简易小学南门城外。西区简易小学西门城外。东北区简易小学北门城外。烟洲简易小学北门城外。烟洲两等小学长洲乡。第一简易小学长洲乡。公立初等小学员峰乡。教忠初等小学沙涌乡。

良都属凡村三十七。

隆都

德庆乡龙眼都，故永乐乡龙眼里上下围，在城西南三十里，今为隆都。西北界榄都，西界新会县，南界黄梁都，东界良都。

古迹

宋提举学士杨伟隼墓。在茶园织篷坑。

莲谷庵，在大庞头村左旁。有书舍数椽，有古松七株。郑太史应允读书其中，颜曰：七松书屋。

招安亭，在大涌海口。嘉庆十四年，海盗张保等乞降抚，总督百龄命知县彭昭麟筑斯亭以受降者也。详兵事录。

象角山，在县西十五里。西北临海。旧志：宋亡时，一夜号恸至晓，见小石室立于上，俗呼佛仔屋。

观音岩，在大石兜村后，城西十里。山麓峭石，高广数丈，巔平积水如池，曰：晒经台；曰：浴鸢池。石磴数十级，螺转而上，为观音岩。昔有猛虎据焉。相传，明僧元默来此，虎逊去。次日，仍返洞旁大吼。元默为虎说偈，即去不复来。故又曰：虎逊岩。

祠庙

王巡抚庙一在坑口墟，一在西河桥侧，祀王来任。孝节祠在小谿角乡，祀明刘二娘。事见县志列女传。义勇祠在西河桥亭。咸丰六年建，祀难死张绍才等。昭义祠在大涌乡。道光二十六年建，祀难死林大斌。

桥梁

西河桥在龙眼都河，为都要津。婆石桥在婆石村。宋杜氏媪建，或云桥所跨涌名蒲石，“婆”乃“蒲”之讹。

市镇

沙溪墟 南文墟

学堂

龙山高等小学豪兔乡。端本两等小学山谿角乡。杨氏家族初等小学申明亭乡。明新初等小学下泽乡沙溪堡。明德初等小学龙头环村。觉群初等小学安堂乡。善善两等小学南文乡，现停办。岚阳初等小学大岚乡。振英初等小学南村乡。时新初等小学叠石乡。初等小学象角乡。初等小学青姜乡，现停办。

隆都属凡村五十八。

得能都

永乐得能都，故延福里得能字围，在城东十里。西北界良都，东界四字都、大字都，西界良都，南界谷字都。

古迹

八帘障山，在县东二十五里。山界得能都、四大都之中。山开八面，中有土洞，深莫测，俗名黄巢藏。相传，唐末乡人避黄巢乱于此。

茄头角山，在县东二十四里。张家边之东。山上一阁，祀三仙娘。阁下乱石礧礧，中一石略平，蹠迹深显，今仍存。

宋陈天觉墓，在库涌村后山。

桥梁

东桥在濠头，旧有榕根跨峰成桥，后易以石。普济桥在宫花村。

学堂

五峰两等小学濠头乡。第一初等小学同上。

得能都属凡村四十四。

四字都

长乐乡四字都，故延福里四字围。在城东三十里。北界都，东北界东莞县，西界得能都，南界大字都。

古迹

宋孝子阮与子宅，在赤坎村。

明李孙宸墓，在县东三十八里黎村。钦差行人谕葬。

烟筒山，一名烟管山。上有烟塾旧址，故名。在县东三十五里。东南一小峰有石泉，俗呼为卢亭井。山北临海，巔平坦，屋地数间，犹存耆旧云。国初时设以守望者。

小隐山，在城东三十里。原滨海有小隐汛，后因沙淤成小隐村。

祠庙

义勇祠在黎村下伽涌炮台下，祀彭仲伦等七人。详兵事录。

坊表

孝义坊，为宋阮与子建。在赤坎村与子宅前。

桥梁

九度桥在茶园村东。五度桥在九度桥东，四、大两都水出涌口门经此。

市镇

榄边墟

学堂

云衢高等小学大岭头。

四字都属凡村十八。

香山乡土志十一

山脉

本境以五桂山为镇山。其支系绵亘黄梁、谷字、恭常、四大、得能、仁良诸都中，本发脉于新会县之百峰山。历古兜山东北，越厓门，东折虎跳门，西新会，东香山，以海中虎矢石为界。为黄梁都诸山。北行越海为大托山，渡黄麋门为小托山。经螺洲山上磨刀门，再渡海为丫髻山。属谷都，由丫髻山北行为烟墩山，又东为五桂山。五桂山分南、东、西北三支。南支为恭常都诸山，直入蚝镜澳，西越海至三灶山属黄梁都。止。东支为四、大二都山。由震竹山又分二支：一东北行逾海为回头雁山属谷都。止，一东行至大流角山属大都。止。西北支由马屯属良都。至虎迳，分支为双合山诸山。东北为得能都诸山，又西至县治仁山属仁都。止。其余隆都山脉来自新会县圭峰。最著者卓旗山。榄都山脉来自顺德马宁村。最著者榄碇冈，其右飞驼山，则来自海洲。黄旗都山脉尤繁杂。分三支：北支为小黄圃诸山，自顺德拖青岭来；西支为大黄圃诸山，自顺德容奇村来；东支为黄角诸山，从番禺沙湾来；惟古镇、曹步、海洲诸山，则皆来自新会村石嘴，越鲟鲤沥而来。又东越海为大榄村之飞驼山。

鹤兜山，在县西南一百二十五里。黄梁都盘纡三十余里，其东麓西坑水焉，流东向入马鲚门海。

黄杨山，在县西南七十里黄梁都。与鹤兜山连。延袤五十里，高六百余丈。西麓曰西坑，斗门涌水焉，流北向西折入海。

三门山，在海中，属黄梁都。距县西南八十五里。三山齐断如门，今皆成田，仅留小河。前半里曰竹洲山，为达邑城要津。

大托山，在黄梁都土城东北三十里。距县城南九十里。四际皆海，周遭二十余里，连冈盈畴，枕水通阡，村落环居，上有碉台，弁兵守焉。出为马齿门即马鲚门。

荷包山，又名牛角山。在黄梁都土城南七十里。与大芒山列峙汪洋中，高数十丈，广十余里。中有南、北二环，商贩渔船住泊日众。西属新宁海界，南则重溟。

丫髻山，在县西八十五里。锐出群峰之上，顶峙乔石三，远望止见其二，如丫髻然。

棱角山，在城东南八十里。南面海，四峰峻峭，下有龙井悬瀑，高七十丈，广百丈。峰四为邑治第二案山。

五桂山，在县东南五十五里。岩壑瀑布，与罗浮诸胜相埒。高八十丈，周二百里。上有五峰，左有大、小花园，北为青山、凤山、乌岩山。内有田百余亩。四望皆重洋，俯视一邑如片叶泛巨海中。香山得名以此。山之北宫花溪源焉，流皆东北向，至小隐港分支，一北向流，一东北向流。山之东南石门溪源焉，流东南向。

沙桥，在谷都东三十里。过迳山岭，甚峻，曰退田岭。在城南六十里，高百余丈，中通一迳，上为平迳顶。石鼓，十三里。在县南五十里为南北往来孔道，良都、谷都分界处。岭南每深山穷谷中通一路即谓之迳。

飞云顶，桀起于五桂之东南，为恭常都主山。东五里为潭井，东北七里为锦石，十里为北山，南九里为西山。

凤凰山，在城东南一百里恭常都。高七十丈，广十四里。东界南坑，北接官塘冈，西为金竹园、白蛾石、古壑诸峰，南赴海。涧水分左右中三支，左支东流入南海，右支南流入坦洲海，中支东流入东海。

鹅峰，在县东南九十里恭常都。南为马山、凤鹤山，东为东山、鸡公山，外为大海。居民采捕常在鸡公山下。

大角山，一名角头山。在县东南八十二里恭常都。由南山经凤山凹二十里至海涯，横堵众流，及入海，西折而东迅流金星门外，渡海即淇澳山。

鹅槽山，在恭常都灶贝村西七里。下为秋风角，与将军、龙井山隔海相对，距濠境澳十五里，为入澳津口之一。上有碉台遗址。

鹦管山，在凤凰山西南。峙立海中，高五百余丈，周回三十余里。山之东腰辟一洞，名曰：锡坑。田数十亩，村民耕牧其间。麓之西北名大湾底，环海深入，田数十顷，渔舟耕舍聚处如村市。南俯芒洲，北眺鹅槽，从海中望之，山形如荷盖浮于水面。

淇澳山，即旗纛澳山。在城东九十八里水道七十里。海中。属恭常都。高四百七十三尺。西北曰：夹洲，在海中。东北曰：鹿耳滩。西南曰：蒲湾，渔庄杂处。北曰：蟹岛，海中小洲也。近有拟辟商埠者。

望门山，在县东南一百一十里恭常都。起自北岭，延袤二十里至海门，突起群岫，隔九星大洋，内包乡都，外泊舟舰，渔樵纷集。

濠镜澳山，濠旧作蚝。突出海中，距县城一百四十里。澳者泊口也。其曰澳门，则以南在十字门，故合称澳门。或曰：澳有南台、北台两山相对相门云。澳为一迳达

前山，故前山为拊背扼吭地。前山、澳山对峙于海，南北一沙堤亘其间，径十里，尽处有山拔起，曰：莲花山。北麓有马蛟石。稍南为望厦村。过村折而西南，一山形繚而曲，东亘五六里，南北半之，有南、北二湾，可泊船，或曰南环。二湾规圆如镜，故曰濠镜，是称澳焉。

企人石，在澳门西十五里，城东南七十七里。又二十里为挂碇山，三十里为灯笼洲，七十里为马鬃洲、白春环、大吉山。山之东中水曰内十字门，小吉山之西北中水曰乾门。澳山山之东南西对横琴水中曰外十字门。申志：外十字门，其民皆岛夷也，今迁。内十字门有四山曰蚝田、距澳六里。曰大小马骝、距澳十里。曰上濠、曰芒洲。距澳十里。外十字门有四山，曰舵尾、曰鸡头、距澳十五里。曰横琴、距澳十三里。曰九澳。距澳二十五里。又乾门之南曰过路环、即盐灶湾，今客民私采石处。曰幽仔，距澳十二里。皆与十字门近。

老万山，城东南二百二十里大海中。高一千四百六十八尺，林深菁密，最为险隘。

震竹山，在县东南四十五里四字都，为五桂东南诸山杰出者。北为鹪鹩山。

四岩山，本名赐岩山，以陈赐隐此故名。俗呼白米山，在县东四十五里。东麓石盘溪水出焉，流东向。

东洲山，亦曰东洲门。在县东五十五里，海道六十五里。南距麻子村五里，属四字都。其山突入海中，中划然而开，上引江流之黄淤，下汇沧海之咸潮，湍涡漩，其势紧迅。门东名纱帽山，其东北名回头雁山，亦名台头山。其外名横洲山，与东洲山夹出而东是为横门，较东洲门略小，而湾曲如环，水略平浅，可泊舟矣。回头雁山之麓水甚浅，渡辄胶舟。东北为蚁洲山。全体皆石。又北为马鞍洲。西北十里为三洲。二洲旧皆在海中，今潭田相接，二洲只隔一港。又上为大洲，东北八十里为虎门。东南一百里为南头寨。东四十里为龙穴洲。

塔山，在县东五十里大字都当涌口门中，上建塔，鱼梁横亘一里许，其中堰水为闸，空承之以罟、以捕鱼。凡九处。潮汐出入势甚漂疾，梁以内则山水萦环，梁以外则波涛澎湃。东北为岐头山，东南为大流角山，皆当涌口门。两岸尽处，东临大海。海中诸山，近麻子外沙者为竹洲。其下有泗东山最傍岸，与崖口、泗门冈对，潮退可涉。

长江山。又名宫花山，在县东南二十五里得能都西。连双合山，上为蟾蜍岭，南接乌岩山，众水出焉，北合神涌入于海。

湖洲山，一名文笔山。在县西南，水道三十里良字都。高七十丈，广百丈。县治案山。山下有湖，久之成洲，因名。与金钟山南北相距八里许，其西皆濒深湾海，为

一邑水口要冲。

双合山，在县南三十里良都。两峰竞势，婉合如一。竹迳陂出焉，东西流，又北注绕县城入海。

寿星塘山，在县南四十五里良字都。东为石鼓 诸山。高二十丈，广二百丈。梅花水出焉。其阳为六十陂、大岭、石溪瀑布出焉，流西向。

下马岭，在县西南二十里。岭有迳，名下马迳。为良都西南通衢。

凤栖岭，在县东五里良都。西为仰螺山，南有汛，为东乡冲衢。

冰山，在县东北二里。北为东濠，海路通横门，地最险隘。

老安山，在城西南二里。上有古塔，东南皆田。西临海，为县水口冲要。

濠涌山，在城西南十五里龙眼都往来大道。

起凤环山，在城西二十里，滨临大海，往来大道。西界新会县。

叠石山，在县西十余里龙眼都。脉自新会圭峰渡海而来，为县治右弼之障。

青姜山，即卓旗山。在县西南二十四里龙眼都。高洁雄伟，为群山之冠。

古镇山，在县北八十里黄旗都。西接新会界。

凤山，又名小榄山，在城北七十里小海中。

飞驼山，即大榄山，在县北七十里。左为落霞峰、倚剑峰。

坡头山，在大塔山属圃都西南八里许海中。诸艘在洋望之，惟此山卓立特见，故多准之，以为出入。

横档山，在县治东北五十余里黄旗都。高五十余丈，横一百余丈。四面临海，山势如屏，以折怒潮之冲。山下为镇南村，乾隆己卯始有居民，今潭田日高，海水不溢，生聚渐繁。山之西南为鳌鱼山。西南遍种荔枝，东北海风劲烈，花而不实，惟松茂植焉。

龟冈山，城东北一百二十里黄旗都。滨临大海，最为险隘，往来大道。

蕉门山，在县东北一百二十余里黄角乡。东控汐引潮，水常淤浊，为巨洋出入要津。东南为东莞南沙山。

香山乡土志十二

水道 海岸 温泉

水道海岸附 温泉附

古镇海，为西江正派。中一支，津在县西北七十里，古镇乡之西北。水自顺德县仰船海东南来入本境。自海洲汛西南行五里为大石海。又南三里为高沙海。海牙滘自海洲、曹步二乡间东注之。又南七里为古镇汛，仍名高沙海。古镇乡深涌、北门滘二水东注之。又南里许为鲟鲤海，按鲟鲤沥亦此水之总名，见齐召南水道提纲。新会潮连海西注之。西分一支入新会、江门。又东四里至白蚝沙。古镇、南海源沙东注之。又南六里曰第六沙，在白蚝沙、东二沙之间为白蚝沥，第六沙河东注之。又南二十里至叠石海距县西三十里、云步海，合各水东北来注之详下。屈东南分流，绕鸡笼沙；又东南分流，绕芙蓉沙、广福沙，复合石岐水，自东北来注之。又南经磨刀门入海，计此水自海洲至磨刀门入海约行八十余里，皆平流，可行大船。

沙湾水，上承北江，由番禺县南境分三派，东南流入县东北黄旗都境距县城东北一百里，西派东南分流，绕沙洲，西北受一小水，经青姑沙，复合学洲汛水，合荔枝湾水，自西北来注之。又东南与中派会，中派东南分流，绕沙洲及三洲山山下为南横沙复合。又南与西派会，东派东南流经急水角，屈西南经蕉门，与中、西二派会。又东南经大屿沙入海，按：沙湾水各志均不详，兹据广东舆地全图补入。惟学洲汛水，查田志图藁及旧志均不载，以水道考之，则荔枝湾水与黄旗都之潭洲汛水合，疑学洲为潭洲之讹。可行大船。

板沙海，自顺德县东南流入县西北境距县城约一百余里。西南别出一派绕沙洲复入顺德县，又东南经学洲汛学字疑潭，详上。分流绕沙洲复合，东南别出为学洲汛水、小黄圃水，自西南来注之。木头海，自东南来注之详下。又东南乌猪山水自西南来注之。又东南经横档山距城北五十里。东北别出两支夹大澳沙入蕉门海，可行大船。

木头海，自顺德县东南流入县西北境距城约七十里。东南别出中心海沙小水，又屈东北经撒网沙，东南别出沥尾沙水详下，屈东南经大坳沙，东南别出坡头水详下，屈东北经担杆沙、大岑沙分流入板沙海。按舆地全图谓：木头海经尖峰山分流入板沙海。今考尖峰山在大黄圃乡之南，木头海经大黄圃乡之北，相距尚远，故不从。

沥尾沙水，首受木头海，东南流。西南别出二支为横海水经小榄乡东距县西北约六十里。又东南经罟步汛，西南别出为北洲水。又东南分流络百花头、大雁沙复合。西南别出两支经港口汛，夹石特沙，又别出为石岐水详下。又东南沙边水、小隐港、下茄涌、潯角涌、平荫涌、榕树涌、笔架环诸水各自西南来注之。又东经横门

入海，可行船。

坡头水，首受木头海，东南流经坡头山距县东北约七十余里，屈而东经浮墟汛，其北别出为黄圃水。又东南经锦标沙与沥尾沙水会。又东南经横门入海，水平流，可行大船。

云步海，自顺德县东南流入县西北境距县西北约六十余里，分流绕螺沙、尖冈复合。又东南分流，在太平沙、拱北沙之间为戙角海。络拱北沙、指南村、显龙沙、赤洲沙、黑沙复合。横海、北洲、石特沙自港口汛分流，东受隆都诸水者。诸水自东北来注之，屈而南入古镇海，按云步海，自顺德县入本境之海洲，祝志图及同治五年刊广东图所载俱与古镇海通。祝志且明言一西南行为大石海，一东南行为小榄寨前海。田志图藁于潭洲、顺德交界亦画一小水通之。今广东舆地全图则云步海东流，与西流之古镇海各不相涉，而潭洲、顺德只以陆为界。其此水之已淤耶？抑偶略写耶？俟实地踏查或可解决。水平流，可行小船。

石岐水，为沥尾沙水之西南支，至港口汛距县城北十五里，为水之上流。由港口西南，有张溪涌发源莲峰北峡，迤西至基边村分流，一出东海，一经张溪村前至此。东注之。又南员山涌水自县北员山村出，一会青云涌，一入海。东注之，至狮潞止，曰港口海。又南行经县地，西有青云涌源出县北插笏山南东注之。又南元坛桥涌详下会县城南河水东注之。以上属石岐海。由此再南有白石涌，合桥仔头、天王桥二水东注之。又南槎桥落涌、荔枝基涌，源二一出县西南北台山北峡，一出县西石头山北，俱良都属。渡头涌诸水均东注之。又至北台海、梅花水详下东注之。稍南有深湾涌东注之，出口处曰深湾海。至芙蓉沙与古镇海合流，至磨刀角入大海。由县至磨刀角水程约七十里，皆平流，可行大船。

石特沙水，亦沥尾沙水之一支，自石特沙来经隆都象角汛距县城西南十四里。迤西四里许，岚霞涌、鸬鹚石涌西注之。又西南里余，沙溪墟涌东注之。西南里余，婆石涌东注之。又西南三里，青姜涌东注之。又西南里余，起凤环涌东注之。又西南三里余，至叠石海会云步海入古镇海，计水程约十余里，皆平流，可行大船。

西江，自新会县东南流入县西南境，距城九十二里，距黄梁都土城北三十七里。分两派，东派东南流，别出两支，夹大石鼓东入磨刀海。又东南经大托山，别出一支东入海。又东南经白蕉距城九十里入海。西派西流，屈西南经上洲、下洲距城一百十五里。又西南经虎跳门入海由虎跳门至鲟鲤沥八十里，水势平，视新会厓门较缓，可行大船。

右为源在他境而委在本境之水。

湾口水，源出黄梁都蟾蜍迳山东，去县城西南一百二十余里。东南流合古井坑、鹤

兜、石脑、龙坛迳诸山水南行至乾雾村，又南历东澳、竹蟋、高城、蛇山泉汇焉。复南流出湾口入海，凡行二十里。

斗门涌水，源出黄梁都、黄杨山西之西坑，去县城西南七十里。由石门坑桥北流，汇鹤兜山西北溪水，经龙归桥北，迤西汇竹坑，经南门村出斗门涌，入下洲海。凡行一十三里，自斗门出海，可行大船。

三灶大涌口水，源出草塘。在黄梁都三灶乡，去县城约一百三十余里。西流注圣堂、春花园，过迳屋，边村、茅田山东南诸水汇焉。又经牛婆墩、鱼弄、西洋田，诸山水自北来注之。又出大涌口南汇横榄坑。

六灶山诸水入鸡啼门出海，由牛婆墩至海可行船。

茅湾涌水，源出谷字都将军岭之东。去县城东南七十余里。东流八里过乌石、桥头乡，出细墟桥西，会平岚乡水，流注三合港，折东经雍陌村南门，限岭溪水左右中三派合而来会，经茅湾过外埔前至孖洲入海。共行二十余里。自茅湾至海，可行大船，水皆平流。

东岸涌水，源出恭常都山窑迳东去县城东南约九十余里，北流过大。小赤山、大小南山至东岸村西，会下栅、大陂头诸水，南会浮桥、沟心诸水，经淇头陂入曲涌，东受鹤陂内外诸水，出大闸桥，经东岸涌入海。

上涌水即翠微溪水，源出恭常都之鸡心岭距县一百一十余里。西南流经前山寨，又西南经鹅槽山入青洲海，其西别出数支络蜘蛛洲、烟管诸岛，分流入海。南出海之口曰峡口沥，在南屏西八里；东接将军山，西接烟管山，北接鹅槽、坦洲、孖洲诸港水，南达外洋，长十里许，水势最湍急。青洲海东北流经山头围，屈东南经北山岭，复屈西南入海，可行大船。

小隐港口上流为宫花水，源出五桂之北。属得能都距县城东二十里。出得能都东北至江尾头西，别出一支为沙边水。北行经冰洲山，西入沥尾沙水。又东北行经神涌前为小隐港，属四字都。东受三度溪源出四都八帘障东、东丫、大环诸村水，出三洲口，入沥尾沙水。水皆平流，宫花水潦涨时可行小舟。

石门溪，源出五桂山东南。属大字都，距县城五十余里。东过龙舟地，西帘迳涧水北注之。又东过员冈前，獐鹿坑自红旗岭南注之。又东过石门村，牛路坑自震竹山北注之。又东折而北，烂泥迳水自西北来注之。又东南至山门，经翠亨村、竹头园东，过下山溪，经崖门山入海，流约二十余里。

合水口溪，源出大字都较翦门山东。距县东南四十余里。会震竹、鹧鸪诸山水，东

过溪底为三合水。东出过笏箕环至合水口村前，云梯山、宝鸭池水南注之。折而北经南荫墟过黄道山东，又西北会白企溪，源出大字都破瓠迳东。龙头墟溪从分流水东注水东折沙冈嘴，北会出水象、土屏、四岩诸山水出涌口门入海。

梅花水，源出良字都鸿鹤岭北距县城西南三十五里。西流数里出梅花村，又折三里至石鼓之南春坎坑，北纳双合山水西注之，又纳牛耙石、饭包石、香炉峰诸水出石桥而西，又汇大尖山、寿星塘、花树坑、戴土岭诸水而过北台之南，出龙眼树涌，注石岐水。出口处曰北台海。经流三十余里，水多石，颇湍急，可行小舟。

元坛桥涌，源出良字都蟾蜍岭西距县东南三十里。合双合山北峡水，至三角塘村前潴为罗婆陂。明永乐二年，县丞彭与志筑灌村田，县民刘母罗氏捐田为址，故名。西折至库涌村前，桂峰、小岭诸峡水来会，至蚬涌分流。一支迤北九曲入清风桥，绕文庙而西。又名九曲水。过元兴街为东濠，会东关水；又西过南门桥为南濠，会南关水，出登瀛桥。一支迤南折西，过桥仔头，又折北为西边涌，东北至登瀛桥合流，过梅基，总名南河。出元坛桥涌前入石岐水，皆平流，可行小船。

右为源委全在本境诸水。余各都小水尚多，以太繁琐不录。

海岸附

本县东北海岸与番禺县东南海岸以黄角村分界，其东南为急水角，屈西南过蕉门，屈东南过大澳沙、大屿沙，屈而南过万顷沙、板沙、海口。屈西南过横门，又南过濠涌水口，屈西南过平山汛、企人石汛，屈东南过东岸水口、高岸角。屈而东过金星门，屈东南过唐家环，屈西南过银坑、南村水口，经香洲商埠屈东南过南面山、吉大汛，屈西南过马角、澳门、青洲水口、马骝洲，屈而西过企人石。屈西北过挂锭角，下有沙险。又西北过沙尾水口，又西过秋风角，屈东北过上涌水口、三合港水口、南野角船汛，下有沙险。又西北过磨刀角，下有沙险，为县治门户。屈西南过南沙滘水口，屈东南过黄麋门、马鲚门，屈西南过白蕉、泥湾门、东村汛，屈而西过熨斗环，又屈北过虎跳门，为县治门户。与新会县东南海岸分界。县所辖沿境海岛，东有淇澳，为省、澳、港往来之地，屯聚极宜，近有拟在此辟商埠者。旁为夹洲，其北泗东山羊洲，又北马尾洲、蚁洲，其南蛇洲、白排、野狸洲。近香洲商埠人拟筑长堤于此，又拟于洲左右筑轮船码头。九洲东南有大、小横琴山，其北长沙兰、马骝洲，东为九澳洲，东北鸡洲中为十字门。又东南有大、小万山，其北东澳、黄茅、小蒲台、浪烈火溜洲、大碌、三角山、长洲、赤洲。其东大蒲台、鬼洲、竹横山。东与新安县分界。南有大宁山、大环山、碧青山合为一岛。即三灶乡。其北白藤，其东鹤洲、横洲、草鞋洲、大冈。其南打浪冈、二浪、三浪。其西大、小淋山；又西南高栏沙、黄竹沙，其北三角三角之南为荷包弯，可泊船。大杧獼洲、鸡心洲、大虎、二虎、三虎，与新宁县分界。

温泉附

热池，在谷都雍陌村南三里距县南八十余里。原田淤洳，中广可四丈许，深洼莫测，四时汽起如蒸，冬寒愈燠。好事者以巨蟹投其中，少顷出之，螯跪，尽赤若烹炙然。浴之可已疔。按：去县东六十三里，大字都、长沙埔村闻亦有温泉，人鲜知之。

。

香山乡土志十三

道路 航路

道路

本邑道路，自县治起，西北诸乡均以航行为捷，东南诸乡则陆路交通为多，惟期促事繁，未能按里以稽，致为憾耳。

东干大路，自县城二里大柏山起，又四里为细柏山，村下有龙井，上有凤栖岭，旧有汛，今撤。又七里为牛起湾，良、得二都分界处，乡后旧有礮山炮台，今废。右通东濠，左达羊角沙，又十里为濠头乡。乡后有炮台、大药局，距乡十里许。又有水洲炮台。又二十里为张家边乡。距乡十里有二洲、三洲山，四十里为榄边墟，属四字都。又六十里为小隐乡。又四十一里为南朗乡。属大字都，有墟。又东北五十里为李屋边乡一名岐山乡、林屋边乡。又东南五十二里为平山乡、厓口乡。自凤栖岭至此，路皆阔六尺许。又东六十里为涌口门乡，稍北为麻子乡，俱滨临大海。涌口门东，与东莞新安交界，海面八十里。

南干大路，自县垌南门起十五里为桂峰茶亭。又十五里为双合山，又十余里为石鼓山。又十三里曰沙桥，中通一径，上为平迳顶，有云迳寺茶亭，去县南五十里。良、谷二都交界处。由云迳寺稍北，折而东至石莹桥属谷字都。又二里至大南坑，又二里蚬蛇塘汛，又南行里余至驰马坡。三里许，至平湖沙冈。距县七十里，仍属谷都。又五十里至前山寨属恭常都。又十余里至莲花茎沙堤。又六七里至澳门。

航路

由石岐水出港口汛，沿沥尾沙水，越大洲、二洲、三洲山属得能都，至东洲门出海，南折涌口门属四大都、金星门，共九十八里。又南行二十七里为野狸洲，其北即新辟之香洲埠。又十里为九洲洋，十五里为吉大汛。又十五里为澳门。此为海程东路。由澳门西南行约六十里，可至三灶乡之大环山。

由石岐水南经第一角海、深湾海，分为东南、西南二支。东南支南行，由磨刀门过南野角、秋风角至澳门，共七十里。折北二十五里至前山寨。县南行航路至恭都合胜围为十顷围截蹴。同治庚午，都司杨云骧通之，由峡口涌至合胜围口涌，长四百二十丈，阔十八丈二尺。渡船来澳者，由灯笼山转入，出峡口涌，经沙尾、北山沙尾入澳门，可免飓风、盗贼之患；且较大海为近，人便之。西南支由第一角海，经芙蓉沙、广福沙，稍西北经新会县属之螟虾头、粉洲，入东濠口，经小赤坎濠口出菓蓁洲至大环山。又两行经上洲、下洲，入斗门涌，至黄梁都；不入斗门涌，可直出虎跳门，通新会。

按：广澳铁路闻有商承办，拟改名为广关铁路。其预定线，闻由广州番禺芳村设车头，经南海之平洲，直达顺德之陈村、大良、容奇、桂洲，乃至县属之小榄、石岐、上栅、下栅、东坑、翠微至前山、关闸止由上栅至关闸，俱属恭常都云。附载于此。

香山乡土志十四

动物 植物 矿物 制造品

物产

甲 动物

畜产脊椎动物哺乳类

牛有 牛、水牛，邑所畜水牛七， 牛三。羊邑产者色黑，饲以野草，俗呼草羊。犬多蕃种，小者曰蚁狗，大者长毛，褊褊深目，短喙。邑人多蓄以守户。豕 猫 驴 马 般第狗亦蕃种，昼潜于水，夜卧地，能啮树木，牙利如刀。

畜产脊椎动物鸟类

鸡邑人牧之。有名枨鸡者斗鸡也，多蓄以相斗。又有毛鸡，俗名苦里，嘴似鸡，黄麻色，补益人；毛可入药。鸭濒海之田多产蜉蝣，食禾苗，为农害。惟鸭能啖食之。明初有设埠养之者，民蒙鸭利焉。蕃鸭种出西洋，邑人多畜之；小榄乡尤夥。鹄 鹅养之园林，则蛇远去。

畜产节足动物昆虫类

木蜜取蜜脾以冬夏为上，秋次之；春易发酸。蚕小榄、黄圃、古镇诸乡多养之。顺德县素以蚕业闻天下，小榄与之接壤，故影响所及，乡内稻田其改植桑者，近已占三分之一；且有欲以新法改良蚕种者，此业当更发达也。又有黄蚕，子小而色黄，乌石、平岚诸乡多养之，饲以乌柏叶、紫苏叶，用织茧绸，惟尚非大宗。

水产脊椎动物鸟类

鸕即尔雅之须 又名刁鸭 鳧白鳧、黑鳧，首有冠，宝鸭头，有绿毛，身具文采。蜆 鸭，又名水鸭，入水食白蜆，雾中飞集成群，邑人网取以供食品。又有琵琶鸭，背类琵琶。雁鸡形似雁，喙距如鸡，大者重量四五斤，浮海捕鱼食。脊令时时见之，大如鸚雀，长脚长尾，尖喙，背上青灰色，腹下白，颈下黑，如连钱。鹈鹕颌下有袋，能泅水取鱼，邑人呼：水流鹅。鹭俗称鹭鸶。鸬鹚 雁 鸳鸯 鸥 鸚鵡俗名鳧鸭而大。水鹤似白鹭。

水产脊椎动物爬虫类

鳖驼鳖，背隆起，水缸养之，日取水煮饭，可治劳瘵。龟邑产者：山龟，水龟，绿毛龟。能已疟者疟龟，生高山石下，老疟以其头烧灰服之，良。六目龟，本两目，其四乃花纹，与真目相比。蟒螭，龟之巨者，邑人捕食，俗呼鼉龟。

水产脊椎动物鱼类

鲟鱼一名寻龙，即鲟也。邑海中，小者时时有之。体有嫩沙者，潜龙鲨也，味略减。鲤海鲤，金赤色，大者数十斤，畜池塘者大不过二斤。龙不鱼不，土音读敦上声。类石斑，皮最厚。重者数百斤，肉甘鲜，无毒，作羹良。皮干之，以货远，为海味异品，名龙不皮。青鲛鱼蓝白色，首尾尖锐，长者二尺余。沙鱼类鲟龙鱼者潜龙沙，首如犁头者犁头沙，齐齿者齐口沙；身如剑者剑沙；又有斑点沙、白腿沙、暹沙。胎生子必二，朝出口，暮还腹中。诸沙皆然。惟潜龙、犁头则否。其翅为银丝菜，俗称鱼翅。石斑鱼澳门海多有之。石首鱼黄花与白花，皆鲈属。白花腹中白鳔可作胶，补肾，酿酒良。黄花惟大澳海有之，能鸣，网师以长竹筒插水，听之，闻其鸣，则下网，每获至千余，十月最多。鳊鱼别是一种，非异物志所言鸟化之鱼。邑海中甚多，类鲈，色微黑，无毒，俗呼盲鳊。鳊白鱼眼大，身扁，腹白，背青，三月出，日上市，供邑人常饌。盐腌者尤为邑佳品。食荔枝过多，以是鱼作羹解之。鱼大者数百斤，少刺，肉淡，胶重。十两者与银同价，补肾。黄雀鱼身扁细鳞，色黄形似马鲛鱼。俗传每岁八月，化为黄雀，十月复化为鱼。黄鱼类鲟而扁，长五六寸，背鬣有一线，长与身等，尝以二八月化为大鹄。又一种名水核，似黄鱼，鬣无线，味顿减。牛肉鱼赤如牛肉，重者数百斤，背斑，腹青色。鲟鱼形类牛尾，亦名牛尾鲟。黄皮鱼类黄花鲈而小，皮黄如金，亦呼狮头鱼。青鳞鱼鳞色青，长二三寸，类黄鱼，小而狭。鰲刀，今之鲛鱼也。长者七八寸，饮而不食，鲛亦作鲛。凤尾鱼即马鲛，状如鲛而略小。金鼓鱼又名铜鼓鱼，体圆如鲷，色斑黑，其皮苦，去之乃可食。鲢子鱼身圆头扁，子满腹，有黄脂，腌为佳品。黄鲢大者重数斤。最美紫鲢、青鲢，长六七寸；蜆鲢，长三四寸；产池塘中。头颇黑者乌头鲢尤美，冬益肥。鲮鱼即江豚，大如盘，状类蝌蚪，目能开合，触物鼓腹如气球。将风则起，吹浪如沫，尾长有节，螫人甚毒。腹中有洞，养子如海鲨。大者百数十斤。色淡黑，有斑点者，方头褐色，如麻雀斑者，最毒，食之必杀人。其背青腹白，腰有赤印色者，色黄者，味最美。长尺余。大而板牙者次之。凡食磨其刺，去其涎，剔目去髻，涤血，除脏，捐卵留肝杂肥肉，扁豆叶、柚皮等物多与水烹之，毋续添冷水，毋堕煤炆釜中，经日毋绝火，火候足，皮骨脱，斯可啖。修治失法，及欲速，即被其害。鳖鱼大者数十斤，腹内白鳔，中空如泡，诸鱼胷无此。大者破而干之，以为货岭北，人谓之鱼肚，以为上饌。亦作胶用造弓矢，惟无取肝制油者。鳊一名鲢，俗名三黎。胃网而不动，护其鳞。石灰水浸干，层层起之，可作女子花钿。鲷即鱼，身正圆，无硬骨，味美。俗有第一，第二鲷，第三马交郎之谚。鲷鱼鲷、土音芒；腹多黄肪，背青。大者七八斤，鱼之最肥美者，与姜同煮则臭。鲑鱼一名；又名。大首偃额，大口大腹，有齿、有胃、有须。生流水者，色青白。生止水者，色青黄。大者三四十斤。赤目赤须、无鳃者，食之杀人。张茑形如鲮，两翅

尤阔，能飞波上。一名燕子鱼，首尾翅皆如燕，故名。庵丁髻翅多硬刺，如针螫人，类赤鱼而小，长数寸。赤鱼身蓝黑，无鳞，肉赤。大者数十斤，二三月入自大洋，望之若黑云至。蕉门稚者，多变为鲋。鱮鱼不一类。金丝鱮、红鱮、黑鱮、金鼓鱮，状如铜鼓，重者数十斤。九月更肥，故曰：霜降鱮。龙松鱼亦名龙头鱼，巨口有齿，骨柔而脆，作羹白如乳，滑如脂。鰕无鳞似鲇而大，色青，俗呼 鱼。鞋底鱼即鮆沙，比目鱼也。状如牛脾，细鳞，紫色。又名板鱼，味美。左口鱼状类鮆沙，身阔。有箬叶鱼亦其类。体有横理，青白相间。马母鱼即马友，巨口细鳞，内白小刺，味甘。出二三月，重者七八斤。鲈四、五月出。鲂俗名缩头鳊，形似鲛而身扁，颈缩，味颇美。屐鱼似鳊，身微狭，有细刺。黄颡鱼无鳞，古名黄鲿，生溪塘石隙。俗名塘虱。鳊俗呼斑鱼。首有七星纹，有蛇化者，必数掷地乃烹。若足见，及无胆者，山涧掘出者，不可食。鱮鱼一名鹤觜。石画鱼首有石。锋笏鱼大如茉莉叶，锋利刺人，其大者，曰：倒捻叶。弹流鱼即田流鱼，一名花鱼，一名七星鱼。白颊鱼形如笔管良 鱼纤瘦微扁，亦名即丽。蛇更鱼似良 ，无鳞，色赤。白带鱼长者二二尺，色白而柔薄，即腰带鱼。蓝刀鱼背蓝腹白，长六七寸，类刀。笋壳鱼类笋壳。大眼廓鱼类鰕白而小。朱笔鱼色赤，身圆，类良 而大。沙钻鱼似黄鰕而短。横掷鱼似青鳞而长，大者南风鳐。 鱼似南风鳐而大。红衫鱼长者七八寸。老虎鱼长数寸，有斑，类虎。作羹如乳，食之已疟。角鰩鱼大者重二三百斤，状如鲋鱼，身微扁有角，味美在腮。乌鱼色纯黑，长三四寸，尾有月晕，内嫩，味清美，可作羹。出金斗湾潮田中。刀夹鱼头扁，类比目鱼。夹脊内分开，尾尖，味鲜，亦名牛梢。黄蜡 鱼长三尺余，扁身阔肚，色似黄蜡，味甘美。一种黄板跳，肉韧味逊。冷梗山鱼皮黄肉白，状如笋壳，尾有晕。丁公甲鱼长二三寸，味甘美，有刺能螫人。上钓作声喁喁如语，俗名唱歌婆。出潮田水窠中。摸皮羊鱼似红衫鱼，有衣包裹，剥去可食。亦名沙 擘口狗鱼形似田流略细，出泥坦中。青罟鱼似横掷鱼，皮滑鳞细多骨丝，聂切之可为脍。坑蠹鱼红眼圈，多骨丝，身圆肉嫩。飞鱼状如龙觜，角起刺，脊鳍如翼，能飞水面。狗棍鱼长尺余，细牙似锯，身圆肉粗，味臊。亦有腌以为饌者。马头鱼似红衫鱼而身长。白春鱼长寸许，色白，干之味甘美。每潮信，渔人打至万斤。梳婀鱼形以白春，多刺，作羹白如乳。银鱼俗名白饭鱼，即白小。长一二寸，体小透明如无骨，为鱼类之下等，味鲜，人煎之为饌。鹅毛鰕也，俗呼为鱼婢。北户录云：腊之名鹅艇。泥鳅类鰕，而短壮。石铤类泥鳅，有鳞，生池塘溪涧中。鰕鳊鰕，俗呼鰕鰕。分数种，金丝鰕，一名走风鰕。白鰕小者鰕乌耳者佳。黄鰕不可用桑柴煮。藤鰕肉多刺，油鰕肉多脂，骨鰕硬骨。鹤鰕长四五尺，喙尖长腹，多子。血鰕大如黄鰕，紫血充溢，出澳门涌口门等处味最甘。狗吐鱼身似鰕胶，干之坚硬。鰕一作 ，一名鰕。诸鱼欲产，鰕辄以头冲其腹。金鱼处处养玩，食橄榄渣肥。鲩草鱼，食草。有青、白二种。青者名螺丝鲩。鲈喜浮水面。与鰕鱼皆属土。鰕俗名大头鰕。鲫 鲢俗呼扁鱼。按：自鲩以下诸鱼似可别为畜产一类，惟邑地濒海，水产鱼类最多，日上市供食品此数种，土人以其产于塘多不嗜食，故不列。

水产节足动物甲壳类

蜃善候风，牝牡相随，取之必双。牝无目，得牡始行。小者鬼蜃，食之杀人。龙虾首似龙，巨者七八斤，壳嫩，红色。大者长七八尺至一丈。棱虾长者三四寸，似沙虾而大。背有红膏一条，俗谓之棱。晒干可致远。肉色明透者明虾，无棱者曰大虾。沙虾一名麻虾。大者长三四寸，涌口门内者为最。白虾色白，黄虾色黄，红虾壳硬色红，竹节虾身如竹节，尿虾溺尿类百足。银虾色似银，可作虾酱，唐家乡良。虾春者，水蛭也。蟹有智蟹、礼蟹，常食者白蟹，名花蟹，俗呼小娘蟹，九月后肥。虎蟹背礫硃多刺，略似虎形。血蟹肉红凝如血，最鲜美。蟹奴状如榆荚，色绿，不可食。黄油蟹产澳门青洲。岁维六月一出，不可多得。邑人多移船携酒傍青洲擘之，醉以酒，熟而后解之，其油深入内理，黄白杂糅，跪末螯尖皆满，味至浓郁，不能致远，稍耐久则味变。近出产渐希。石蟹黄旗都小隐涌，近马家峙山脚名鸭潭出石蟹。渔人时网得之，。壳蟹眼足与蟹无异，可愈目疾。按：广东新语云：环琼水咸，而厓州三丫港独淡，水气蒸石时流脂如饴膏，蟹嗜食之，辄黏螯濡足而死，化为石，是为石蟹。鸭潭所产殆此类与？螳螂惟白者可食，背青腹白，霜降蛻壳而软最甘脆，多出张家边乡咸田中。指甲螺一名石，壳如蟹螯。螭螺二螯四足，出则员壳，退则以螯捍户，稍长，更择壳而迁焉，与寄居虫异。寄居虫又名寄生螺，海人名为借屋。遇鸚鵡螺离壳出食，此虫占之，肉还，复走出。璫蛞一名共命羸，又名月蛞，味最美。有白蟹子如榆荚，在腹中合体同生，常出口为觅食，蟹归璫蛞亦饱。有一种红螺，腹中亦有小蟹，味不及月蛞。海镜壳圆如镜，两片相合，谓之明瓦。腹中亦有小蟹，与璫蛞同而状异，本草误混为一物。

水产软体动物

墨鱼即乌贼骨，名海螵蛸。章鱼有八足，身上有肉如白，即章举。柔鱼似乌贼，无骨。螺响螺。大者如盘盂，其壳雌雄二声，可作军号。梭尾螺似梭，其壳释子所吹。珠螺腹有珠，多出大海。九孔螺壳即石决明。鸚鵡螺头如鸟形，壳可作杯。红螺肉色红似西施舌，少短。无尾螺，尾端尽破，多出谷都。众香螺，其甲和众香则香，自烧则臭。螺蛳大如指头，泥入壁中数年犹活。蕃塔螺，长寸许，大如小指。狗爪螺，类狗爪，产澳门海石隙中，长不逾寸，味鲜美，不常得。刀鞘螺，如小指大，壳薄味鲜，类刀鞘故名，出前山寨水坦中，他处无。匙壳螺，即淡菜，有红、白二种，干之可食，云益人。蚌蜃属，肉可食，壳粉食之已嗽。白蜃一曰雾蜃，多生于雾，邑海中深澳处成蜃塘。沙蜃形如白蜃，肉白，微有沙屑。多出厓口村外沙头海中。沙白如鰯而圆，壳色白薄而坚，肉中有沙，故名。车渠蛤之大者，背堊文如车轮之渠，故名。鰯如蜃而大，闻雷则生，天寒则肥。邑海边居民以足探取，曰踢鰯。瓦屋亦名丝蚶。《岭表录异》云：卢钧尚呼瓦屋子，烧其由荐酒，名天齑炙。西施舌一名海月，一名瑶柱，俗呼沙舌。蚝即牡蛎，水淡则蚝死，然太咸则瘦，大约淡水多处蚝易生，咸水多处蚝易肥。黄梁都厓口及澳门青洲等处多蚝塘。塘在海中无实土，但生蚝处即是海边，居人妇女能打蚝，潮退乘木器行沙坦，凿蚝肉纳于筐，潮长乃返。鲜食之外，其焙干者曰蚝豉。焙时所出之液曰蚝油，品颇贵重。唐家乡以二物为出产大宗。蜗牛此独产于陆，县城仁山上有大如小儿拳者。泥印形似

鲍鱼，肉爽脆，出东海。

水产蠕形动物

禾虫发生稻田中。二月、八月最多。幼时如红线，具多数环节，形如蚯蚓，长一二寸，粘泥中；大则随潮潦出海，寸寸中断，复各生头以自由运动。所生有埠，邑人之利。

水产棘皮动物

海胆出连湾、浪白诸海。大小不一，如碗、如杯、如梅杏状。类南瓜，壳硬顶滑，口在底，身多纵纹，有小点如粟珠。肉色如鸡卵黄，有四瓣。鲜者甘美，盐渍亦可食。海人投水底取之。

水产腔肠动物

海蜇即水母。形如覆笠，笠面有无数细刺，口在腹面之中央，周围生腕，四本或八本。土人获得，以一种含 植物，名水母叶者腌之可食。

天产脊椎动物哺乳类

麋鹿锡坑山多有之，高澜山亦多。山马形似鹿而差，黑，二角眼，下腹有纹，如二眼形。山狗邑山中多有之，处石穴中，肉不可食。山猪腹小脚长，肉味胜于畜产，牝者更美。豪猪即箭猪，豪在项脊间如簪，长尺许，白本黑端，怒则射人。麋三灶诸山多有之。猴三灶诸山有之。狸似猫，而头尖。豹狸，毛色如金钱豹，肉香美，益人。猫狸善窃食鸡鸭。香狸，一名果子狸，喜食果，肉甘香，酿酒良；其毛可为笔。獭似鼠，善捕鱼，毛著水不濡。豺兔獐大湾底、锡坑山有之。獾肉蝙蝠大者如车轮，栖古庙丛林间。田鼠即鼯鼠，可食。又有名鼯鼠者，好在田食粟豆，亦名田鼠。

天产脊椎动物鸟类

山燕《广东新语》云：香山有之，黑而健，众鸟畏之，隼也。春 状如鹁鸽，色苍白，鸣则首尾俯仰。鹤邑产者灰色、苍色。桃虫一名禾鹄。有名蜡嘴者，嘴淡红如蜡，小人驯畜之，教其作戏。一名鹪鹩。诸事吉胸腹如雪，背似漆，似喜鹊而小，鸣声清越，善斗。邑人珍畜之。沙鹪色绿褐，有青足、红足二种，食之补虚助气。栏路鹄类鸠鹄，灰色。三四月集行道中，人至则起，旋飞旋集，皆在人前。东南乡有之。山鹪能作众鸟音，雄者长， 者短，人多畜之。鹁鸽俗名八哥。时辰雀红黄色，如鹪鹩，应时则鸣。吉兆鸟尾长，色黑白。初冬出，农毕始见，乡人以验气候

。一名吉鵬仔。高髻冠顶有丝翘起，尾色红，类诸事吉。山麻雀善歌，人多畜之。沐国公似鷓鴣。翡翠俗呼钩鱼郎。毛赤碧色，栖山涧中。人捕之，拔其羽毛为钗钿，饰名曰点翠。百舌燕莺斑鸠即鹪。画眉善歌。鹊鸟鹳似鸿而大，长颈赤喙，色灰白，翅尾皆黑。白头翁啄木鹩鹰鹞鹧鸪食植物害虫，味亦美，人多取为食品。鹌鹑黑色有班者鹌，无斑者鹌，即鴛也。杜鹃孔雀

天产脊椎动物爬虫类

蛇金角带，寸黄寸黑相间，宜制蛇姜。草花蛇，伏草中不啮人。泥蛇，与水蛇异类，色黑，穴居中成群，啮人立毙。乌肉蛇，皮骨皆黑，见人则迫，见火则逐；又颈细身粗壮者俗呼钱串头，皆酷毒。铁线蛇，类蚯蚓，有鳞，啮人难治。簸箕箕，黑白色相间，如金角带，毒过之。七寸锦，长七八寸，有锦文甚毒。过树蛉，树上腾跃如飞，每垂首枝上啮过客立毙。水蛇，一曰公口蛇，无毒，食之已疥。金蛇，一名地口，白者名锡蛇，大如拇指，长尺许，能解毒。长尾螭，无毒，能伏诸毒蛇；善捕鼠，种植家畜以除鼠害。蜥易四足，背褐色，腹下黄，啮人立死，俗呼狗母蛇。蜥一名壁虎，俗呼盐蛇。草龙生草中，四足，长数寸，人捕取饲画眉。蛤蚧恭常都大仙岭最多。大如草履。蜈蚣即土狗。尝见乡中小儿于沙路xiao穴中捕之，碎其体，任取一爪覆以泥，志其处；迟之，则志处忽生一草，是为香芽；屡试皆然，亦一奇也。

天产脊椎动物两栖类

蛤即虾蟆，又名坐鱼、田鸡、黄蛤，各随方土所呼。蟾蜍俗呼螾蟪，生下湿处，不解鸣，不能跳跃，眉间白汁曰蟾酥。石鳞似田鸡而小。蜈蚣即蝌蚪。白梁蛤拐出幽湿处，跌打药用。

天产节足动物昆虫类蜘蛛类

蝶大者，红质黑章，卵生蚕作茧，茧出，蝶悬树间，雌雄相觅。平岚、乌石诸乡人取茧织绸。蛱蝶螂之小者，气臊臭，群飞则雨。金龟子俗呼红娘，又呼金鸡虫。大者食荔枝花，气臭，名金背。蛱蝶置坎中数日，小蛱郎出，盖孵乳于中也。绿金蝉大者类斑蝥，喜藏朱槿花中。金边土鳖出石隙中。蔗虫出蔗林中，治痘，可起浆。禾虾状如蚱蜢，禾熟则有之。可煨食。桑螵蛸俗呼猫儿郎，豆棚瓜架有之。蝇虎

天产蠕形动物

水蛭俗呼牛蜢，误吞腹中生子，噉脏血；黄泥蜜糖可解之。蚯蚓

乙 植物

植产显花被子植物单子叶类

稻名类颇繁。岁单收，有交趾白、交趾赤、咸棍、咸粘、虾须稻、深水莲，皆一熟之粘也。岁两收者，有夏至白、夏至赤、新兴白、甲子洲、大骨种、红梗、早河源、青花壳、赤早莲、龙牙尖、马尾齐、秋香尖，皆早熟之粘也。有苗粘、绵粘、擘荚粘、中水白、粉壳赤、白花粘、青粘、雪粘、银粘、鼠牙粘、黄粘、玉绣球、金包银、牛尾堀、香粘、禁风雪、麻包锦，皆晚熟之粘也。又洋粘、竹粘，近岁来自洋舶，土人有种者，肥田宜之。又秋分、寒露粘、霜降粘、香稻产恭常都，以撮采杂斗米煮之，熟则皆香。糯夏熟曰早糯，秋熟曰晚糯。有珍珠糯、黄糯、河源青糯、高州糯、交趾糯、黑糯，米色如墨，酿酒补血。粟邑多狗尾粟，乡间煮作糊，以代粮。麦黄旗角有之。薏苡乡人多种之，二三月宿根自生，米如白珠，不甚圆。一种小粒而圆者，出外国，曰洋薏苡。粟米即玉蜀黍。大北山村人种之。葱蒜仙蒜产象角山，叶高尺许，夏秋之交抽茎作碎花，紫色，其头能治中毒呕逆。韭薤或谓之藟。姜黄姜，澳蕃喜以煮鸡，土人多植之。芋波斯芋，种出外国。蔗常食者白蔗，紫者昆仑蔗，小而燥者竹蔗。荻蔗不中食，惟以榨糖。蕉邑基围小垌上必种之。其类有毛蕉、羊角蕉、牛乳蕉、鼓槌蕉。板蕉其茎之纤维可纺绩，为饰谿，今无制之者矣。竹勒竹，长十余丈，大如斗；短者亦六七丈，叶下有钩刺，或有条末如芒针。紫竹，皮色紫，中器用颇雅。鹤膝竹，茎直少横枝，宜于亭馆；又可为杖。鸡距笋竹，一名涩勒，枝皆五出，类鸡距，可蔽村寨。大头点竹，长者数丈，可为枿。水笋最甜，基围多种之。铁篱竹，坚劲，出老万出。金竹，出厓口山，作烟筒，邑人所贵，今亦稀。人面竹，节凹而中凸，又呼佛肚竹。方竹，质小，作烟筒，不可为杖。油竹，浸水晒干，各家种以代炬；相传宋文祥屯岭南，然此，或呼丞相竹。篁竹，坚而促节，体圆而质坚，皮白如霜粉，大者宜刺船，细者宜笛。斤竹，长二丈许，围数寸，可作篴或以为矛，其笋未成竹时堪作弩弦。线竹，即钓丝竹类，簨枝极柔弱。又有箭竹、篱竹、观音竹。吊钟竹，叶如竹，花似悬钟。慈姑一根十二子，有闰则十三子。荸荠俗名马蹄。波罗俗采其叶，擘丝为波罗麻布。邑产者叶不坚韧，欲兴此业，须设法改良其种。兰出五桂山、凤凰山。桎兰花大香厚，品最上。一茎及桎有开至五十余花者，称隔山香。大青兰花，青碧。墨兰，品甚贵，气清芬，色如淡墨，一干至三十余花，立春元旦开。草兰，喜霜雪，不资灌溉。黄兰，色淡黄，瓣有小红纹。报喜兰，俗云吉事则开，悬户可催生。鹿角兰，花紫蕊黄。小玉兰，清白炎白。翡翠兰，色如翡翠。同心兰，八瓣双心。睡兰，花开卧于盆边。鹤顶兰，蕊卷如筒中有猴头，象双睛炯然。竹叶兰，叶类竹。红兰，花小而丽。球兰，花如圆球。文殊兰，如玉簪。风兰，如珊瑚，枝叶小而细，开花似梅。玉簪茭白即菰也。一名茭筍、乌茭。邑人多种之。露头苍俗呼芦兜。以火焚根，令头出土，乃盛与火秧，皆乡人种以樊圃。又有番芦兜，皮纤维可打缆。凤尾蕉植之云辟火。花辟蠹，烧铁钉之则茂，故曰火蕉。红蕉花书带草叶柔长如带，其文青白相间，园亭阶砌植之。咸草人编以为箔席，多生水湄。马鞭草粤草咸苦，马群

不繁。国初尚可喜入粤，尝取辽东草种，遍植近郊以饲马，此其萌芽也。即元史之示俭草。落鱼食草。萱 淡竹叶可入药。

植产显花被子植物双子叶类

荔枝邑产以黑叶为上品，玉荷包，颗最大，出小榄乡者，核浮水他乡则否。御摘荔枝，在沙涌马南宝故里，相传宋端宗临幸时，荔方熟，帝摘一枝，其後经摘处，风味独殊。此荔今名三月红。橙邑产最多，味虽不及新会产，而树壮果大，收丰价廉，利较优胜。盖本邑橙种，每择最壮之树为之，新会无此佳种，故彼土宜，虽优而销路反逊於我也。龙眼邑所产，拾叶者尤美，或呼石夹。最大者孤圆，次金字、山字、南字；小者蜜糖埕，迟者秋风子。蕃荔枝种自西洋，邑处处植之，皮内有细沙如梨，中数十苞，每苞一核，味甘芳，虽名荔枝，实非其族也。芒果蜜望也，黄熟时甘香胜蜜。邑种者，竹秀园、沙涌乡为最。别一种蕃望果，妇人食之多乳汁。杨桃三廉子，岁再熟，治风热，生津止渴。产澳门者良。波罗蜜木质坚，可为楹桷，核长者牡，圆者牝，实多汁多者为涇苞。汁少者为乾苞，肉脆味较胜。邑种者，皆湿苞，濡腻。城北李氏怡园一株极大，乾苞甘脆，百余年物也，今尚存。蒲桃邑基围处处植之，甘香稍逊罗浮。柿小柿产古镇，乡曰鸡心柿，大者胶柿，多不可食。安石榴邑东南有榴花山，以产榴花得名。植於园林者，黄白花，甜酸苦实各种皆具。橄榄 乌榄取其肉腌为菹，曰榄豉，贫家以为常膳。仁为佳果，脂如桃胶，煮之以泥船隙，著水益干。人面子可常膳、蜜渍可食。桂木子蜜渍味嘉。黄皮用蜜渍或盐渍者，销行甚远。不纳子核可为经珠。柰 橡 桃

梅西乡之山多种梅、桃、荔枝、乌榄。枣 梨 柚 桔 甘 枇杷 苹婆树高叶大，荚似皂角子，熟甚甘，煨食尤美。卍字果即棋形如卍字，味甘，可酿酒。山竹子如柰而圆，色黄味酸，盐腌能解热。黎檬即柠檬，又一种山柠檬，叶白而香胜，植产者，子榨水煎糖，能辟暑。菱 藕

胡麻乡间但种白者，为日用常需，行聘礼者用之，无以绩布者。麻仁 桑小榄古镇、黄圃、曹步港口诸乡多植之，余尚寥寥，桑寄生、小榄为良。大麻良字，得能四大各都，及小榄、古镇诸乡，多取以织布。茶五柱山产神仙茶，乡人於清明前後，穷日搜摘，无过。雨余凤凰山茶，味亦清馥；黄杨山茶；寺僧所贵，以供客。老万山茶，辟瘴解暑。良都属，小岭所产亦佳。以上茶皆野生。道光末、恭都会同乡人始辟地种茶，其味清凉可比清远所出者，曰茶园茶。又有破布叶作茗饮，清热消暑，能解闷香，出大字都、黄道山者良。吉贝花即草棉，西人威廉姆记中国产棉地，以古镇乡为产棉地之一。南荫诸乡亦多种之，邑人曾於得能都辟地试种，旋中辍，今宜再提倡之。木棉邑西山木棉，八景之一，余亦多。产子熟拆有絮如草棉，人以不能耐寒，故无为之纺织者。樟大小无不适用，叶可熬脑，然未经实验。罌子桐一名邑桐。邑人种之，收子为油，入漆家，及艖船用。近谷都、雍陌村兴办林业，多植此木。槐 榕有大叶、小叶二种。县治主簿署一株，不知何代物也，大数百围，其根气生而歧，如圭门形，可行人。苦楝俗名为森，其木易长数年高数丈，叶密如槐花红白二色，实如小枣，不可食，材中筐篚，或以制屐。九里香

茶藨小欖乡多植之，以亩计。有洋茶藨，及玫瑰，可制糖，或蒸露。蔷薇
胭脂蝶亦蔷薇之一种，色深紫。七姊妹 长春 月贵 丽春 夜兰花叶俱可充食。茉莉有
重台、三台、有蕃茉莉，花大如龙眼，鲜有开足者，可熏茶。素馨 鹰爪兰 鸡爪兰
指甲花 邑种红白淡红不一，妇女以叶染指甲。蒲公英 海棠 凤仙
碎玉花春开，小白，攒簇成球。午时花 蝴蝶花 夹竹桃 杜鹃花 玉绣球 瑞香 雁来红
石竹 翦春罗 鸡冠 菊种至繁小欖乡人善作盆菊，每植一株，分数十枝，或百枝，三
丫六顶，一枝止留一蓓蕾，扶以小竹杖，长短相从，花时齐开，如规之圆，尤以叶
色葱茂不脱者为上。六十载为会，名品毕陈，称海内之冠。万寿菊花黄无香非菊种
。蜀葵 玉芙蓉叶色清白小黄，花攒簇成朵。薤卜花 虞美人 紫藤花 翠雀花 朱锦花
凤须花色杂红黄，花须似凤。含笑
夜合园林多植之，惟生凤凰山者，高丈余。木芙蓉 岩桂 木樨 紫荆 牵牛花 玉兰又名
木笔。蕃玉兰叶花皆如玉兰，而香如玫瑰，澳门有之。洋山茶红白二种，重台，性
畏寒。千日红呀兰色，繁英攒簇，粒如指头，干之色不变，粤人编生花作篮，必需
之品。落花生又名落花参，子可榨油，土产不多。菽各种俱有，然鲜植之者。和兰
豆、种出澳蕃今处处种之，蔓生，花白，荚比菹豆，小而狭长、子青，脆软薄，味
甘近潮州人有以此子为罐头品者，比欧洲种更粉腻，销路颇畅本境如此仿之，亦一
利源也。面豆荚，短而圆，开花治目疾。豆鸟豆入药，充食，作豉。黄豆作腐，榨
油造酱。蓝乡民种之作靛，干其浮沫，以拔毒杀虫。葛蕃葛，处处有之，澄粉作饵
，性太寒，不宜多食。薯土人多种之，有猪肝薯，黎峒薯，柴把薯，小者曰鸡哺薯
，芳薯、白鸠薯、亦名土山药。深薯、长尺许，解火毒，陶冶人多服之。甜薯、健
脾，性与山药等。蕉蕾，薯类大薯。薯蕷即淮山。甘薯与上薯不同类，来自诸蕃，
有红白二种，白者尤清甘，磨粉清热。又一种名鬼薯，色黄白，质松味劣。又有和
兰薯，人亦种之。茄 壶卢 冬瓜 苦瓜产土瓜岭，良。白瓜即越瓜。西瓜以张家边乡
种者，为胜。节瓜又名七叶青。丝瓜 金瓜长者名枕头瓜。黄瓜小者名瓜英，可腌为
小菜。香瓜圆如鹅卵，色黄，或有黑点。瓦瓜色牙白，大如橘，有结痂，类陶器，
不可食，可作盆供。朱瓜深红色或间绿色，形如金瓜，作盆供，耐久。蕃瓜 芹水芹
，旱芹。菘即白菜，邑种者性寒，与他处异，可作菹。花芥蒸晒而成者，为霉干菜
。茺菁子可作油。芥兰甘脆，有谓菜含铅质，不宜多食，然未经化验。薤菜邑人皆
种以田。菠薐亦名菠菜。莨苳一名恭削菜也。人多以为贱品，而不知可以制糖。茺
马齿苋，别为一种。俗呼耳牌菜。藤菜即落葵。苣即生菜。东风可作蔬。猪耳菜辛
香能疗痘胞。香花菜叶香宜鱼脍。葛菜 鹅眼即鹅肠菜。茼蒿菊科，植物之可为蔬者
。蓴菱可生食。 珠菜一名番芥兰，叶蓝色，类芥兰而大，一科重至数斤，茎端嫩
叶团结似 子。内珠味甘脆，其种来自番舶，邑人多植之。茴香邑有种之者，暑月
祛蝇臭，食料宜之，制蜈蚣蝇毒。莱菔一名苕。水 高数丈，大者十围，实小如柰
，乡间多种之堤岸，取其蟠根牢固。漆树邑有种者，六七月间斫皮以管承取，亦可
用。但作饴糖。气沾沾无力，宜设法改良增种。乌柏子合油质，作烛曰柏烛，可涂
疮疥。邑人以其叶饲蚕，及染皂。蓖麻子作油，销流最广，近谷都兴办林业，稍有
植此者。刺桐三月开花，相传先花而叶，则年丰。先叶而花，则岁欠。园林间植之
，野生以刺桐坑为最多。黄杨坚腻可作梳，及剜印，凡代黄杨，必以阴晦夜无星伐

之，则不裂。酉阳，杂俎之说，厄闰、不尽然。但闰年不长耳。柞木壳斗科植物，木坚韧。小者屈其枝为盆玩。柳枝烧炭可作火药。怪俗呼垂丝柳。枫长洲狮山有之，间出烟如云。无花果邑多种，以煎汤洗之，已五痔。火秧邑人种以作篱落，俗传其根千岁成茄楠香。麻蔴菜苗樨者，可笔。煮汗消暑疲。紫苏可拌牧食，亦可为药。邑人用以饲蚕。

植产显花裸子植物

松东乡之山多种松。县城莲峰左，香莲寺双古松，相传宋时未建寺前已有。此树松根所生土茯苓，山中随处野生，俗呼米仔头。有一种名罗汉松，似柞树，尖长屈蟠如松。

天产显花被子植物单子叶类

桄榔木坚实，可作轿杠。梭榈水椰禾质坚韧，可耐久。柊叶野生成丛，类芭蕉，乾以苞苴物，盖瓶口，入土火不坏，柱础上以叶垫，能隔湿润，能理象牙，使光泽。香茅可榨油，叶三脊，气味香芬辟秽白茅可苫盖，及制笔。黄茅可为索约排草状如白茅，香芬烈，合诸香为囊，气久不灭。妇人浸油以膏发，澳蕃有疮疥煎叶为汤洗之即痊。莠狗尾草也。蕒生海边积泥可成田。芦蒸蒹也，可织篷。芦荟去皮入姜醋，可为茁。稗害禾实，亦可食。芒俗呼芭茅，可为篱笆，皮可为绳索履屨。菖蒲生凤凰山涧中。天门冬麦门冬芦荻苇野禾天南星树兰黄梁都山中产之。

天产显花被子植物双子叶类

山桔邑人取以煮糖，多出云梯山，枝可作烟管。无患木子有齏性，及油质，可代肥皂，为洗濯之用，俗呼为水患子。艾扶留俗名萎。邑人拌槟榔食之，婚姻庆贺等事，以为备观之品。水横枝横枝、即黄桅之转音子为染料，枝可作盆玩。吊钟花五桂山多有之，冬末春初开花，如钟一苞多至十余朵，人采作新春瓶供。板杏树高丈余，叶长大逾掌，可作酒麴。相思子亦有藤本者，蔓生山野，十余荚为一朵，可饲鸚鵡。火山树山荔枝也，即酸。枝木子，肉薄味酸，木坚致，适用。薄荷草决明豆科植物供药用。卷耳苍耳子，俗名藟头婆，嫩苗焯熟，水浸淘拌，食可救饥。其子炒去皮，研为面，可作烧饼。闹羊花即曼陀罗花，杂烟草吸之。可愈喘，羊食则死。洋苏木可制染料，种出外国。蓼以水浸其叶，和麴，可成酒。罌粟花芥味甘，野生，随处有之，释家取其茎作灯杖，辟蛟虫，名护生草。山丹俗呼山牡丹。胡蔓草即蕲叶钩吻，一名冶葛，食之断肠，中其毒以路旁马鞭草捣烂，和糯米泔或以卵中难子和清油，或薤菜汗，或生羊血，俱能解之。羊食此草，则肥。胡芦叶花似胡芦，腌鱼虾，置数叶，可杀虫。何首乌蓼科植物，入药，益人。县城月山所产有形如婴儿者。石香薷细叶辛香，处处有之。功比香薷更胜。治一切伤暑。落地生根一名落叶归根，叶如茜，冬或生花，略如吊钟花形，中通外长圆，或曰种出西洋，可已癆

伤，咸丰间，邑人采叶晒半乾，以足擦蜷曲，再晒极乾，鬻於蕃人为茗。都念子山间野生甚多，又一种名鸡矢果，俗呼又蕃拈子，色青黄，大如苹果，亦倒捻食之。水荫树高大繁阴，生荚结子，与苹婆类，不中食。鸾菱树丛生，高者七八尺，味甘温，化痰软坚，瘰癧初起，食之顿消。四月间，邑人和粉作饵。三桠苦丛生，味苦甘，解热。三月三日，邑人和粉作饵。油栗山中多有之木坚直而韧，用作槌。椿树鸭脚木小枝似鸭脚，树高大而质轻松，用作屐板，烧灰可作硷。马留菱木坚韧耐久，而难长。县治厅柱相传是此木为之。槎桥落乡亦有一桥，数百年不坏。盐树俗名盐酸柏，黄角乡人每岁食盐，皆取咸田稻秆烧灰，渍卤为盐。雍正七年，海贼围村，无盐者数月，或取山上黑树枝叶煎之，得盐供食，味略酸，因呼盐树。今各乡谿涧中，犹有可采者，惜无研究以致用耳。女儿香木出黄角乡蕉门山，雷涧庙後凡数十株乡人取以供神足二岁之用蚊子树叶厚有棱析叶或茎，蚊辄飞出，破鑊山有之。油柑树东乡有此树高仅尺余，茎去土数寸处，生一胞，大如橄榄，内寄生一虫，长仅寸，色苍白，春夏之交，蛰伏胞内，及秋则化为蝶，破胞飞去。檀树似荔枝，有黄白二种皂树其荚、名皂角。必果密香树之未结者，凡欲结者、必斫伤其树，否则虽久、仍为白木也。色白而香，出翠微山。罗伞树大数围，乡村外多种之，一名山罗。枸杞叶可茹子根可入药。万年阴大数抱，叶圆尖村墟间多植之。蓉笔树在县南一百里，古鹤村中，数百年来，枝干婆娑，不花而实，每叶落不逾三日净尽。又三日，新叶满矣。初如著火琉璃，三四日青如菩提，柔滑可爱。半月後，子满枝而叶老，然叶落无期，如留片叶，虽夏犹寒。农人每观叶为布种之信。按此树不花而实，殆如无花果，开花在实中之类。

天产显花裸子植物

柏叶圆，俗呼圆柏。杉材中船及梁柱，惟少种之者。

天产隐花植物有叶类

蕨根有白粉荒，年掘取以救饥。万年松亦名苔松，产凤凰山，高数寸，乾之数岁，渍以清泉，碧绿如故。盘桓以为珍玩。山有洞名伸仙岩，有一株，高不逾丈，时有岩溜滴其叶不知何代物。也西洋人欲取，终不可得。冻即贯众。又名凤尾草。金毛狗脊形如金毛狗，凤凰五桂山多有之。知羞草人以口吹手触，即合叶如羞。

天产隐花植物无叶类

雷菰春雷发声则出。产夏而後，出者尤香。宜乘雨急采，见日则不可用，恐有蛇虫毒。早禾菌亦名早菰、早禾。湿蒸而出者，六七月间有之。白背木耳东沙、良。石耳

紫菜高澜、三灶海涯多有之。附石而生，色青乾之即紫。石发一名龙须，即海菜。

丙 矿物

有机矿物

蚝壳邑南海岸最多，土人采以煨灰，代石灰之用，且有以为墙垣者。煤油闻黄梁都南水乡有此矿，然尚须实勘。

无机矿物金类

金出恭常都、北山岭村、覆埔山。其地距莲茎不远，金气凝结、沙砾融洽，迸为小粒，自成方形，披沙拣之，俯拾即是，土人只以为冶金创之用。又得能都、濠头山出金，得山土淘之，可得。谷都五指山，闻亦有金矿，然未经勘验。黄佐通志 石似金，出赤坎村。按：村当在黄梁都， 石今未见，未详其何质。银恭常都鸡拍村银涌角，宋初产银，取上供，属广州，宜禄场。明正德中，有畚蛮采鸡拍村银矿之事。明一统与亦载香山东莞二银场，今无此场，想久已采尽矣。铁谷都铁坑埔产之，矿苗甚盛，偏山皆是。经土人延师化验，谓苗脉尚嫩云。地在马鞭埔村西南三里许。铤黄梁都南水乡产之据土人言现已派员查勘。铁养产黄旗都潭洲，经矿师化验，每百斤得铁六十七斤十一两，养十九斤零一钱，沙石三斤四两九钱云。

无机矿物非金类

水晶五桂山产之，土人间有拾得者。黄梁都南水乡亦产之。疏土人言：谷都黄牛寨有之。然未经勘验。石钟乳出澳门九州岩，穴内嵌空玲珑，结乳下垂，累累如贯珠。陈泥可以炼硝。嘉庆间常有硝商持官照到县采买。白土恭常都、吉大村濒海有之，可制土敏土。砺石产吉大村者良。俗有吉大石之称。

丁 制造品

动物制造

丝茧小榄、黄圃、诸乡素多。古镇、曹步、业之不过三十年，颇得利。惟养蚕抽茧，售于各处，不自织也。有粗丝、幼丝之别。邑绅郑藻如尝倡办此业於濠头，港口，今濠头已无，港口尚有之，然不能旺。茧绸乌石，平岚乡人以大蝶茧织成，皱纹蹙起，久服不敝，远胜程乡茧绸，惟制造不多。又一种以黄蚕丝织之，细滑黄韧，乡人尤贵重。一匹须茧至万，工费甚多富人织以自服，不常得也。虾酱东南近海诸村均制之，恭常都、唐家乡最良。捣银虾成 ，盐渍之，味甘香。略乾而细者，曰：虾膏。蚝油煎蚝汁为油，味胜盐豉，与虾酱为本邑制造品之特色。蚝豉唐家、鸡拍诸乡最著。每年采蚝以担计，每担肥者可晒蚝豉二十五斤，瘦者约二十斤，每担蚝汤可煮蚝油二斤，蚝豉有生晒熟晒、之分生晒，味最清甘，熟晒稍逊，然可久藏

。贩买者，俱以熟晒为率。禾虫油制法如蚝油，处处有之。蚬咸淇澳乡最良。咸鱼恭常都民，环海居民，多以渔为生，就海近地腌制，为土产最大宗。

植物制造

棉布乡人种吉贝棉花，纤成白毡，大字都、南荫各乡为之，号南荫机棉布，颇通行。近日谷都大布村，有购机设厂，仿制东洋布者。麻布各乡妇女绩麻，双丝细缕织成者，号家机。自服不以售人。女子勤者，嫁时必有数匹压笼，其良字、得能、四大都所织较粗，售於各处，曰放机。小榄所织较细密，号小榄机。有运售南洋者，古镇所织青纱，号古镇机。草麴《广东新语》云：酒山在香山境，以其白泥为饼，杂药物酿之。按酒山，今不详所在。又云：草麴，以山桔、辣蓼、马蓼之属和豆与米饭而成，香山则用板杏，然味太甘，有毒。重酝酒以糯饭和麴，置浓酒中，二三年饮之。小榄乡最良。又有黑米酒菊花酒，亦美。酒娘腊月以糯米与饼及水酝而成。糟泔其汁藏物不坏。黄酒小榄乡善造之甜不能致远，可入药。蜜酒邑人善为之，有藏至二三年者。大醋出小榄乡良。色深黄大率以黄酒为之，较浙醋殊胜。煎盐邑人有煎树叶为盐者，已见上天产植物类。若能精研制法，亦生利一大宗也。竹器竹合、竹篮之类大小不一，编竹丝为之，细密精致，有小如拳者，邑城制良。榄都人制卍字竹合，尤坚细，盛水不漏。阅数十年不坏。邑城所织弗如也。

矿物制造

铜灯以铜片作底盖及四柱，四面嵌玻璃，刻镂颇工，夜行携之，邑城业此者约数十家。金银器首饰为多。白铁器采洋白铁花铁制成各种器皿，销行本境颇多。蚝灰取蚝壳烧成，邑人多以此为业者，俗有以蓼叶蘸此灰裹槟榔食。铁农具得都库充乡人，善铸铁犁，名库充犁头谷都大布村亦制之，尝运售美属檀香山，近美禁华工，该埠农业衰落，遂停办。故该炉所铸，仅供左右乡之用。砖瓦窑大字都，石门村有缸瓮窑。谷字都榕树埔村有砖窑。

香山乡土志十五

商务

县属商务，除澳门外，以城南石岐为总汇，各乡墟市，亦有号称畅旺者，如四都之榄边墟；大都之南荫墟；谷都之乌石墟；閤阆颇盛。榄都茧市，岁入百余万两。黄圃茧市，获利亦丰。香洲密迩澳门，已自辟商埠，振兴实业。淇澳近金星门亦思踵效，商业进步，当未有艾。至输出输入各品，水运俱多，惟向乏统计，实难调查。它日商务稍开，或易措手耳。

输入品 输入地 岁值约计

洋米 三十余万两

咸鱼 港澳等处 七八十万两

海味杂货 壹百万两

砖瓦 三十余万两

木器杉料 三四十万两

竹器 十余万两

柴炭 二十余万两

洋货 省城香港 二十万两

布匹绸缎 省城等处 六七十万两

生熟烟 二十余万两

药材 省城香港 六万五千元

茶 佛山等处 五万元

烟叶 江門澳門等处 三万元

煤油 省港澳 二十万元

油 省城等处 一百八十余万元

黄糖 省城等处 十八万元

苏杭杂货 省澳等处 一百一十万元